



WANTOK

Niuspepa bilong yumi ol PNG stret!

Wan Wik,

Februari 3 - 9, 2005

NAMBA 1594


K1 tasol



12-pela pes Gavamani Sivarai bilong Mun Jenuari i stap insait...

Great Quality

Affordable Price



* Midia noken baitim rong bilong wanpek-02

Peim skul fi pastaim

...na pikinini i go skul

Veronica Hatutasi i raitim

BAIM skul fi pastaim, orait pikinini bai go long skul. Dispela em bikpela tingting bilong olgeta skul insait long kantri.

Ol skul i sanap strong long dispela toktok bikos long planti hevi i kamap taim ol sumatin na ol papamama i gat dinau long ol skul. Dispela i save kamapim hevi long ranim ol skul long wanem man i sot.

Planti skul i tok maski olgeta kain rot ol i bihainim long traime kisim ol skul fi, ol i no wok gut bikos planti papamama i no inapim ol.

Planti skul i gat dinau yet bilong las yia na toktok i stap long ol papamama i mas bekim dispela pastaim bipo ol i peim ol nupela skul fi mak bilong dispela yia.

Mekim na planti skul insait long Nesenel Kapitel i sanap strong na ol

i laikim bai ol pikinini i kisim beng risit long ful skul fi peimen bipo ol i larim ol i go insait long skul.

"Tru, mi luksave long mani hevi ol papamama i bungim, tasol e mi wok bilong ol long inapim laik bilong ol pikinini na mekim ol i amamas long go long skul. Ol pikinini i no kamap nating na ol papamama i mas luksave long wok bilong ol na stat long redim yet skul fi mani longpela taim yet.

"Maski wanem rot mipela i bihainim long helpim ol papamama i gat skul fi hevi, em i no wok. Long stat bilong skul yia las yia, planti papamama i bin pulumapim na sanim agrimen fom wantaim skul long peim skul fi isi isi tasol planti i bin go olgeta na ol i no mekim wanpela peimen. Sampela i no pinisim.

Igo moa long pes 2



Em nau! (Antap foto) Yu peim skul fi pastaim na... (daunbilo foto) Ol pikinini go skul. Foto: JOE IVAHARIA

Brian Bell's Exclusive Brand

INTEGRITY
7KG TWIN TUB MASIN BILONG
WASIM KLOS WANTAIM
PUMP BILONG DRAIN

Model: 702997
Code: 185214

Brian Bell & Co. Limited
Shop with a friend



PROMOEN ISTAP
LONG OLGETA
BRIAN BELL STUA



INTRODUCTORY OFFER!

BAIM INTEGRITY 7KG
TWIN TUB WASIN MASIN
NA KISIM FREE 15KG
BUCKET GRADEX LAUNDRY
DETERGENT POWDER

K799⁰⁰
PRICE INCLUDES GST

FREE

lba1502

Polis Ripot

Buka:

Polis long Buka i holim pasim man husat i bin kamapim bagarap long wanpela bikman bilong Edukesen long Sohano Ailan las Fraide.

Dispela man em i hapkas Bogenvil na Manus. Em i stap long han bilong polis nau.

Ol ripot i tok man ya i bin kisim spakbrus mariwana na raun i go long Sohano Ailan na katim Peter Braun em wanpela waitman i wok wantaim Edukesen Divisen long Buka.

TRAIN FOR SUCCESS IN 2005!

YOUR professional accredited Certificate or Diploma or Degree.

Professional accredited British Career Training

Cambridge International is the key to a successful career. Invest in accredited qualifications and skills for a great future.

International Diplomas (£130 or US\$260)

- * Accounting, Hotels, Tourism, Computers
- * Business, Management, Stores, English
- * Personnel, Marketing, Advertising, Insurance
- * Economics, Secretary, Purchasing, Stores

Advanced & Honours Diplomas and MBAs

- * Business, Marketing, Finance, Personnel

For your FREE information book contact:
CAMBRIDGE INTERNATIONAL COLLEGE
 P O Box 53, Southampton, SO14 0YP, England, Britain.
 Fax: + 44 2380 337200
 Web: www.cambridgecollege.co.uk
 Email: info@cambridgetraining.com

Accredited British Training & Education registered with the National Training Council & Ministry of Labour of Papua New Guinea

Midia mas noken haitim rong bilong wanwok

SINGAUT i go long wok bilong nius long PNG long egensim pasin we wanpela bikman i bin stap insait long bagarapim laip bilong wanpela yangpela skul meri long las yia.

Long wankain taim tu, midia o ol nius kampani i kisim strongpela askim long wokim stretpela ripot na i noken haitim nem bilong dispela bikman husat i wokim pasin i no stret olgeta long sait bilong laip na raits bilong dispela yangpela skul meri.

Eksekutiv Opisa bilong Family & Sexual Violence Action Committee (FSVAC) Nick Menzies i autim ol dispela toktok bhainim stori i bin kamap long las mun long dai bilong wanpela yangpela Gret 10 skul meri bilong Gaire long Sentrel provins i kilim em yet long wanem famili bilong em i pusim em long maritim wanpela bikman.

Na FSVAC i painimaut save olsem dispela bikman i wok long midia o nius kampani.

Tripela midia kampani tasol em Wantok Niuspepa, Nau FM na FM100 i bin ranim stori tasol ol i no bin autim nem bilong bikman. Na tupela niuspepa em Post Courier na National i no bin putim stori long ol niuspepa bilong ol.

Askim we Mista Menzies i makim

FSVAC i putim em watpo na ol arapela nius midia i no putim stori?

Em i tok FSVAC i save olsem man i stap long namel bilong stori na as we yangpela skul meri i kilim em yet em bikos famili bilong em i pusim em long maritim dispela midia bikman tasol em i no laik.

FSVAC i tok ol stori long famili na seksual vailens long PNG i wok long bagarapim PNG sosaiti. Na ol i wok long kamap nogut na planti taim na olsem, nius midia i noken wokim hait pasin long taim em i wokim ripot long en. Taim ol ripot long ol dispela samting i kamap, ol ripot i no gutpela tumas, FSVAC i tok.

Mista Menzies i tok FSVAC i wok long traim daunim ol hevi na vailens long famili na

Em i askim wok bilong midia long autim ol samting i kamap stret na noken wokim karmap stori na haitim ol lain i mekim rong pasin.

"Midia i gat bikpela wok long autim i kam long ples klia ol hevi i sut long famili na seksual vailens. FSVAC i hop olsem Midia Kaunsol bai toktok gen long ol memba bilong em long wok bilong ol na wok ol i mas mekim long pipel bilong dispela kantri na we long wokim dispela em long givim fea, stretpela na trupela ripot

we i no wansait o haitim samting," Mista Menzies i tok.

Em i tok FSVAC i klia long man is tap insait long hevi na komiti i askim watpo ol i no tokautim nem bilong em long nius ripot.

Mista Menzies it ok, olsem wanpela bikman, FSVAC i bilip olsem pablik i gat rait long save long nem bilong dispela man.

"Taim midia i haitim nem bilong bikman, em (midia) i luk olsem em i laik lukautim wanpela woklain bilong em yet," Mista Menzies i tok.

Olsem na FSVAC i singaut long Media Kaunsol long egensim pasin we dispela midia man i mekim bikos em i wanpela bikman we planti lain i lukluk long em na em i piksa bilong ol nius lain na askim Kaunsol long lukluk gut long ripot na wokim samting long em.

Mista Menzies i tok FSVAC bai givim wanpela komplek pas i go long Independent Midia Stendets Komiti long autim belhevi bilong ol long dispela.

Mista Menzies i ting olsem ol dispela samting i kamap bai i olsem stia long glasim wok bilong yumi na egensim vailens na stretim ol long pasin bilong toktok na wok bung wantaim.

Peim sku fi na pikinini bai skul

...I kam long Pes 1

Edukesen Seketeri i toktok long dispela rot tu we ol papamama i gat mani hevi i ken wokim, tasol dispela i no wok gut. I kam inap long pinis bilong las yia, skul bilong mi i gat K56,000 skul fi dinau long ol papamama. Olsem na long dispela yia, ol sumatin i mas peim ful skul fi bipo ol i kam insait long klas," Julia Tatai em Het Mistres bilong Boreboa Pramerai skul long Nesenel Kapitela Distrik i tok.

Em i tok ol skul i mas gat mani long ron na ol papamama i mas peim skul fi. Gavman i givim helpim bilong em taim em i save peim ol skul fi subsidi.

Em i tok nogat samting i fri na wankain i go long skul we ol pikinini i mas peim long go insait.

Em i tok long dispela taim, ol Hai na Sekenderi skul wantaim tu ol Yunivesiti i laikim olgeta sumatin long peim ful skul fi bipo ol i go insait bikos ol i mas gat mani long karimaut gut ol wok bilong operetim o ranim ol skul. Sampela ol eria na wok we ol skul na projek fi mani i save lukautim em mentenens wok, ol wara, lait na telefon bil, peim ol kesuel woka na ol helpim tisa, pinis bilong yia greduesen, ol nupela skul projek na ol arapela samting

moa skul i laikim long en.

Em i tok moa olsem em i no fea long ol sumatin i peim ful skul fi na long olgeta yia, sampela i nogat.

Em i givim piksa long sumatin husat i wokim gut long skul na kisim gutpela ofa tasol em i no peim skul fi na dispela i no wokim gut na i no kisim spes long surikim skul tasol e mi peim ful skul fi. Long dispela keis, wanpela i kaikaim mani bilong narapela na em i no fea.

Misis Tatai i bin tokaut tu olsem ol famili insait long siti i mas tingting gut bipo ol i kisim ol arapela pikinini bilong ol hauslain i kam long ples bikos dispela tu i kamapim moa hevi long taim bilong peim skul fi.

Het mistres bilong Coronation Pramerai skul long NCD, Julia Ulitaia i tok ol sumatin i mas soim beng risit we ol i peim ful skul fi bipo skul i kisim ol i go insait.

Long Tunde, planti sumatin i no kamap yet long skul bikos ol papamama i wok long stretim yet ol skul fi.

Misis Ulitaia i tok long dispela wik, planti papamama i wok long go long skul long kisim ol sapot pas long kisim ol skul fi lon (dinau).

Em i tok em i lukim tasol long niuspepa toktok we Edukesen Seketeri Peter Baki i mekim long dispela wik long ol skul i no ken hat tumas na rausim ol pikinini husat i no peim skul fi, tasol wokim sampela; rot wantaim ol papamama na famili long rot bilong peimen fi.

Em i tok em i paul bikos DEB i givim

toksave long ful skul fi peimen na skul bilong em bai sanap strong long ol pikinini i peim ful skul fi na go insait long skul inap long em i kisim sekula o opisel leta long dispela.

Em i tok skul i gat skul fi dinau mani long ol papama yet long las yia

Olgeta skul insait long siti i bin kisim Sekula Namba 01/2004 dated 02/12/04 long Nesenel Kapitela Distrik Edukesen Bot we i bin tokaut long mak bilong ol skul fi long elementeri, Lowa na Apa Pramerai. Na em bin putim askim long ol papamama na sumatin "long peim ful skul fi bipo pikinini i go insait long skul".

Olgeta yia, ol papamama i wok long kisim strongpela askim long luksave long wok bilong ol na peim skul fi bilong ol pikinini.

Edukesen em i rait bilong ol pikinini tasol em i no wanpela fri samting. Papamama i mas peim fi long putim pikinini i go long skul.

Gavman i save givim helpim long skul bilong ol sumatin wantaim edukesen subsidi mani em save katim olgeta yia na peim long wan wan kwata olgeta yia. Na narapela wok em bilong papamama long peim hapmak bilong skul fi.

Tasol sampela skul i kisim ol pikinini i go insait maski ol i no stretim skul fi na wokim arenjmen wantaim ol papama long peim haf haf.

Dispela i wanpela bikpela hevi we ol i mas stretim hariap.

Helpim Esia

SAPOS yu laik givim liklik mani long halivim ol turangu i kisim bagarap, yu ken putim mani bilong yu i go long ol dispela ples:

PNG RED CROSS SOCIETY
 Akaun Nem: PNG Red Cross Society Asia
 Tsunami
 Benk/Akaun #/Brens: 6000 947 066, WESTPAC Waigani
 1001 035 135, BSP, Port Moresby
 Telepon namba: 325 8577 / 325 0617
 Kontak Manmeri: Jacqueline Boga (Secretary General PNGRCS), Vini Talai o Hilda Wayne

CARITAS PNG
 Akaun Nem: Southeast Asia Tsunami Appeal
 Benk/Akaun #/Brens: 717856801, WESTPAC, Waigani
 Telepon namba: 325 6255 / 325 6485
 Fax namba: 325 9626
 Kontak Manmeri: Raymond Ton (Deputy National Director, CPNG)



Bogenvil baundri wok go het

PAPUA Niugini Iektorel Komisn bai salim wanpela tim bilong opis bilong ol i go long Bogenvil long halivim Bogenvil Baundris Komisn long karimaut wapela wok glasim long olgeta Bogenvil Konstutuen Baundri long redi long namba wan ileksen bilong nupela Otonomas Bogenvil Gavman.

Iektorel Komisina Andrew Trawen i bin tokaut olsem dispela grup bai i gat ol mausman bilong Nesenel Mapping Buro, ol lain husat i save makim olgeta graun insait long kantri na Nesenel Statistikel Opis, ol lain husat i save kandim namba bilong olgeta manmeri insait long kantri.

Ol dispela opisa bai lusim Pot Mosbi tete na

bai ol i go raun lukim 12-pela distrik bilong Bogenvil wantaim ol iektorel opisa bilong Bogenvil yet we ol bai kisim tingting bilong ol manmeri. Namba wan ripot bilong em bai redi long mun Mas.

"Bogenvil pis proses i opim rot bilong Konstutuen Baundris Riviu long kamap na mi laik givim luksave long olgeta pati insait long dispela proses.

m i longwe yet long lukim kaikai bilong pis proses tasol mi gat bilip long komitmen bilong ol Bogenvil pipel long lukim kamap dispela samting. "Iektorel Komisn i amamas tasol long halivim bihainim tok promis bilong gavman long strongim pis proses na mi singaut

long olgeta manmeri long Bogenvil long wok bung wantaim Baundris Komisn bai dispela wok i ken bungim olgeta tingting bilong ol pipel," Mista Trawen i tok.

Em i tok Baundris Komisn em i wanpela indipenden bodi we i kamap aninit long Bogenvil Konstityusen o Mama Lo las yia na i no inap kisim hevi o painim birua long husat ausait lain. Em bai mekim wok bihainim ol gaitlain we Komisn yet i makim bilong Bogenvil.

Em i singaut long olgeta Bogenvil manmeri long luksave long taim na ples bilong ol miting na sindaun long en. Aweanes i kamap long Redio Bogenvil long riviu bilong konstutuen baundris riviu.



Redi long Indipendens...Long Iephan. Sir Mekere Morauta, David Basua, Sir William Skate na Sir Rabbie Namaliu long lons bilong PNG 30 yia Indipendens anivesari bes.

Foto: YAKAM KELO

Ol man i paul long wok bilong Australia polis

WANEM bai kamap long ol Tas Fos polis husat i save stap long Waigani polis stesin nau olsem ol Australia Asistin Polis (AAP) i kam nau long patrolim ol strit insait long Gerehu na Waigani.

Dispela em wanpela bikpela askim ol niusman long Mosbi i askim taim moa long 25-pela AAP i go wok long Waigani polis stesin long Mande long kamapim program ol i kolim 'sekta patrol'.

Royal Papua Niugini Constabulary (RPNGC) Asisten Komisina Tony Wagambie i tok olsem dispela 30 AAP polis manmeri i kam bilong halivim ol Polis manmeri long Waigani wokim wok patrol we nau ol i kolim 'sector patrol'.

"Ol AAP i kam em long halivim polis wok na i no bilong rausim ol Tas Fos polis bilong Waigani," Tony Wagambie i tok.

Aninit long Enhanced Cooperation Program (ECP) i gat 98 AAP polis opisa i stap long Port Moresby na 19-pela i stap long Bogenvil. Na klostu long 20-pela polis ka nau i stap long Mosbi siti.

Nau olsem klostu long 30 pela AAP polis opisa bai wok insait long Waigani na Gerehu eria ol Tas Fos we i save bes long Waigani bai wokim wanem bikos ol tu i save wok patrol raun long dispela ol hap.

Nau long Waigani polis stesin i gat 3-pela nupela polis patrol ka we ol AAP opisa wantaim ol PNG polis bai wok patrol long Waigani na Gerehu eria.

Narapela 31 polis opisa i wok wantaim Criminal Investigation Division (CID) na ol arapela polis dipatmen.

Komanda bilong ol AAP Barry Turner tu i singaut i go long komuniti insait long Waigani na Gerehu long wok gut wantaim ol polis long ol komuniti bilong ol.

"Plis yupela komuniti i mas sapatim dispela wok ol polis manmeri bilong Australia na PNG i wokim we bai kamapim gutpela komuniti nlesen namel long yupela yet," Komanda Barry Turner i tokim ol manmeri long Waigani taim ol i kam lukim ol polis bilong Australia.

Komanda Turner i tok tu olsem dispela program ol AAP polis wokim bilong halivim polis wok tasol na komand na kontrol bilong ol polis i stap yet wantaim RPNGC kominsina Sam Inguba.

Planti kainkain toktok i bin kamap long dispela wok bilong ol polis bilong Australia bipo ol i kam long PNG na nau moa toktok i wok long kamap.

Paol tingting i stap yet long wanem wok tru ol i kam long mekim.



WANPELA manki Wantok yet i bin kirap nogut olsem em i gat namba long kamap tisa tu ya. Em i bin traim aplai long tis long Sosol Sains long ol gred 10 long wanpela hai skul insait long Mosbi. Em i go na tisim tupela klas olgeta na givim long mak bilong save bilong em stret. Bihain long em i saikap na givim long klas em i guria wantaim na kamaut. Em i ting olsem em bai no inap long mekim, tasol ol sumatin i bihainim em i kamaut na sikanim em. Nau em i tingting planti long raitim nius na kamap tisa.

OL NUPELA bas pe insait long Mosbi yet i klostu kirapim bikpela birua namel long ol pasindia na boskru bilong ol PMV bas. Wanpela susa i stap long Gerehu long Mosbi siti i bin kalap long wanpela bas long moning na lukim boskru i belhat, pulim gras na kaikai tit wantaim taim em i lukim olsem ol manmeri i wok long givim 50 toea yet. Bas pe i go antap long 70 toea pinis. Atang yumi ol manmeri bilong pablik i mas tingting na bihainim dispela nupela bas pe mak, ah. Pasin bilong givim 40 toea tasol na tok em bilong go klostu tasol i mas pinis nau.

LUKSAVE tu i mas go long ol wantok bilong yumi i save werim blupela yunifom na wok bung wantaim ol wansolwara bilong yumi Australia i stap. Ol i wok long mekimsave long ol bas draiva i stap taim ol i no save pinisim gut ron bilong ol. Nekim ol. Lek bilong mipela i save tait wansait taim ol bas i save trautilim mipela long hap rot tasol. Bel i save hat na bas pe i save go ken long baim buai long sait bilong rot long kolim.

STORI long bas yet. Bikman long Wantok Niuspepa klostu givim bikpela amamas long wanpela boskru taim em i givim K20 na lusim tingting long kisim bek senis bilong em. Bihain nau em i suvim han long bak na painim mani bilong baim buai na i nogat. Asua... tasol laki tru na boskru i save liklik long em na long apinun em i kisim bek senis bilong em.

SKUL i stat long dispela wik na ol lain insait long ol Benk i no sot liklik. Ol papamama i wok long tuhat yet long baim skul fi. Wantok i go painim piksa bilong ol papamama long benk na lukim olsem olgeta manmeri i wok long holim ol skul fi diposit pepa i stap. Sampela i sanap long lain inap 4 o 5 aua olgeta. Yupela, bikpela wok tumas ya! Noken bagaramim ol pikinini bai ol i ken lukautim yupela long bihain taim long bekim hatwok bilong ol lek han bilong yupela.

GUT lak long husat ol man i bin brukim BSP brens long Kiunga na stilim olgeta koins bilong ol. Nau ol manmeri long Kiunga i putim was long husat man i laik go raun painim katen bia wantaim ol koins tasol. Ol i tok olsem ol dispela lain i bin brukim windua bilong toilet i go insait tasol ol i kisim taim long opim seif bilong benk na tekov wantaim ol koins tasol. Putim was long ol dispela lain. Sapos yu lukim ol, toksave long polis long Kiunga.

Mi bos yet - O'Neill

LIDA bilong Oposisen na memba bilong lalibu-Pangia, Peter O'Neill i mekim strongpela toktok long dispela wik olsem em i holim yet opis bilong Lida bilong Oposisen.

Mista O'Neill i mekim dispela toktok bihain long planti paul toktok i bin kamap namel ol memba bilong palamen.

Ol dispela paul toktok i sut long Mista O'Neill i wok long kamap long ol poto long niuspepa wantaim Praim Minista Sir Michael Somare. "Long tingting bilong mi, i nogat wanpela samting i paul taim ol PNG lida long politiks i raun wantaim o toktok wantaim long ol bikpela samting bilong kantri. "Olsem Oposisen Lida, mi bai laik toktok wantaim lida bilong gavman na em bai laik toktok wantaim mi long ol bikpela samting insait long kantri.

Dispela em i pasin bilong wok bung na

paitim toktok. Mi kirap nogut long ol paul sut toktok i kamap taim mi sanap wantaim praim minista long bikpela samting olsem fan resing bilong helpim ol turangu manmeri i kisim bagarap long bikpela sunami long Saut Is Esia. Ispela samting i singaut long wanpela nesenel luksave olsem na mipela i sanap wantaim," Mista O'Neill i tok.

Em i tok em i no wanbel olsem dispela samting tasol i kamapim kainkain ol paul tingting namel long sampela lida. Mista O'Neill i singaut long ol lain husat i wok long sutim toktok nabaut long lusim em mekim wok bilong em olsem Oposisen Lida.

Ol sut toktok i kamap bihain long sampela toktok i kamap long niuspepa olsem gavman i wok long lukluk long bung wantaim sampela pati insait long oposisen long kamapim wan pati gavman.

DESK & POCKET CALCULATORS

From **K13²⁰** ea

EXERCISE BOOKS
(Biggest Range in Town)

From **66^t** ea

SCHOOL BAGS
(Assorted Colours & Styles)

From **K22⁰⁰** ea

BACK TO SCHOOL

THEODIST LTD PORT MORESBY & LAE

THE STATIONERY SUPERMARKET

(All Prices includes GST)

Hap Hap Nius

Brown givim somil

Minista bilong Pablik Sevis na Mema bilong Gazelle, Sinai Brown i givim K8,800 long Toma/Vunadidir LLG long baim wanpela wokabaut somil. Dispela mani i kam long diskresinari mani bilong Mema yet. Presiden bilong Toma/Vunadidir LLG na Siaman bilong Woks, David Piamia i givim bikpela tok amamas long memba na tok dispela wokabaut somil bai halivim tru LLG long kamapim sampela ol prosek bilong en long dispela yia.

Kopra fama autim belhevi

Wanpela kopra fama long Duke of York ailan insait long Is Nu Briten i autim bel hevi bilong em long Siaman bilong Milamila Katolik Paris, Paul Matavo husat i bin mekim sampela toktok i no laikim wanpela kampani long Kokopo long opim narapela kopra depo long ailan. Mesikaram Aron i tok i mas i gat gutpela kompetisen o wok bisnis namel long ol bisnis na ol fama tu i mas gat rait long salim kopra bilong ol long husat bisnisman ol i gat laik long en, we i givim o i gat gutpela prais. Mista Matavo i bin askim presiden bilong Duke Ov Yok LLG Isaac Ilong long tok klia long pipel sapos kampani Tok Didiman Sevises i gat tok orait long opim depo.

- Sua Kilis

Is Nu Briten provins laikim gat wanpela moa ilektoret

Sua Kilis i raitim

IS NU BRITEN provins i laikim wanpela nupela ilektoret moa.

Nau yet provins i gat 4-pela open ilektoret na wanpela Rijinol ilektoret.

Nupela Provinsel Iektorel Menesa, Abraham Wari i tok diriman bilong provins long kamapim nupela bai klostu long kamapim tru taim Iektorel Baundris Komisni i kam raun long kisim tingting na laik bilong ol pipel long mas 17 i go inap Mas 23.

Dispela lukluk raun bilong komisni em i hap bilong lukluk raun na skelim tingting bilong pipel long kantri olgeta. Komisni Siaman husat tu i Sif Iektorel Komisina Andrew Trawen, namba tu

bilong em na 7-pela sinia opisa i stap long dispela tim bilong mekim lukluk raun.

Komisni bai holim namba wan miting bilong en long Malaguna Teknikel Kolis na bihain long Gelagela Risetelmen long Fraide, bihain Warangoi na Vunapope long Sarere.

Long Mande tim bai flai long helikopta i go long Lassul Bei Stesen na kam bek gen long Kerevat na holim narapela kivung long Gazelle Distrik opis.

Long Trinde Komisni bai go long kavieng, Nu Ailan provins, bihain long kibung long Palmalmal, Pomio Distrik long Tunde.

Mista Wari i tok dispela em i sans bilong ol pipel bilong Is Nu Briten long tokaut long tingting na laik bilong ol long kamapim nupela ilektoret.

Tasol pipel i mas soim komisni olsem ol i gat namba bilong ol manmeri, ol rot, skul, et pos na ol arapela sevises we i ken halivim ol long kamapim nupela ilektoret.

Komisni bai mekim wanpela ripot bihain long lukluk raun bilong en na givim i go long Palamen long lukluk long en tu.

Aninit long lo, Palamen i mas sindaun tripela taim long paitim toktok long dispela ripot bihain em i ken oraitim long kamapim nupela ol ilektoret baundri.

Mista Wari i kisim wok olsem nupela Provinsel Iektorel Menesa long Is Nu Briten long dispela yia tasol senisim Mista Tiane Openakali husat nau i stap long hetkwota bilong Iektorel Baundris Komisni long Pot Mosbi.

Hul long maunten kamap bisnis opis

Sua Kilis i raitim

DANIEL Otte em i wanpela infomal bisnisman long Kokopo, Is Nu Briten provins.

Em bilong Raikos long Madang provins na em i gat bisnis bilong stretim ol han was.

Tasol em i wokim bisis long wanpela hap we planti manmeri i no ting olsem man bai i mekim bisnis long en - insait tru long wanpela hul arere long maunten we NBC tawa i sanap long en long Kokopo.

Otte i bin digim hul - samting olsem 5 mita i go insait long sait bilong maunten na mekim kamap olsem haus bilong em long stap wok ol han was.

Long planti pipel husat i no save hul hia i luk olsem wanpela hap bilong ol man long kisim malolo tasol.

Tasol long Otte na ol kastoma bilong em, em i bisnis senta bilong ol.

Otte i tok em i save kisim planti kastoma na em i amamas tasol taim Wantok Niuspepa i bungim em.

Em i tok em i amamas olsem gavman nau i givim luksave long ol infomal bisnis sekta tasol em tok gavman i mas wokim ol hap we ol lain olsem em i ken yusim long ronim bisnis long en.

Long narapela stori O Lokel Level Gavman wod insait long Raluana lokol level gavman nau i gat moni long opim ol benk akaun we ol mani bilong kamapim ol prosek bai i go long en.

8-pela wod long Raluana LLG i kisim K16,000 olgeta i kam long memba bilong Gazelle na Minista bilong Pablik Sevis, Sinai Brown long Fraide long wik i go pinis.

Wanwan LLG bai kisim K2,000.

Sharp givim tingting long lukaut long solwara



• Hevi bilong lus long solwara long taim nogut i go bikpela long NGI. FAIL POTO

PAPA bilong Rabaul Shipping Kampani, Peter Sharp i tok i gat wanpela gutpela we i kostim liklik mani long halivim ol liklik bot o dingi na sevim laip bilong ol, em long ol papa bilong ol liklik bot long gat samting ol i save kolim 'imejensi posisen indiketing redio biken' (EPIRB).

Mista Sharp i tok dispela EPIRB i ken givim posisen o hap we ol bot i bungim birua long em we bai halivim i ken o hariap tasol.

Mista Sharp i mekim dispela tok bihain long ol papa bilong ol

dingi i singaut long provinsel gavman long Is Nu Briten na Nu Ailan long baim reskiu bot long patrol raun long solwara namel long tupela provins long sevim laip.

Mista Sharp i tok reskiu bot o patrol bot i dia tumas.

Em i tok EPIRB bai kostim liklik moni long putim long ol dingi na em bai amamas tasol long wok wantaim provinsel gavman sapos ol i laikim tingting bilong em.

Em i tok tu, lukluk long mani ol i tromoi long painim ol man i lus

long solwara na ol dai i kamap, provinsel i mas lukluk strong long givim ol dispela EPIRB long olgeta bot i save karim pasindia.

Mista Sharp i tok wanpela we long save long husat i gat bot em long ol kampani husat i save salim ol bot long toksave long provinsel gavman.

Em tok olsem ol bot we i save karim pasindia i mas gat ol sefti gia olsem laip jeket, fle na EPIRB.

- Sua Kilis



Iektorel baundri wok painimaut go het nau

PROVINSSEL Iektorel Menesa long Is Nu Briten Provins, Abraham Wari i tok ol ilektoret baundri long kantri olgeta i olpela na i mas i gat riviu nau yet.

Long wanpela toktok em i mekim long redio Is Nu Briten 'tokso' i no bin gat riviu long ol ilektoret baundri long olgeta 5-pela yia stat long 1977 olsem lo i tok.

Em i tok dispela lukluk raun bilong Iektorel Baundris Komisni long mun Mas i mas kamap long taim bipo yet na wanem tingting bilong ol pipel Komisni i kamap wantaim em Palamen i mas oraitim tasol.

Gavana bilong Is Nu Briten, Leo Dion i bin kamapim toktok long dispela long Palamen planti taim, bihain long ol Baining i bin singaut na tokaut long laik bilong ol long kamapim ilektoret bilong ol yet.

Mista Wari i tok planti memba long Palamen i no bin laikim ol tingting long kamapim ol nupela baundri bikos ol i pret long lusim ol vota bilong ol.

Mista Dion tu i welkamim visit bilong Iektorel Komisni na tok tu olsem em i ovadiu olgeta. Em i tok amamas olsem singaut bilong em nau i karim kaikai.

Em i askim pipel long bungim Komisni na autim tingting na laik bilong ol.

Em i tok moa olsem em bai sapatim tingting long kamapim nupela ilektoret insait long provins.

Riviu o lukluk gen i mas kamap nogat bai ol manmeri na ol atoriti i no inap save long wanem hap stret ol ilektoret i stap long en. Na dispela bai kirapim kainkain narapela kain hevi gen. - Sua Kilis

Skul fi skolasip paulim planti manmeri

SKUL fi helpim o skolasip bilong Morobe Provinsel Gavman i go long ol pikinini Morobe husat bai i go long ol yunivesiti na Balob Tisa Koles long Lae i kamapim bikpela paul tingting long planti papamama bilong Morobe provins.

Opis bilong Gavana Luther Wenge i tokaut olsem dispela skolasip we Provinsel Gavman i bin kamapim long las yia 2004 i bilong helpim ol Morobe pikinini husat i go long yunivesiti na Balob tisa koles. Long Balob em bilong ol pikinini i kam long ol bikbus na longwe ples olsem Teptep, Menyamy, Garaina bus, Waria na ol kain bikbus ples olsem.

Tasol nau sampela papamama i tok ol tu mas kisim dispela skul fi helpim bilong ol pikinini bilong ol.

Tasol opis bilong Gavana i tok dispela skolasip i no bilong ol pikinini husat i go long ol teknike koles o arapela koles o trening skul, nogat.

Olpele mema bilong Bulolo Samson Napo i autim bel hevi bilong em tu olsem dispela skolasip em i bilong givim sapot long Morobe Gavana Luther Wenge long 2007 nesenel ileksen tasol.

Sapos dispela em helpim bilong Morobe Gavman i go long ol pipel bilong Morobe, orait em i mas givim tu long ol pikinini Morobe husat i stap

long arapela provins na go long yunivesiti bikos em ol blut Morobe stret, Mista Napo i tok.

Em i tok dispela skolasip i soim olsem Gavana i laik kisim sapot bilong ol yunivesiti studens long sapotim em long iteksen we ol papamama na famili bai sanap wantaim na sapotim long 2007.

Tasol opis bilong Gavana Wenge i tok dispela skolasip em bilong ol pikinini Morobe long Morobe provins tasol.

Dispela skolasip progem i bin stat las yia taim Gavana Wenge i bin tokim ol student bilong yunivesiti long 2002 olsem em bai kamapim dispela

skolasip long 2004 we em i bin kamap.

Long nau yet opis bilong Gavana i wok long traim mekim klia long dispela skolasip program bilong ol long ol papamama bilong Morobe provins.

I gat luksave olsem dispela bilong mekim klia long ol papamama i no bin go aut gut long Morobe edministren olsem na nau ol papamama i kamap mekim kainkain askim long dispela skolasip bilong skul fi.

Wantok i laik kisim toktok bilong Edministreta tasol em i no bekim taim Wantok i lusim toksave long opis bilong em long Trinde aste. Nau yet planti papamama i painim hat.

Enga Provinsel Gavman i givim K20,000 long Manam

ENGA Gavana Peter Ipatas makim maus bilong ol pipel bilong Enga na provinsol gavman i givim K20,000 i go long ol pipel long Manam ailan long las wik.

Dispela mani em Gavana Ipatas i givim i go long han bilong Madang Rijinol MP na Minista bilong Inta Gavman Rilesens Minista Sir Peter Barter.

Mista Ipatas i tok ol pipel bilong Enga provins i save kisim hat taim tu long ol hevi olsem drai na ais i kukim graun na ol kaikai long gaden.

Na ol i save amamas long Gavman na ol pipel bilong Papua Niugini i save givim helpim long kaikai na kago na mani.


Olsem na ol tu i mas givim wankain helpim i go bek long ol pipel bilong Papua Niugini husat tu i bungim hevi long laip na sindaun bilong ol long kain bikpela bagarap olsem maunten paia bilong volkenu.

Mista Ipatas i tok dispela mani ol i givim i go long han bilong Provinsal Disasta opis long karimaut wok bilong helpim ol pipel long Manam ailan husat nau i stap long Bogia bikples bikos ples i bagarap pinis long maunten paia.

Minista Sir Peter Barter husat tu i go pas long kain bagarap olsem long kantri i tok bikpela amamas long helpim bilong Enga provins na ol bai yusim dispela mani long traim wokim sampela klasrum bilong ol pikinini i sindaun long en na skul.

Sir Peter i tok nau yet i gat hatpela taim long ol pikinini i kisim gutpela skul na planti bai skul aninit long as bilong mango pastaim.

Long sait bilong skul Sir Peter i tok olgeta pikinini husat i skul long arapela skul insait long Madang provins o arapela skul ausait bai kisim skul fri we gavman bai lukluk long dispela.



• Mista Ipatas (lephan) i givim K20,000 sek mani i go long Minista bilong Sir Peter (rait).

Poto: YAKAM KELO

Bihain long dispela hevi i kamap ol pipel long Manam ailan bihainim askim bilong nesenel gavman i lusim ples bilong ol na go stap long ol wan-

wan hap bilong bikples Bogia olsem Postdam, Magem na Asuramba.

Tasol maski ol i go long bikples hevi i stap yet long ol long kaikai, wara,

klos na long we bilong mekim mani.

Singaut nau i go long olgeta manmeri long kantri sapos ol i ken helpim ol pipel long Manam ol i mas.

Moa hevi i kamap long ol kea senta long Bogia

MOA long 12,000 manmeri long Manam i kisim bikpela taim long las wik Fonde taim maunten i paia gen.

Samting olsem 2,000 manmeri i lusim Manam ailan na i go stap nau long Bogia kea senta wantaim ol arapela 10,000 husat i bin lusim ailan na i go long Bogia long las yia taim maunten i bin paia.

Minista bilong Inta Gavman Rilesens Sir Peter Barter i tokaut olsem dispela i kamapim bikpela hevi moa bikos ol i nogat sel bilong taitim ol haus sel, nogat gutpela wara na ol

samting bilong sapotim ol dispela ekstra manmeri husat i kamap long Bogia long las wik.

Tasol wanpela bikpela hevi we i stap yet em graun we ol manmeri i ken sindaun na wokim gaden long en.

Sir Peter Barter i tok gavman i wok long toktok yet long stretim dispela hevi bilong graun bikos ol i laikim bai ol pipel i mas mekim gaden long sapotim ol yet long wanem ol saplai ol pipel i wok long kisim i wok long kos bikpela mani tru. Samting olsem

K2 milien em ol i lusim pinis na moa yet bai gavman i wok long lusim bikpela mani yet inap ol pipel i ken mekim gasden bilong sapotim ol yet tu.

Sir Peter i tok wanpela hap graun we gavman i gat nem long en em ol i wok long stretim toktok yet long em bikos i no longtaim bai gavman tis bai pinis na ol asples Bogia i putim ai long kisim bek graun bilong ol. Sapos ol i ken stretim toktok na kisim dispela graun yet bai ol i ken stretim sindaun bilong ol pipel bilong Manam long en.

Nau yet Minista bilong graun (Lens) Dokta Puka Temu i bin raun i go pinis long Bogia na lukluk insait pinis long dispela hevi.

Sir Peter i tok tu olsem em i tru i bin gat pait namel long ol asples na tripela wokman bilong gavman husat i stap insait long wok bilong skelim ol kaikai na ol kago long ol asples.

Sir Peter i tok tripela man ya i go insait long sel tasol em yet i bin peim sel bilong ol na ol i kamaut pinis. Em samting bilong kot long lukluk insait na stretim, em i tok.

Hap Hap Nius

Fisamen i no wanbel long ESP pis projek

Taim Gavman i wok long pusim wok bilong kamapim fis prosesing pten long Is Sepik provins, lokol fisamen na papa bilong ol risos i pilim olsem ol i stap ausait long dispela bisnis gavman i laik kamapim. Is Sepik Fiseris Asosiesen Inc (ESFA) presiden Paul Simbago i tok ol i welkam long namba tu fis projek insait long provins we Thailand Off-shore Masters (PNG) Ltd bai go pas long en, ol i pret nogut ol bai stap ausait gen olsem long namba wan bisnis em South Seas Tuna (SST) loining dil. ESFA i gat 70 rejista fising grup insait long provins wantaim samting olsem 7000 wanwan memba long ol distrik olsem Ambunti, Angoram, Wewak na Maprik. Ol i rejista wantaim Investment Promotion Authority (IPA) na Trade and Industry Cooperative Society (TICS). Long dispela wik Minista bilong Fiseris Ben Semri i tokaut long hariap long kamapim dispeia K70 milien of so Masters vensa we Is Sepik Provinsal Gavman i givim graun bilong dispela wok tasol em i no save long kampani i gat tingting long kisim moa graun. Insait long SST projek ol papa bilong risos i no stap insait long wanpela spin op bisnis olsem liklik na ol i laikim gen.

Is Sepik polis holim pasim kalabusman

Polis long Is Sepik provins i holim pinis wanpela biknem kalabusman husat i bin ronawe long Boram haus kalabus long las yia. Narpela kalabusman husat tu i bin ronawe long las yia i kam bek bihain long em i givim em yet long han bilong lo. Damien Tom husat i gat 24 krismas bilong Maprik i bin kisim laip yia sas long haus kalabus long sas bilong reip na kilim man taim em i ronawe long banis. Dispela i bin namba tri taim em i bin ronawe long banis kalabus. Ol i holim em long Sambi Leik insait long wanpela opere-sen. Vincent Meussuom i bin givim em yet long han bilong polis.

Hap Hap Nius

Simbu Gavman givim K200,000 long subsidi

Simbu Provinsel Gavman i putim pinis K200,000 long helpim gred 7 na 12 sumatin we bai go skul long sekenderi na hai skul insait long provins long dispela yia. Provinsel Edukesen Siaman Tony Tapi i tok provinsel gavman bai halpim papamama na sumatin long peim 50 pesen (%) bilong ol fi na we skul i askim long em. Simbu Provinsel Gavana Peter Lauma i bin givim dispela sek mani i go long ol papamama na sumatin insait long provins olsem wanpela bikpela wok bilong em. Planti papamama i bin amamas wantaim provinsel gavman long dispela helpim we i long dispela taim we prais bilong ol samtin i bikpela moa yet. Planti bilong ol papamama i wok long painim hat tru long peim skul fi bilong ol sumatin long dispela taim na dispela subsidi bai helpim hevi bilong ol liklik. Dispela subsidi em i bilong helpim ol sekenderi na hai skul tasol na i no bilong helpim ol sumatin we bai i go skul long yunivesiti na kolis nabaut. Mista Tapi i tok tu olsem ol tisa tu i mas mekim wok bilong ol stret bikos provinsel gavman i wok long soim bikpela helpim bilong em i go long edukesen.

Kundiawa Ples Balus i no pas

Civil Aviation Atoriti (CAA) i tokaut olsem ples balus long Kundiawa Simbu Provins i no stop o pas yet na ol balus i ken go pundaun long em. Long sampela ripot i kamap long ol media, ol i tok Air Niugini i saspemim ol DASH 8 ron bilong balus i go long Kundiawa i no tru. Sief Eksekutiv ofisa bilong CCA Andrew Ogil i tokaut olsem kain toktok bilong ol Airlines i stopim ron bilong ol i go long sampela ples balus bikos ol i pilim i no gutpela long bisnis bilong ol i kamap klia long ol CCA long stretim. Ol CAA i tok olsem ol bai stretim dispela hevi na Air Niugini i ken mekim ron bilong em i go bek long Kundiawa ples balus.

Kainantu helpim ol Esia

Maisan Pahun i raitim

PLANTI manmeri insait long Kainantu eria i soim sore bilong ol i go long lain i kisim bagarap long Esia na givim mak mani olsem K6,700 wantaim ol kolos, kago na kaikai we bai i go long helpim ol lain Esia na Manam Ailan long Madang provins. Long ol klos, kago na kaikai olsem kabis, kaukau na kumu nambaut ol i bungim i go na inap long tupela traipela ka i karim i go long Madang. Joe Boas husat i go pas long dispela na Siaman bilong dispela apil i bin wok strong tru wantaim ol Kainantu ol sios grup na hai skul sumatin long Kainantu long kamapim bikpela kempen insait long taun we i lukim ol kainkain helpim i kam long

Aiyura, Yonki na ol ples klostu long Kainantu. Dispela K6,700 ol i bungim wantaim em ol i bai salim i go insait long Red Cross Papua Niugini we Red Cross PNG bai salim i go long mama oge-naisesen bilong ol long helpim ol lain i kisim bagarap long Esia. Mema bilong Kainantu, Yuntuvi Bao, i bin givim K2,000 na ol PNG pawa wokman long Yonki i bin givim K2,000. Ol kopi rises institut long Aiyura tu i bin givim helpim mani tu long dispela Manam na Esia Sunami apil. Kainantu Inta sios ektiviti kodineta Lina Bebes husat i stap insait long dispela komiti long helpim ol lain Esia na Manam i tok olsem. "Planti toktok i save raun nambaut olsem Kainantu taun em wan-

pela kauboi taun tasol tru tru mipela em ol gutpela lain tu i stap we mipela i sori long ol lain i kisim bagarap na mipela laik helpim ol." Lina Bebes tu i tok olsem sapos kain hevi i kamap long Kainantu bai ol narapela lain bai i halpim ol olsem na nau ol tu i mas soim gutpela pasin. Ol sumatin tu long Kainantu hai skul i bin halivim dispela apil long helpim ol i lain i kisim bagarap wantaim ol musik instramen bilong ol taim ol wantaim ol komiti bilong Manam Esia Sunami apil i holim kempen long Kainantu taun. Ol Esia komyuniti long Kainantu tu i bin halivim dispela Esia apil, stua olsem Papindo na Satis i bin givim sampela mani na kago helpim tu.

ADB na Starbucks amamas long Sihereni Kopi projek



• Mista Moles (namba tu sanap long lephan) na famili bilong em i lukim ol lain long Sihereni i stretim ol kopi bin. Foto: JAMES KILA

James Kila i raitim

WANPELA kopi projek long rurel eria long apa-Asaro eria long Dauilo distrik, Isten Hailans provins i binim tru lewa bilong ol intanesinel oge-naisesen bihain long lukluk raun bilong ol i go long dispela projek las wik. Las wik tasol wanpela dairekta bilong Starbucks Kopi bilong kantri Switzerland long Yurop i bin raun i go long Sihereni kopi projek long Asaro na i bin tok amamas tru long gutpela kwaliti kopi dispela plentesen i save kamapim. Dispela man Christopher Jordan i bin raun i kam long PNG bihain long em i teistim gutpela kwaliti kopi bilong Sihereni long Asaro na tu Kigibah Estet long Whagi Veli long Western Hailans. Starbucks em wanpela intanesenel kampani we i gat 8,000 kopi sop insait long wol. Ol i save kisim ol kofi long ol liklik develop-

ing kantri na wokim kopi na salim long ol kastoma bilong ol long ol stua bilong ol i stap long olgeta hap bilong Yurop, Ingran, Japan na tu long Amerika. Mista Jordan i stori olsem Starbucks i bin kisim kopi i kam long PNG inap 10-yia olgeta. Tasol em i tok tupela kopi we i winim tru lewa bilong ol em kopi bilong Sihereni na Kigibah estet. Kwaliti bilong ol dispela kopi em i antap tru. Bihain long dispela lukluk raun bilong ol lain long Starbucks i lukim gen wanpela sinia opisel bilong Esian Developmen Benk long PNG aninit long Nuclius Agro Entaprais i bin raun i go long Sihereni kopi projek. Dispela raun bilong Mista Moles i go long Sihereni Kopi Projek em i bihainim wanpela aplikesen long helpim dispela plentesen long kamapim wanpela kopi wet-fektori bilong em long prosesim ol seri. ADB bai helpim long kirapim

dispela wet-fektori we mani mak bilong en i moa long K560,000 insait long wanpela paitot projek ADB bai lukluk long sapatim. Sampela hap mani long dispela wok em Sihereni projek yet bai kamapim. Mista Moles i bin raun i go long Sihereni wantaim famili bilong em. Meri bilong em Jojo na pikinini man Robin na ol pikinini meri bilong em i amamas tru long dispela raun bilong ol i go long Sihereni long Asaro. Dispela Sihereni Kopi Projek em wanpela model kopi plentesen projek insait long PNG. Pastaim tru dispela plentesen i bin bagarap tru tasol wanpela strongpela Kristen brata David Oromarie i bin bungim ol lain bilong em long ples na ol i wanbel na wok strong tru na kirapim gen dispela plentesen. Nau yet Sihereni i kamapim gutpela kwaliti kopi we em i salim long maket bilong em yet long ovasis.

Planti grup paitim sik AIDS long WHP

Maisan Pahun i raitim

PLANTI grup na komiti i wok long kamapim kempen na aweanes bilong HIV/AIDS insait long Westen Hailans Provins (WHP). Long ol toktok i kam long WHP Provinsel AIDS komiti, planti grup bilong ol mama na ol pipel insait long wanwan ilektoret i wok long karimaut kempen na aweanes long paitim dispela sik nogut. Na tu i gat toktok olsem wanpela grup bilong ol lain husat i gat dispela sik AIDS bai kamap we ol tu bai toktok long helpim stopim dispela sik nogut. Long las mun WHP AIDS komiti wantaim sapat i kam long AusAID wanpela traime aut plen i bin kamap long statim 'High Risk Setting' (HRS) komiti. Dispela komiti em i bilong trening ol volunta na ol kaunsela husat i save wok wantaim ol lain i gat sik AIDS. Sapos dispela komiti i kamapim progrem bilong em, bai ol i trenim ol volunta na kaunsela long go wokim aweanes long ol taget grup. Ol taget grup insait long provins em ol spak lain na ol lain bilong kisim spak brus, ol haive draiva na ol buai maket lain. Ol drag na spak lain em ol lain we i save kisim planti mariwana na bia na i gat planti sans long kisim dispela sik HIV AIDS. Ol traking grup em ol draiva bilong ol ka na haiwe we i save ron i go i kam long hailans haiwe. Na ol buai sela tu em ol lain we i save raun tumas long wokim bisnis bilong ol. Dispela 3-pela grup em dispela HRS komiti i tok long wokim kempen namel long ol bihain long Nesene! AIDS Kaunsel i tok orait wantaim AusAID. AIDS kaunsela wantaim ol WHP AIDS komiti Agnes Goi i tok tu olsem dispela projek em i nambawan insait long kantri bikos namba bilong ol lain i gat sik AIDS insait WHP i wok long go antap. "Sapos HRS progrem i go orait ol komiti bai trenim ol treina long go aut long ol taget grup na wokim kempen na aweanes," Agnes i tok. Mis Goi tu i tok olsem nau yet long provins planti grup i wok long kamapim kempen na woksop long stopim dispela sik nogut bikos ol i lukim olsem sik AIDS i wok long go bikpela moa yet. "Nau yet mipela i gat planti grup tru insait long ol wanwan 8-pela distik na tu toktok i kamap olsem ol lain i gat sik AIDS i laik statim wanpela grup long paitim dispela sik nogut," Mis Goi i tok. WHP i gat wanpela kea senta bilong ol lain i gat sik AIDS. Dispela kea senta em 'Shalom Care Centre' na Sista Rose Bernard i save lukautim. Long dispela senta Sista Bernard i save givim kaunseling na edvais i go long ol lain i kam lukim em. Sik AIDS i wok long kamap wanpela bikpela hevi insait long kantri na kain wok olsem long stopim o daunim i gutpela. Planti toksave i go aut pinis long ol pipel long dispela birua, tasol i gat moa pipel yet husat i mas save gut long wanem dispela sik i ken mekim insait long laip bilong ol sapos ol, o wanpela ol i save long en i kisim. Gutpela olsem kain wok bilong toksave na daunim i wok long kamap nau bikos sapos nogat, long bihain taim, planti pipel bai kisim dispela sik bikos ol i no save.

GG prea wantaim ol pipel

Joe Ivaharia i raitim

EM i bin mekim histori we ol manmeri long Tatana viles insait long Motu Koita eben LLG eria long Nesenel Kapitol Distrik bai i no inap lus tingting. Ol i save harim na lukim nem bilong ol Gavana Jenerol insait long ol niuspepa na radio.

Tasol long las wik Sande em ol i lukim stret long ai bilong ol husat em i Sir Paulias taim em i mekim wokabaut bilong em long peles bilong ol.

Long wanpela welkam toktok Tatana viles kaunselua Opao Udia i bin tok "Sir, Mipela ino kirap nogut

long lukim yu lusim opis bilong yu na i kam daun long peles bilong mipela long wanem mipela i save olsem yu save mangalim tru ol pipel long grasrut level we sampela ol pipel i save bihainim ol gutpela toktok na edvais bilong yu long lukautim na stretim laip bilong ol long tude".

Sir Paulias i bin go long Tatana viles we em i bin misa wantaim ol long tokel haus lotu bilong yunaitet sios long ples.

Ol viles pipel i bin amamas tru long lukim bikman i kam na lotu wantaim ol we planti bilong ol i tok em GG i truru lida bilong ol liklik pipel.

"Dispela kain wokabaut bilong yu i soim piksa olsem opis bilong gavana jenerol i no bilong ol impotent man o bikman. Nogat opis tu em bilong ol liklik pipel tu olsem na mipela i amamas long luk-save bilong opis bilong gavana jenerol i kam long viles bilong mipela", kaunselua Udia i tok.

Opis bilong Gavana Jenerel i wok long kamapim dispela visitesen program we Sir Paulias i bin laikim long kamap we em i save go stap wantaim ol pipela long wanwan wiken long ol viles insait long Nesenel Kapitel na tu long ol viles long sentrol provins sapos em i gat taim long mekim.

Hap Hap Nius

Haiveta statim wok long kirapim bek provins

"Bipo long wanpela projek i laik kamap olgeta wok long plen na kisim ol rait infomesen i mas stap pastaim". Dispela em toktok bilong gavana bilong Galp Chris Haiveta taim em i bin givim wanpela sek man mak olsem K40,000 igo long Software Alliance Ltd, wanpela ovasis kampani bilong Malaysia. Long taim bilong mekim presentesen Gavana Haiveta i bin tok olsem planti ol infomesen ol wokman olsem plenas na menesas long Provinsel hetkwata na ol distrik na lokel level gavman i save yusim em bilong bipo tru na i no stap klia long dispela taim.

Agrimen i gutpela

Bikos i nogat kain ol stretpela infomesen long yusim olgeta plen bilong kirapim na developim provins i save kamap long wanwan taim tasol, Gavana Haiveta i tok. Nau wantaim dispela agrimen wantaim Software Alliance kampani, dispela K40,000 em i hap peimen (50%) long olgeta kos bilong dispela projek we i sanap olsem K80,000. Dispela projek bai i stap long tripela stes we nau em i namba wan stes we Provinsel Eksekutiv Kaunsel i bin givim tok orait long las yia.

Wollom sanapim ol wara tenk long ilektoret bilong em



• Mista Bonga (rait) i givim sek mani i go long Mista Fox (lephan). Mista Wollom sanap klostu long Mista Fox.

10-PELA wara tenk bai i sanap insait long wanwan hap bilong Mosbi Not Is elektoret long givim klinpela wara bilong dring, kuk na waswas igo long ol pipel.

Dispela i kamap bihain long Memba bilong Not Is elektoret Casper Wollom long las wik i bin mekim wanpela donesen sek mani mak olsem K160,000 igo long wanpela kampani Southern Cross Pumps na Irrigation Ltd long sanapim dispela ol wara tenk.

Long taim bilong givim sek mani igo long han bilong siaman bilong Eda Ranu Timothy Bonga i givim go long han bilong operesen menesa Richard Fox mista Wollom i tok Southern Cross bai bildim ol 26,000 lita tenk long wanwan hap eria bilong elektoret na em i wok bilong Eda

Ranu long pulapim wantaim wara na we i nogat ol paip na tep bai ol i konektim o putim dispela ol samting.

Wollom i tok tu olsem dispela ol tenk bai kampani i mekim long ol kapa ain.

Siaman bilong Eda Ranu Timothy Bonga i tok tenkyu na amamas long memba Wollom long dispela servis em i mekim igo long ol pipel long elektoret bilong em we dispela i wanpela elektoret i save givim planti het pen long ol memba bipo.

Em i tok tu olsem dispela ol nupela wara tenk bai i mekim wok kirap bilong mipela long Eda Ranu long sekim gut pasin ol komyuniti i save mekim long yusim wara we em i tok i gat planti ol iligol koneksen nabaut long planti hap bilong Mosbi siti.



Sekim...Yangpela meri bilong Tamariki Danis Grup i soim hula hula stail bilong em long helpim long resim mani bilong ol lain turangu i kisim bagarap long sunami long Saut Is Esia long wanpela konset long Mosbi las wiken. Foto: NEVILLE CHOI

PNG's Top Selling 4x4 Wagon

Land Cruiser

10 Seater 4x4 Troop Carrier

After Sales Backup

- Biggest Vehicle Parts Supply in country
- Largest Service Backup in PNG
- PNG's Only Quality Assured* Motor Dealer

Visit our Website: www.efamotors.com.pg

*QUALITY ASSURED AS/NZS ISO 9001 : 2000



EMB704

Ela Motors

TOYOTA TSUSHO (PNG) LTD

TOYOTA

✓ 15 BRANCHES NATIONWIDE ✓ 41 YEARS TOYOTA EXPERIENCE IN PNG ✓ TOYOTA HISTORY DURABILITY, RELIABILITY AND RESALE VALUE

Daunim hevi bilong bagarapim narapela insait long famili

TOKSAVE LONG DOMESTIK VAILENS I KAM LONG OL KATOLIK BISOP BILONG PAPUA NIUGINI NA SOLOMON AILANS

Mipela ol Katolik Bisop bilong Papua Niugini na Solomon Ailans i gat bikpela tingting na wari long hevi bilong domestik vailens i kamap insait long tupela kantri bilong yumi. Domestik vailens, em pasin bilong pait na bagarapim narapela insait long famili laip. Dispela hevi bilong domestik vailens i bikpela tru na planti famili wantaim ol wan wan manmeri i save bungim. Moa yet dispela hevi i save kam long ol meri na pikinini insait long famili taim papa i kros na belhat o spak.

Yumi save olsem, domestik vailens i save kamap long kain kain pipel; ol manmeri i gat bikpela save o edukesen, ol manmeri i holim bikpela wok, ol manmeri i gat planti mani samting, ol manmeri long bus ples tu. Hevi bilong domestik vailens i kamap long pipel bilong olgeta kain lotu na ol pipel bilong olgeta kantri na kaisa, maski wanem kala bilong skin bilong ol. Dispela pasin i save kamap long ol lida bilong ples na komyuniti na kantri tu.

Long dispela bikpela toktok ol Bisop i salim, mipela i laik tokaut tasol bikos dispela hevi i kamap bikpela moa yet nau. Mipela i tokaut tu long lukluk long painim olgeta rot bilong daunim na pinisim ol dispela hevi bai i no mas kamap gen, i go, i go gen. Rot na pasin bilong domestik vailens, paitim arapela, i kamap strong pinis insait long famili na i no isi long daunim na pinisim. Tasol long toktok, wantaim long bel isi na amamas na kamapim strongpela laip bilong famili bilong yumi, yumi mas painim olgeta rot bilong daunim na pinisim dispela hevi.

Long daunim olgeta hevi bilong domestik vailens, helpim i mas kam long ol arapela lain ausait long famili. Strongpela singaut bilong mekim dispela wok i go long ol lain

famili, ol pren, ol manmeri bilong sios na komyuniti. Pasin bilong les na sanap lukluk tasol i save mekim dispela ol hevi bilong kros na pait insait long famili i kamap bikpela moa. Planti pipel i laik sanap ausait na lukluk tasol na larim dispela hevi i bagarapim tru laip bilong ol arapela, papa na mama na pikinini long famili. Long strongpela tingting na pasin bilong lukautim ol arapela pipel, ol Kristen manmeri i mas sanap pas wantaim long daunim dispela hevi. Wan wan manmeri i gat dispela problem insait long famili bilong em, em yet i no inap stretim. Nogat. Sampela man na meri i stap ausait long dispela famili i gat problem i mas bung wantaim long daunim domestik vailens insait long famili na komyuniti bilong ol.

Planti taim hevi bilong domestik vailens insait long wanpela famili i no kamap nau tasol. Nogat, dispela hevi i stap bipo, bipo yet insait long famili long tumbuna lain. Taim yumi lukluk na skelim gut lain bilong dispela famili bipo, ol tumbuna lain, orait bipo yet ol i bin mekim dispela pasin nogut. Sampela taim yumi ken skelim na luksave olsem dispela hevi insait long famili i go bek long pasin bilong papamama na tumbuna i mekim tu bipo.

Dispela ol hevi i kamap bikpela long wanpela famili na i save gro i go long ol narapela famili i kamap bihain. Pasin nogut o mekim nabaut pasin (papa i paitim mama, mama i paitim papa, o paitim pikinini oltaim) i save kamap long olgeta hap long bodi, insait long bel na pilim, long bodi o sem bilong manmeri na pikinini, na insait long het na tingting tu. I olsem, kankain we bilong bagarapim arapela, mama o pikinini i stap. Pasin nogut o mekim nabaut pasin i save gro insait long famili na ples we ol papamama ol yet tu i bin bungim dispela hevi bipo long laip bilong ol taim ol i pikinini yet insait long famili.

Pasin nogut o mekim nabaut pasin na famili vailens i save kamap olsem rot bilong daunim sampela hevi na wari i stap long papa o mama, na taim man o meri i pilim ol i nogat strong o pawa moa. Na taim ol i lukim ol yet olsem ol i nogat nem na ol i rabis long ai bilong ol arapela pipel, ol i save belhat na bagarapim meri o pikinini bilong ol.

Ol pikinini i gro insait long dispela kain famili we domestik vailens i stap, ol i no save laikim dispela laip bilong famili bilong ol, bikos ol yet i no inap mekim wanpela samting long daunim o abrusim dispela hevi. Na bihain taim pikinini i kamapim famili bilong em yet, planti bilong ol bai bihainim na mekim dispela ol pasin nogut long famili bilong ol tu. Pasin nogut o domestik vailens bai i kamap mak o piksa bilong ol long bihainim. Ol yet i no bin lainim o luksave long ol gutpela rot bilong bihainim insait long famili. Pasin nogut o domestik vailens i gro long wanpela famili na i go long ol narapela famili, i go moa yet olsem. Planti pikinini bai i kamap bikpela manmeri tasol bai ol i nogat save na pasin bilong sindaun long gutpela na stretpela pasin wantaim wanpela narapela.

Mipela i luksave na tokaut hia tu long pasin bilong kisim ol drag nogut na pasin bilong dring na spak. Dispela i bringim tu planti hevi insait long famili. Planti bai i gat hevi bilong mekim pasin nogut long bodi bilong ol yet o wantaim arapela man na meri na pasin bilong yusim bodi long sin pasin taim ol i spak. Ol i mekim pasin pamuk long kisim amamas bilong bodi bilong ol yet na tu pasin pamuk long kisim mani na ol arapela samting.

Rot i stap bilong daunim dispela pasin nogut na domestik vailens. Taim dispela problem i stap insait long famili, dispela famili yet i no inap rausim. Na tu, kastam bilong yumi i olsem, ol pipel i no save lukluk i go insait long bisnis bilong narapela famili. Dispela kastam i gutpela taim wanpela famili

i no gat hevi. Tasol taim famili gat hevi, sapos ol arapela i no inap helpim bikos long dispela pasin, orait dispela i mekim ol pasin nogut i stap strong yet.

Pasin bilong tok olsem "em i samting o hevi bilong famili yet na wari bilong ol" i no stretpela pasin bikos kain tok o pasin i no helpim long daunim dispela pasin nogut long famili na komyuniti. Yumi mas luksave long bikpela wok bilong daunim ol dispela pasin nogut insait long ol famili na komyuniti.

Bai yumi daunim domestik vailens olsem wanem? Nambawan samting em olsem, givim skul o edukesen. Givim ol famili sampela skul bai ol i ken save olsem pasin bilong mekim nabaut em i wanem samting, na dispela hevi i save kamap olsem wanem.

Givim skul long husat i kamapim pasin nogut o abius pasin na husat i kisim bagarap long ol dispela pasin nogut. Papamama na pikinini i mas save gut long dispela. Husat i kamapim pasin nogut o mekim nabaut pasin i mas klia gut olsem em i mekim dispela rong na em i asua bilong em stret, na i no asua bilong husat i kisim bagarap long mekim nabaut pasin.

Mipela ol Katolik Bisop bilong Papua Niugini na Solomon Ailans i singaut long olgeta pipel bilong kantri, ol sios, gavaman, ol NGO grup, ol famili na wan wan manmeri, long wok strong long daunim domestik vailens.

Yumi olgeta i mas wok strong long kamapim gutpela ples we yumi sindaun wantaim belisi na amamas long laip bilong yumi. Yumi mas wok wantaim long kamapim gutpela Kristen famili, we laik tru na gutpela save i stap bai olgeta famili long olgeta ples bilong yumi i kamap gutpela moa.

Bisop Stephen Reichert
Presiden bilong Katolik Bisop Konferens

Noken bagarapim ol pikinini

Na em i wok bilong ol long harim toktok bilong ol narapela.

Em i rait bilong ol pikinini long tokaut long tingting bilong ol.



WANTOK i go pas long dispela kempen.

Ol wokmeri mas gat lo bilong banisim ol

Maisan Pahun i raitim

NATIONAL Tripartite Consultative Council (NTCC) i wanpela ogenaesen insait long Dipatment ov Leba na Industrial Riisen we i save toktok long ol raits bilong ol meri insait long ol wokples bilong kantri.

Long 2003 NORM i bin kamap long kamapim aweanes namel long ol raits bilong ol meri i gat bel long wokples na tu long sapotim International Labour Organization (ILO) Convention 183 we i toktok long ol raits bilong ol wokmeri long wokples.

Mausman bilong UNICEF long PNG Dokta Ebon Ekunwe i tok tenkyu i go long NTCC long bikpela wok ol i save wokim long helpim ol meri insait long kantri. "UNICEF bai i givim helpim long sapotim

dispela progrem NTCC i save wokim long helpim ol meri na tu givim wanpela luksave i go long ol wokples we i save lukautim gut ol wokmanmeri bilong em," Dokta Ekunwe i tok.

Dispela awod "(Family Friendly Award)" Dokta Ekunwe i tok em bilong luksave long wanem kampani o wokples i save lukautim gut ol wokman bilong ol long sait bilong holid, helt na edukesen bilong ol na famili bilong ol.

Nau yet NORM i kamapim wanpela pepa (Bill) we sapos Palamen i tok orait long em bai i kamap wanpela lo bilong sapotim na lukautim ol meri i gat hevi long wokples.

Plantu meri taim gat bel long karim pikinini ol kampani na bos bilong ol i save givim ol liv (Maternity Leave) na i no save peim ol. Na taim ol i kam bek long wok-

ples bilong ol kampani o bos bilong ol i tambu long ol i givim susu long pikinini taim bilong wok.

Dispela em i agens long raits bilong ol meri aninit long ILO conventions 183 we PNG i bin kamap memba na sapotim dispela lo. Tasol insait long kantri yet Leba lo i no gat luksave long kain hevi bilong ol meri.

Freddie Henari husat i gat 29 krismas na em bilong Saroa ples long Rigo eria Sentral provins i bin kamapim logo bilong wanpela grup bilong ol meri Network on Maternity Rights (NORM).

Dispela manki long ples i bin go insait long resis wantaim 30 arapela atis na i bin kamap wina na kisim K750 i kam long UNICEF opis bilong Papua New Guinea na National Tripartite Consultative Council.

Lo bilong lukautim ol mama na pikinini meri



Child Pornography o wokim piksa nogut wantaim o yusim pikinini

Child Pornography em wokim piksa o muvi we i soim pikinini krismas is tap daunbilong long 18 yias i wokim ol pasin pamuk na pasin nogut.

Long sampela taim tu, em i ken stap long teip rekoding o ol i raitim olsem stori.

-Em i brukim lo na rong long kamapim o pablisim o raitim piksa o stori o teip nogut wantaim pikinini

-Em i brukim lo na rong long salim i go aut, kisim i kam insait, salim, tilim o soim pikinini i wokim pasin nogut.

-Em i brukim lo na rong long gat piksa, teip o stori ol i raitim long pikinini i wokim pasin nogut long haus na bek bilong yu.

-Em i brukim lo na rong long kisim pikinini o larim pikinini bilong yu long wokim o stap insait long piksa o muvi nogut, teip o stori.

Sapos ol i holim yu long wokim sampela long ol dispela samting na yu brukim lo, yu ken go kalabus inap long 15 krismas.

Ol dispelal totkok i kam long Family and Sexual Violence Action Committee Sapos yu laik kisim helpim long ol, edres em long telipon namba: 3211744 o Feks: 3217223.

Strongpela meri Kerowagi salim kopi ovasis

James Kila i raitim

WANPELA mama bilong liklik ples Siure long Kerowagi long Simbu provins em trupela kain meri stret long wok kopi.

Gutpela wok bilong em i abrusim sampela ol man tu long wok bilong kopi. Em i wanpela model meri kopi fama stret insait long Simbu provins.

Dispela meri em i nogat man. Man bilong em indai na em wanpela i hatwok tru taim ol pikinini bilong em i liklik na bringim ol i kamap bikpela.

I no long taim i go pinis ol lain manesmen bilong Simbu Koporetiv Famas long Kundiawa i bin luksave long hatwok bilong dispela meri na i givim em wanpela presen. Dispela presen i luksave long strongpela wok dispela meri i save wokim long sait bilong kopi.

Piai i bin bungim kopi bilong em na masinim na givim i go long Simbu Koporetiv Famas insait long maketing sistem bilong ol na ol i bin salim i go ovasis.

Ol i bin salim 3-pela kontena i go ovasis na dispela meri i gat nem long salim kopi bilong em long dispela ol 3-pela sipmen. Long soim luksave bilong ol long dispela strongpela meri long wok kopi, ol lain bod bilong Simbu CCGS Koporetiv Famas Limited i bin givim em wanpela prais.

Narapela strongpela meri husat i memba bilong Simbu CCGS Koporetiv Famas husat i salim kofi bilong em em Mol Clara. Dispela meri em bilong Kundiawa, Gembogl distrik.

Stori bilong Piai Ulkande em wanpela sore stori tru. Maski olsem dispela meri i nogat man long sapotim em long wok bilong em, Piai i save smat tru long wok bilong em. Man bilong em i bin dai long yia 1982 na i lusim em wantaim 3-pela pikinini. Em i gat wanpela pikinini man na tupela pikinini meri.

Piai i stori olsem taim man bilong em i dai, tarangu em i no bin gat wanpela kopi gaden. Olsem na em i go long papa bilong em long ples na askim em long givim sampela kopi long planim na bihain ol i bikpela em i ken pikim na salim na kisim mani.

Tasol papa bilong i tok Piai i no man olsem na em i tokim



• Mama Piai i sanap namba tu na holim presen bilong em long Kundiawa. Tupela liklik meri long Simbu bilas em Rosa na Cathy Kuglame. Foto: JAMES KILA

em olsem yu mas go na painim ol liklik graun na yu yet i mas wok long kamapim kopi bilong yu yet. Tarangu, Piai i harim tok bilong papa tasol na em i go na bungim ol kopi em ol rat i karim i go larim arere long wara nambaut na kuru i kamap ya em i karim i go na planim.

Dispela olgeta pen na hatwok bilong dispela strongpela meri Kerowagi em nau i karim kaikai. Tupela pikinini meri bilong em i marit na sindaun gut na las pikinini man bilong em i go long hais skol. Olgeta dispela i kamap bikos long hatwok bilong dispela strongpela meri Piai.

Tupela yia i go pinis ol long Simbu CCGS Koporetiv Famas i bin makim Piai long kamap wanpela bod memba insait long wok bilong ol.

Dispela em bikos em i winim tru ol narapela meri long strongim wok insait long wok kopi long dispela grup bilong ol.

Dispela Simbu CCGS Famas Koporetiv Limited em mama Piai Ulkande i wanpela dairekta em ol i inkoporetim aninit long Kampanis Ekt long yia 1997 an em i kisim setifiket long Rejistra bilong Kampani long Februari 28, 2001.

Piai i bin kamap olsem memba bilong dispela ogenaesen long em i kisim wanpela lon o dinau long Kopi Industri Koporesen long mun Oktoba 1998. Long dispela taim Piai i bin kisim K1,552 aninit long kopi kredit garenti skim.

Em i bin kisim dispela dinau long helpim em long baim wanpela kopi masin o paipa

long helpim em long rausim skin bilong ol seri kopi.

Wanpela gutpela samting tru em maski em i singol mama, em i bin wok strong tru na i bin bekim dispela dinau insait long 18 mun tasol.

"Mi wanpela meri nating bilong ples.

"Mi nogat man tasol mi hatwok long wok kopi na kopi yet i mekim mi kamap na ol manmeri insait long komyuniti i luksave long mi," Piai i tok.

Piai i mekim bikpela singaut tu i go long ol narapela fama husat i kisim lon aninit long CCGS long bekim.

Taim ol i bekim ol narapela fama bai i ken kisim na helpim ol long mekim wok insait long agrikalsa na helpim kamapim gutpela sindaun.



Kuk Kona wantaim MERI WANTOK

Baked Fish in Coconut Milk (Beik Pis long Kokonas Milk)

Yu mas i gat: katim sapos pis i liklik
 Pis
 Kokonas milk
 Sol
 1 lemon (salis o juis)
 1 anien yu slaisim o katim
 1 tomato
 1 tispun kari pauda

We long Kukim:

1-Katim pis long hap o noken
 2-Putim pis long beking dis we yu grisim is tap
 3-Putim sol, onien, tomato, kari pauda na lemon
 4-Kapsaitim kokonas milk i go
 5-Bekim inap long 15 minit o inap yu lukim olsem pis kein i kuk.

TOKTOK NATING
Wantaim
Fr. Paul Liwun SVD



LONG taim bipo, i gat wanpela lapun meri i stap. Man bilong em i dai pinis. Em yet i stap na mekim wok bilong painim kaikai na olgeta samting. Em i no save stap long gutpela taim tasol. I gat kain kain hevi na wari i save kamap long laip bilong em.

Wanpela de, dispela lapun meri, i no gat wanpela liklik kaikai. Em i hangre nogut tru. Tasol, em i gat strongpela bilip long God. Em i bilip olsem em bai kisim kaikai i kam. Olsem na em i nildaun long rum bilong em na mekim wanpela strongpela prea wantaim bikpela nek bilong em: "God papa bilong mi. Mi laik yu givim mit na sampela skon long mi nau". Lapun meri i wokim dispela prea planti taim wantaim bikpela nek bilong em.

Long wanpela apinun, wanpela raskol i laik kam na stil long haus bilong lapun meri. Em i wanpela man nogut tru long taun bilong ol. Taim raskol man i kamap klostu long haus dua bilong meri, em i bin harim meri i prea na singaut strong i stap.

Taim em i harim nek na askim dispela meri, raskol man i sanap na i wanpela tingting kamap long em. Raskol i tok: "Mi mas trikim dispela meri nau". Olsem na em i hariap i go long stua na baim mit na wanpela karamap o lov bret. Na taim em i kam bek long haus bilong meri, em i harim meri i prea yet: "God Papa bilong mi. Mi laik yu mas givim mi wanpela mit na sampela skon long mi nau".

Nau raskol man i kalapim ruf bilong haus na yusim simni bilong haus na salim bret na mit i go daun long pes bilong lapun meri i stap long en. Wantaim bikpela amamas, lapun meri ya i kirap na kalap kalap na singaut strong; "God Papa, yu gutpela papa tru. Yu bin harim singaut bilong mi. Yu bin bekim prea bilong mi. Yu bin bekim wanem samting mi nidim nau".

Lapun meri i no inap holim amams bilong em. Nogut. Em i go aut na toksave long ol neibor na olgeta wantok bilong em olsem, God i bin harim na bekim prea bilong em.

Olgeta manmeri insait long komyuniti bilong em i harim dispela stori bilong meri.

Tasol, taim dispela raskol man i harim na lukim meri i ran nabaut nabaut long mekim stori long ol lain na wantok bilong em, raskol man i no pilim amamas tru. Em i pilim olsem stori bilong meri i no gutpela moa. Olsem na em i laik mekim sampela tok bilas long mekim dispela lapun meri i pilim sem long ai bilong planti manmeri. Em i bin mekim tok bilas long lapun meri olsem; "I no tru, God i bin salim dispela bret na mit i kam long yu. Mi tasol i bin baim na salim i kam insait long haus bilong yu long hul bilong simni".

Tasol, wantaim strongpela bilip bilong em long God, lapun meri i tokim ol manmeri olsem: "Nogut em i tru olsem Seten i bin kisik Bret na Mit i kam long haus bilong mi. Tasol mi bilip olsem God i bin makim na salim dispela man nogut i kam na bringim bret na mit long mi".

• God i save harim na bekim prea bilong yumi
• God i yusim manmeri long bekim wanem samting yumi askim long em.

• God i no yusim ol gutpela manmeri tasol i mekim gutpela wok. Em i save yusim manmeri nogut tu long bekim prea bilong yumi.

Ol sios helpim long kamapim sunami mani

Veronica Hatutasi i raitim

OL SIOS insait long kantri i karimaut ol fanresing bilong bungim mani long helpim ol kantri na pipel long Saut Is Esia we i bin kisim bikpela hevi long sunami.

Katolik Sios long PNG i wok long givim ol donesen mani long Caritas PNG na dispela ogenaisesen bai bungim ol mani wantaim na salim stret i go long Caritas Esia long tilim i go long ol kantri na pipel i nidim long helpim ol i kamapim gut sindaun na laip bilong ol.

I kam inap nau, Caritas i kisim K30,000 long ol apil em bin putim i go aut long pablik na ol Katolik Daiosis long kantri. Ogenaisesen i kisim yet mani i kam long ol daiosis long kantri.

Kodineta bilong Saut Is Esia sunami apil long Caritas na Deputi Dairekta bilong Caritas PNG Raymond Ton i tok em i amamas long gutpela bekim we ogenaisesen i kisim long pablik na ol Daiosis.

"Bekim long apil we mipela i bin putim aut i go long pablik na ol daiosis i gutpela. Mi amamas long lukim olsem pablik na ol daiosis i givim helpim long laik na lewa bilong ol wantaim bikpeal tingting long helpim ol lain i kisim hevi long bikpela sunami. Mani we ol daiosis i givim em i

kam long ol pipel yet. Planti em ol pipel i kam long ol bus ples we i bin harim long sumani hevi na ol i soim laik pasin long lewa bilong ol na givim helpim," Mista Ton i tok.

Em i tok Caritas i bin makim tupela wik tasol long bungim mani na salim i go kwik-taim long ol lain i kisim bagarap na hevi tasol bikos ol daiosis i wokim ol koleksen bilong ol yet long ol sios memba na long taim bilong ol yet we i kisim taim, ogenaisesen i wetim ol.

Em i tok helpim bilong yumi em i liklik skelim wantaim ol bikpela manimak ol arapela kantri long wol i givim na Caritas PNG bai wetim ol Katolik daiosis long PNG i givim olgeta mani long ol wan wan peris bilong ol na em bai bungim olgeta wantaim ol arapela donesen long pablik apil na salim i go stret long Caritas Esia we i beis long Sri Lanka. Pastaim em i salim olgeta mani i go, em bai givim ripot i go long Nesenel Gavman.

Long wankain taim tu, yumi long kantri i wok long bungim hevi wantaim maunten paia i pairap long Manam Ailan insait long Madang provins.

Mista Ton i ogenaisesen (Caritas) i wokim apil insait long sios yet long bungim mani na ol arapela samting long

helpim ol manmeri na pikinini i bungim hevi long maunten paia i bin pairap gen long dispela sik na kamapim sampela bagarap long ol pipel. Wanpela man i dai tu bihain long ol hotpela ston na pipela bilong maunten paia Manam i kapsait na karamapim ples.

Evanjelikol Luteran Sios long PNG (ELC/PNG) i wok long karimaut ol fan resing tu long helpim ol pipel long Esia we bikpela sunami i bin bagarapim ol long Boksing de, Disemba 26, 2004. Toktok i kam long ELC/PNG hetkota long Lae insait long Morobe provins i tok opis i wok long kisim ol mani na kios samting i kam long ol fan resing ol peris na sios skeet i kamapim.

Opis i tok long las Sarere, ol bin holim wanpela Gospel konsert long Balob Tisas Kolis we pablik i bin givim mani na ol kios samting bilong ol pipel long Saut Is Esia we sunami i bagarapim ol. Opis i no bin inap long tokaut long manimak tasol em i tok mani we ol i kisim e mol bai givim i go long PNG Red Cross Sosaiti long bungim wantaim ol arapela mani long pablik na ol ogenaisesen na salim i go long helpim ol pipel long Saut Is Esia. Angliken Sios bai givim mani bilong em long fanresing komiti bilong Nesenel Gavman.

Caritas turangu apil

CARITAS PNG em ejensi bilong Katolik sios i sanap strong long helpim pait long Jastis o rait bilong olgeta pipel, Pis, Riif na Dvelopmen bai lonsim o opim Anuel Lenten Turangu Apil bilong dispela yia long neks wik Trinde.

Lons bai kamap long Pot Mosbi Asdaiosis Sosel Apostulet senta klostu long Loretto Hostel long Boroko.

Long olgeta yia long taim bilong Lent em stat bilong wok redi long Ista long Katolik Sios kalenda, Caritas PNG i save kirapim apil long toksave i go long ol Katolik manmeri olsem em i taim bilong givim helpim. Long ol peris, ol i save givimaut ol envelop na bokis we ol

sios memba i ken putim ol liklik toea bilong ol long bungim wantaim na givim long sios long taim ol i makim o sapos nogat, long Ista taim. Dispela apil i save go long olgeta Katolik daiosis long kantri.

Mani we Caritas i save wokim long dispela apil em ol i save yusim long helpim pipel taim hevi olsem sunami, guria, bikpela taitwara, graun i bruk na ol arapela bagarap i kamap long PNG na ol arapela kantri bikos Caritas i memba bilong ogenaisesen i stap long wol.

Na taim PNG i bungim hevi, ol Caritas ogensisen long wol i save givim helpim tu bihainim netwok bilong ol.



Pasin Tumbuna...Ol Baining bilas na redi long karim man i holim Baibel long misa long St Paul long namba 100 anivesari bilong ol matir bilong Baining long Is Nu Briten provins long Ogas las yia. FAIL FOTO/BARBARA TOMI

Turangu askim go long ol meri grup

Veronica Hatutasi i raitim

APIL i go long ol Felosip grup bilong ol meri insait long Pot Mosbi siti na tu, long ol arapela provins long givim helpim i go long ol meri na pikinini husat i bin kisim hevi na bagarap insait long Saut Is Esia sunami long Krismas taim.

Apil i kam long Ume Wainetti husat i wanpela meri lida long kantri na tu, memba bilong Nesenel Kapitel Wimens Ekumenikol Felosip komiti i tok.

Em i tok long neks wik Fraide Februeri 18, bai i gat Ekumenikol Womens sevis na dispela bai kamap long Sione Kami Memorial Sios long Gordons, Pot Mosbi.

Em i tok long dispela sevis, ol bai kisim ol donesen long ol felosip grup na husat ol narapela meri na grup i laik wokim donesen long helpim ol meri na pikinini i bungim hevi, wari na bagarap long dispela bikpela sunami o solwara i solap we i bin kilim dai samting olsem 200,000

manmeri na pikinini long Aceh long Indonesia, Sri Lanka, India, Taiten, Maldives long India Osen na sampela kantri long Afrika. Moa long milien pipel moa i bin kisim bagarap na hevi i stap. Na ol i laikim helpim bilong ol manmeri long graun we sindaun bilong ol i orait.

Mis Wainetti i tok ol i askim ol meri insait long ol felosip grup long wokim donesen inap long hamas pikinini meri ol i gat. Tok piksa em sapos wanpela mama i gat 4-pela pikinini, em bai donetim K5, K4 em long makim 4-pela pikinini meri na narapela K1 em long makim mama yet.

Em i tok grup bilong em i wok wantaim PNG Kaunsel ov Sios Presiden bilong Wimens Ekumenikol Komiti Agnes Alavulu long salim ol tok i go aut long ol felosip na ol arapela sios grup bilong ol meri long ol provins insait long PNG, aninit long PNG Kaunsel ov Sios netwok.

Mis Wainetti i tok em i surikim dispela apil i go long olgeta meri long felosip o

sios grup long kantri na toksave i go pinis long ol felosip grup na ol arapela sios grup long ol provinsel level long wokim fanresing bilong sunami.

Em i tok dispela em liklik kontribusen bilong ol meri na mama long helpim ol mama na pikinini husat i kisim hevi na bagarap long sunami.

Em i tok ol i wok wantaim Ekumenikol Komiti bilong PNG Kaunsel ov Sios long dispela fan resing wok bilong ol grup bilong ol na ol arapela meri sios grup husat i laik givim helpim long sunami.

Em i tok antap long mani helpim, ol i ken givim ol kios na kaikai samting long bungim wantaim na givim i go.

Mis Wainetti i tok i gutpela long ol meri sios grup long karimaut fan resing bilong ol yet olsem ol planti ol arapela grup long kantri husat i karimaut ol fanresing bilong helpim ol kantri long Esia i kisim bagarap long bikpela sunami i bin kamap long mun Disemba.



Yumi mas bihainim tingting na pasin bilong Krai

Yumi man i gat strongpela bilip, yumi gat wok bilong helpim ol man i no gat strongpela bilip na karim hevi bilong ol. Yumi no ken ting long helpim yumi yet tasol. Yumi olgeta wan wan yumi mas wok long helim ol brata, bai ol i ken kisim gutpela pasin na bilip bilong ol i ken kamap strong. Yumi save, Krai tu i no bin ting long helpim em yet tasol. Pasin i kamap long em olsem buk bilong God is tok, "Ol man i tok nogut long yu, na dispela tok nogut bilong ol i pundaun antap long mi tu." Olgeta tok bipo ol i bin raitim long buk bilong God, em ol i bin raitim bilong skulim yumi. Dispela tok i bilong strongim bel bilong yumi na mekim yumi sanap strong na wetim God i kisim. Yumi save kisim strong long God wanpela tasol na em wanpela i save mekim yumi sanap strong long bilip. Orait God i ken helpim yupela long bihainim tru pasin bilong Krai Jisas na holim dispela wanpela tingting tasol. Olsem na bai yupela i stap wanbel, na bai yupela wantaim i litimipim nem bilong God.

- Rom. 15: 1-6

Luksave long stia na blesing bilong Bikpela

STIA na lukaut bilong God em i bikpela samting na long stat bilong yia 2005, planti ol gavman dipatmen, ol skul na ol arapela ogenesisen i wok long holim ol sios sevis long givim ol woklain long han bilong Bikpela na em ken stap olsem wasman na stia long taim ol i karimaut wok bilong ol.

Long dispela wik, Mande, ol pablik sevan i bin bung long Marimari Luteran Sios long Gordons long pre na kisim blesing bilong Bikman taim ol loya i bin bung long neks de Tunde long pre na

kisim blesing long ol i ken strong na bihainim gutpela na stretpela pasin tai mol i karimaut wok bilong ol.

Long las wik Fonde, olgeta Katolik tisa long olgeta level bilong skul insait long Nesenel Kapitel Distrik i bin bung holim dedikesen sios sevis long Don Bosco Teknolojikel skul long Boroko.

Mesej o toktok we Praim Minista Sir Michael Somare husat i bin stap long Mande dedikesen sios sevis bilong ol Pablik Sevan i bin tok strong long ol pablik sevan long wok gut na ol bikpela projek

i ken stat na pinis long taim yet ol i makim long en na wok ikonomi o wok man i ken go gut.

Em bin tokim ol pablik sevan olsem ol i olsem draiva na ol i mas givim sevis long taim. Na ol i mas givim bikpela tingting long go hetim ol pfen we bai sapotim o kontribut long gro bilong ikonomi long dispela kantri.

Bikpela samting we em bin askim ol tu long en em long wok bung wantaim bikos dispela em i as long ol gutpela wok i save kamap.

Preia, bel gut na wok bung wantaim

PREIA na belgut na wok bung wantaim long kamapim bek na strongim yuniti namel long ol Kristen em ol bikpela samting olgeta Kristen pipel i mas wok hat long kamapim, hetman bilong Katolik Sios long wol Pope John Paul 2 i tok.

Pope John Paul 2 i bin wokim dispela toktok long Misa lotu wantaim 7,000 pipel long Sen Peter's Basilika long Rom long makim Wik long Preia bilong Kristen yuniti las wik.

"Olgeta Kristen i mas pre, toktok wantaim na wok bung wantaim long strongim Kristen yuniti. Kamapim bel gut, bel isi na sekan pasin namel long ol Kristen long wol i laikim moa wok ol man i ken mekim (human efforts and talents) na olsem, preia long yuniti em i bikpela samting.

"Tasol preia em yet i no inap. I mas gat gutpela kliapela tingting, ol piling na memori we bai lusim tingting long ol bel nogut pasin namel long wanpela arapela long ol nogut pasin i bin kamap bipo.

"Long dispela rot, em i kamap olsem mak bilong tanim bel we yumi ken lukim long ausait bikos sapos dispela i nogat, bai nogat wok bung wantaim namel long ol Kristen i kamap," Pope John Paul 2 i tok.

Pope i bin tok amamas long ol lain i go pas long wok eku-menisim o wok bung namel long ol Kristen sios long tiolojikel level na tu, long sait bilong wok bung long ol projek long helpim ol nara-pela. Wok bung wantaim em i bikpela samting long kamapim gutpela sindaun.

Luteran Sios long India i wok long ol fil progrem long helpim sunami lain

BIKPELA eria we Luteran Sios long India i helpim ol lain i bungim hevi long Saut Is Esia sunami em long sanapim bek ol haus, sapotim komyuniti wantaim wok kaunseling long ol lain we hevi i bagarapim tingting na stap bilong ol komyuniti sevis olsem wel wara, ol skul, ol komyuniti senta givim ol katamaran o bot bilong painim pis wantaim tu ol net bilong painim pis long en.

Taim wok bilong helpim ol lain i bungim hevi i wankain long Yunaitet Evanjelikel Luteran Sios long India (UELICI) we i wok klostu wantaim Luteran Wol Federesen (LWF) long ol arapela kantri na komyuniti tu long Indian Osen, ol bai glasim na skelim ol samting na eria we bai ol i helpim ol famili na komyuniti wantaim, LWF Nius i givim toktok long sunami helpim i tok.

Ol rot we sios i bihainim long givim helpim i karamapim ol famili husat i bin lusim graun bilong ol long bikpela solwara i solap, ol famili i sot long ol samting, ol famili we mama/meri i stap olsem het o bos, ol famili i gat ol memba i sik o gat hevi long sampela hap bodi bilong ol na ol dispela we bai isi long birua i bungim ol long bihainim taim.

Grup i givim helpim i bin lukluk long kain situesen o stap na makim ol vile s na ol

famili ol i wok long helpim long taim bilong stretim bek ples (rehabilitation). Ol han bilong Luteran Sios helpim wantaim ol wok insait long ol eria we sunami i bagarapim em long Arcot Luteran Sios, Andhra Evanjelikel Luteran Sios, India ELC na Tamil ELC.

Eksekutiv Seketeri bilong UELCI Reveren Dokta Chandran Paul Martin it ok bikpela samting long wok bilong sios em long daunim ol hevi na hevi we ol lain i no bin stap pinis long man (ikonomik) na sosel hevi bipo sunami hevi i bin kamap.

Em i tok ol sios grup na memba i wok wantaim Oksileri bilong Sios i lukautim Sosel Eksen eria.

Long wankain taim tu, Presiden bilong Lanka Luteran Sios long Sri Lanka i singaut long imejensi helpim i go long ol sios memba bilong ol long Colombo husat i bin kisim bagarap na hevi.

Planti ol sios i wok long wok bung wantaim long helpim ol lain husat i bin bungim bikpela birua long ol wan wan kantri long dispela sunami.

Sampela taim ol dispela sios i save go long ol hap we ol gavman o gavman bodi i no inap go long en.

Wok bilong ol i wok long helpim tru ol man-meri long ol dispela hap long sanap gut na strong gen.



Stail...Ol dispela pikinini meri i putim ol naispela klos long go insait long misa lotu bilong amamasim namba 100 anivesari bilong ol Baining matir long mun Septemba las yia. FAIL FOTO/BARBARA TOMI

Vatiken wari long saiens wok i abrusim mak

VATIKEN i wari long wok bilong saiens, moa yet long eria we ol (saiensis) i wokim kamap bebi nating long ol kiau na i no olsem em i kamap tru long bel bilong mama.

Vais Presiden bilong Pontifikal Akademi long Laif long Vatiken, Bisop Sgreccia i putim askim olsem "wanem em boda we rises wok bilong saiens long man i no inap long abrusim?"

Em i mekim kila olsem 'boda em "being" o lewa we i save mekim man i antap na naraakin long ol arapela animal. Na i mas gat luksave long "being" bilong bebi o pikinini, mama na papa.

Long ol askim we wanpela dokta na ritaia Profesa bilong Marasin na Medikol Etiks i tromoim i go long Bisop Sgreccia, tripela i go olsem, "Bai nupela lain pipel ol i wokim long laboretori o saiens eksperimen rum i tekova long yumi? Husat bai papa na mama, mi na yu? Na tumora, husat bai papamama?"

Bisop Sgreccia i bin toktok long histri

bilong man i stat long Neolithic era o taim we man i bin kamaut long keiv o hul bilong graun na i go aut bosim wol. Na em bin skruim ol toktok i go long developmen bilong man na sivilaisesen na ol nupela samting em bin kamapim we yumi yusim tude

Tasol em i tok ol woa na pait i bin stiaim man long ol sikret bilong ol samting i stap raunim graun na skai.

Na em bin tok baiolojikel teknoloji, man i kamap olsem bos long laip, ol sikret bilong em, man i kam we na moa yet, we nupela laip i kamap long bung wantaim bilong papamama.

"We stap bodamak bilong man i stap "humen" na lo (bilong humanity) long stap pas wantaim?"

"Bodamak em long "being" we i bikpela na namel samting long man na plis God, ol i mas noken pilai wantaim "being", Bisop i bin tok.

Em i bin tok birua i stap na e mi stap long han bilong yumi long lukim birua na

stopim.

Em i tok pikinini i presen long laik pasin bilong God na i kamap long papamama.

Em i tok long karim pikinini e mi mak bilong kamap tru tru man na meri i kamap mama long presen we em yet i givim long man bilong em na man i kamap papa long em yet i presen long meri bilong em.

"Taim saiens na teknoloji i kam insait na kamapim bebi, dispela i biruaim man tru na long toktok bilong wanpela saveman," dispela wok i rausim wok bilong kamapim man," Bisop i bin tok.

"Fridom bilong man taim yumi sepere-tim long wok man i ken mekim i kamap narakain na dispela em i ovarim pawa bilong man," em bin tok.

Bisop i skruim tok i go moa na tok dispela nupela baioteknolojikel era o taim man luksave long netsa na man na got bilong saiens na teknoloji i bilong givim sapot na helpim long man tasol ol i mas yusim gut.

Nius Bilong HIV AIDS

Tok Lukaut



wantaim David Ephraim

LONG dispela wik bai yumi toktok long wanem samting em i famili yunit. Mi bilip yumi olgeta i gat famili memba olsem brata susa, wantok na moa yet. Tasol dispela ol famili long bung wantaim pasin i wok long bruk hariap tru long taim ol bikpela hevi olsem HIV AIDS i kam insait long famili yunit. Planti manmeri insait long wol i wok long pilim kain hevi olsem famili i bruk. I nogat gutpela halivim i kam long ol manmeri husat i stap insait long ol hevi long ol tru tru brata, susa bilong ol stret.

Insait long kantri bilong yumi yet, dispela kain hevi i wok long go bikpela. Mi bilip dispela kain hevi i save kamap insait long famili taim ol manmeri i save kamap insait long famili taim ol manmeri i no klia tumas long as o pepes bilong famili. Insait long famili i mas i gat pasin bilong bringim ap wanwan memba bilong famili wantaim gutpela laikim, soim tok tru na pasin amamas na opim gutpela rot bilong wanwan famili memba long i gat sans long toktok na kisim sampela kain risponsibiliti we i ken wokim ol bai amamas long wokabaut long famili laip we ol imemba long en. Nau yet mi bilip yu klia nau pinis long as bilong famili.

Famili em i yu gat pikinini na meri tasol, famili em long wok bung wantaim patna bilong yu na ol pikinini bilong yu long kamapim gutpela sindaun. Bikpela samting yum as givim taim moa wantaim famili bilong yu long toktok na kamap wantaim ol gutpela rot long abrusim birua olsem HIV AIDS. No ken wokim spots, wok na ol poroman bilong yu i kisim moa taim bilong yu long spendim wantaim famili bilong yu, long kirap bilong HIV AIDS. Long kantri bilong yumi ol saveman meri i wok long traim long helpim manmeri olsem yupela ridas long luksave long rot bilong stopim na daunim o abrusim bikpela hevi i kam insait long famili we i ken bagarapim famili. Plis stat strongim famili bilong yu nau long givim moa taim long toktok wantaim famili memba bilong yu long wanem samting yu lukim i ken bringim hevi long famili. HIV AIDS stap pinis givim taim long famili tude.

Long Tok Lukaut bai mi toktok strong long wanpela birua pasin we i luk olsem bai kamap bikpela klostu tru long kantri bilong yumi long lainim long yusim save na skills we ol i gat. Sapos gavman, sios na NGO i no igivim moa sapat olsem kamap wantaim ol aidia long lainim ol yangpela bilong yumi husat i no wokim gut long skul long helpim ol long narapela ol kain rot long ol i ken yusim save na tingting bilong ol long wokim samting. Dispela i ken helpim ol long no ken wokim pasin raskol. Long ol kantri olsem Kolombia long Saut Amerika pasin bilong planim na salim kokein em i bikpela na planti yangpela i dai pinis long han bilong polis, defens na ol raskol long salim kokein long ol baiyas we long hap ol i kolim ol long kopi baiyas.

Dispela kain drag dils i bikpela insait long Thailand long wanpela hap graun ol i save kolim long Golden Triangle. Dispela hap i nogut tru we ol militants o raskol i save hait long salim drag i go insait long ol kantri klostu long Thailand olsem Hong Kong na tu i save kam long i go insait long Australia. Nau yet planti ol man Australia i stap long kalabus long Thailand long dispela kain pasin. Mi bilip dispela kain pasin i kamap pinis long kantri bilong yumi we planti yangpela i wok long salim mariwana o niugini gol we ol waitman i save kolim long en. Dispela i lukim planti i stap insait long kalabus na planti i dai pinis long han bilong polis. Dispela em i wanpela bikpela hevi yumi mas luksave na kamap wantaim ol gutpela rot long helpim ol yangpela bilong yumi. Sapos yumi no luksave bai yumi kamap olsem Kolombia o Saut Afrika we i lukim pasin raskol i bikpela tru tru. Sapos yu skelim pasin raskol bilong yumi long Papua Niugini em i no bikpela tru na ol lo manmeri i ken stretim wantaim helpim bilong ol manmeri. Olsem na maski eking nambaut na painim ol rot long helpim ol yuts bipo ol bikpela hevi i ken bagarapim yumi.

Kamapim isi we long papamama peim skul fi

Maisan Pahun i raitim

SEKETERI bilong Edukesen, Peter Baki, i singaut long ol skul insait long kantri long noken rausim ol sumatin long skul sapos ol i no peim ful skul fi bilong ol long statim skul dispela yia. Ol tisa, bod ov menesemen na edukesen atoriti long wanwan skul i mas putim sampela gutple wei we i ken givim taim long ol sumatin long peim skul fee bilong ol.

Mista Baki tu i tok amamas i go long Gavman long givim K41 milien long 2005 baset i go long skul subsidi long dispela yia na K10 milien long kirapim haus na program bilong inspekta long ol distrik na ples

Dispela Gavman subsidi i no inap long peim ful skul fi bilong ol sumatin, em bilong halivim papamama peim kos bilong edukesen ol sumatin i kisim.


Papamama mas baim yet skul fi bilong pikinini bilong ol.

Long statim dispela yia edukesen singaut (Theme) em "Libraries & Literacy, promoting & sustaining lifelong living for all". Dispela "Laibreri, na Literesi, Promosen na kamapim gutpela laip" tok tok em bilong dispela yia na bai stap aninit long Nesenel Education Pten bilong 2005 i go 2014.

Aninit long dispela plan edukesen dipatmen i kamapim bikpela ting long "halpim yu yet long gutpela laip" (Prosperity through Self Reliance)

Edukesen Dipatmen i laikim Papua Niugini i mas develop we ol manmeri i mas senisim pasin (attitude) bilong ol. Dispela pasin em bikpela hevi we yumi olgeta i gat dispela sik na sapos yumi i senis bai kantri orait.

Aninit long dispela edukesen plen bai ol



• Ol sumatin bilong St Peters Catholic Pramerri Skul long Mosbi beten long stat bilong skul yia.

sumatin i lainim long.

- Mekim stretpela wok
- Mekim stretpela wok na kisim pei
- Sevim hap bilong dispela mani
- Skelim hap bilong dispela mani
- Inves sampela pesen (%) bilong mani
- Dispela em ol toktok bilong edukesen seketeri taim em i openim dispela skul yia

insait long kantri.

Bekim nau i go long skul pikinini na papama long harim toktok bilong atoriti na skulim pikinini long gutpela we blong laip.

Ol lain long fomel sekta tu i mas sapatim edukesen developmen long dispela yia long helpim ol skul stap klin na gutpela ples insait long komyniti.

Haus sik kisim sola pawa sistem

ROTARY International klab bilong Japan (RIJ) i givim wanpela Sola Pawa sistem bilong storim ol marasin insait long ol bokis ais long ol helt senta na wanpela praimerri skul long Duke of York aitan. Planti long 60 memba bilong Rotary International long Japan, Helt dipatmen na World

Health Organization (WHO) i bin go long Duke of York Is Nu Briten provins las mun long lukim dispela samting.

"Dispela Sola enejii sistem mipela i givim olsem sain bilong laikim na gutpela tingting," Gavana bilong RIJ Mista Yasuo Kamitani i tok.

Bogenvil i no rausim ol skul sumatin bilong ol

Veronica Hatutasi i raitim

OL SKUL long Bogenvil bai i no rausim ol skul pikinini long skul, bos bilong ol skul long Bogenvil Tony Tsora i tok.

Mista Tsora i tok toksave i go pinis long ol skul long Bogenvil bilong noken strik tumas na rausim ol pikinini long dispela skul yia sapos ol i gat hevi wantaim skul fi.

Dispela i bihainim tu toktok bilong Nesenel Edukesen Seketeri Peter Baki husat i tok long ol skul i noken rausim ol pikinini bikos ol i no peim ful skul fi, Mista Tsora i tok.. Tasol long wankain taim tu, em bin tok strong long ol papamama olsem em i wok bilong ol long peim ol skul fi.

Em i tok ol dispela we i no inap long peim ful fi em ol i toktok wantaim ol skul bot long wokim aranjimen long peim hap hap skul fi inap ol i pinisim.

"Ol wan wan skul long provins i wok long askim strong ol papamama long peim skul fi. Ol wan wan skul yet i gat ol skul fi dinau bilong las yia yet long sampela papamama.

"Planti mama i no luksave long wok bilong ol long helpim peim skul fi long ol pikinini. Em i no fea tu long ol pikinini long kisim hevi bikos sampela papamama i no karimaut wok bilong ol," Mista Tsora it ok.

Tasol em i tok ol skul i no rausim ol skul pikinini na long wankain taim tu, em i strongim ol papamama long peim ol skul fi bilong ol pikinini.

Long lukluk bilong em, Mista Tsora i tok long Bogenvil, hevi long peim skul fi i bikpela moa yet long Sekonderi level we sampela papamama i no pinisim peimen bilong skul fi.

Em i tok dispela i mas noken go het na ol papamama i mas lukim olsem ol i peim skul fi long ol pikinini bilong ol.

Long ol arapela edukesen nius, Mista Tsora i amamas long ol tisa long Bogenvil bikos ol bin stap insait long skul bilong ol na mekim ol wok redi las wik bipo skul i stat. I gat moa long 2,000 skul tisa long Elementeri, praimerri, hai, sekonderi na vokesenel level long Bogenvil. Long ol dispela, 700 em ol elementeri skul tisa.

Famili plening na gavman sapat polisi kamapim senis

MAK o level bilong fertiity o ol meri i redi na inap long karim pikinini long ol kantri we i wok long develop nau i go daun. Na long ol develop o bikpela kantri, mak i go daun moa yet, wanpela Yunaitet Nesens (UN) ripot i tok.

Ripot i tok dispela i kamap bikos planti man na meri long ol kantri i wok long develop i no marit hariap. Na taim ol i marit, ol i no karim pikinini hariap. Tu, mak long ol pikinini ol i karim em wanpela, tupela o tripela pikinini tasol.

Ripot i tok dispela em i wanpela wok painimaut we World Fertility ripot bilong yia 2003 Ripot i tokaut long en bihainim ripot UN Populesen i givimaut long en.

Ripot tok senis i kamap long "Reproductive behaviour" ol rot bilong karim pikinini na dispela i karamapim ol eria olsem marit na pasin bilong yusim famili plening insait long 192 kantri long wol, stat long ol yia long 1970 i kam inap nau. Ripot i tokaut tu long polisi na tingting bilong gavman

long dispela samting. Ol bikpela wok painim i bin kamap long dispela ritpoi i tok, planti man na meri i wok long stap nating na i no marit longpela taim.

Long 192 developing kantri long wol, mak bilong ol singel meri husat i gat krismas namel long 25-29 yia na i no marit yet i bin go antap long 15 long 1970 i go antap long 24 pesen long ol yia long 1990.

Mak bilong ol man i gat wankain krismas i bin stap long 32 pesen tasol nau i go antap long 44 pesen. Ripot it ok mak i bin go antap moa long ol developing kantri.

Ripot i tok bikpela samting we i as long mak bilong ol meri inap long karim pikinini i go daun em bikos famili plening we i bin kamap strong long ol yia long 1970 i go long 1990.

Ripot i tok long dispela 192 kantri ol i karimaut staid, mak bilong ol meri i stap long famili plening i bin go long 32 pesen i go antap long 52 pesen nau. Dispela em long ol developing kantri.

Ol sapat na helpim i go long ol birua we i bin kamap long Manam na Esia

Sir Michael kamapim tupela bikpela fanresing

WANPELA bikpela kaikai we Paim Minista Sir Michael Somare na meri bilong em Lady Veronica Somare i go pas long kamapim i pulim moa long K150,000 bilong go insait long wok bilong helpim ol manmeri i kisim bagarap long Saut Is Esia long Disemba las yia.

Dispela bung kaikai em ol bisnis haus na grup i baim ol tebol mak olsem K3,000 long 10-pela man wanpela tebol na tu ol mani i kam long ol okesen sel bilong ol samting na ol arapela fanresing we mani i no kam yet.

Planti manmeri i bin kamap gut na mekim dispela kaikai i bilong pulim mani i kamap gut tasol planti arapela fanresing wok i wok long go het yet long redio we ol manmeri i wok long tokaut long givim helpim bilong ol wantaim mani.

Dispela bikpela bung kaikai i bin kamap long apinun long Stet Faksen. rum tasol long apinun Sir Michael i bin stap tu long wanpela golf salens we ol bisnis haus na kampani i bin salim ol tim bilong ol i go long pilai. Dispela golf pilai tu i bilong pulim mani bilong sunami hevi long Esia. Na dispela pilai i bin kamapim samting olsem K105,000 long de taim.

Las Fraide em i wanpela bikpela taim bilong Sir Michael long stap insait long pilai long san taim na bung wantaim ol bisnis lain na arapela bikmanmeri long nait taim gen long dispela bung kaikai ol i kolim fanresing dina.

Dispela mani bai i go long han bilong gavman fanresing komiti we Dokta Puka Temu i komiti long en na Sir William Skate



• Ben Sounds of Daudai, wanpela bilong ol ben we i bin pilai long musik konsert long kisim mani long helpim ol lain i bin bungim birua long sunami. Foto: NEVILLE CHOI

i siaman long en.

Long Sarere tu em Sir William Skate i stap tu wantaim wanpela bikpela musik pilai we ol sampela biknem musik manmeri na ol musik ben insait long Pot Mosbi

i kamap na pilai. Dispela pilai em Red Cross PNG i go pas long en we ol manmeri i baim geit na i go lukim ben na sapatim fanresing long peim mani long geit na go insait.

Manam maunten paia i paia bikpela moa

MANAM Ailan i no orait yet bikos maunten i paia gen long las wik we samting olsem 2,000 manmeri husat i bin stap bek long ailan i lusim ailan na kamap long bikples Bogia.

Dispela maunten paia long Manam i strong moa long pastaim we i brukim planti haus, ol teng wara na ol gaden kaikai na ol samting ol pipel i save yusim long sapatim na strongim sindaun bilong ol insait long ol ples.

Rijinol memba bilong Madang husat tu em Minista bilong Inta Gavman Rilesens na i lukautim kain bikpela hevi na bagarap olsem long kantri, Sir Peter Barter, i tok Manam ailan i bagarap nogut tru nau na i nogat klia tingting yet long ol pipel bai i go bek long ples bihain o nogat.

Sir Peter i tok dispela maunten paia i tromoi ol bikpela hot ston i kam aut na pundaun antap long ol haus na kirapim paia we i kukim planti haus pinis. Na tu ol hot ston i kukim na brukim ol teng wara we na ol gaden kaikai na ol samting bilong ol pipel i yusim. Wanpela man i bin dai long dispela bagarap, Sir Peter i tok.

Em i tok ol dispela lain manmeri husat i bin stap bek na nau i kam bung wantaim ol lain long keasenta i mekim laip na sindaun i go hat moa bikos i nogat sel bilong taitim long ol mekim haus slip, nogat gutpela wara bilong ol i dring na tu i nogat spes bilong ol i sindaun olsem na ol i traim long putim ol long narapela kea senta.

Sir Peter i tok nau i gat bikpela hevi long wara na sel na ol kago long skelim gut long ol manmeri. Kos bilong lukautim na helpim ol pipel bilong Manam long kea senta i bikpela nau we ol i lusim pinis samting olsem K2 milien long ol kaikai na ol saplai na Sir Peter i ting bai kos i go antap yet.

Olsem na Gavman i mas hariap painim rot bilong givim ol graun bai ol pipel i ken mekim gaden bilong ol long lukautim ol yet.

Dispela hevi bilong graun i stap yet na ol pipel bilong Manam bai wet yet inap Gavman i painim wanpela hap graun bai ol pipel i ken go sindaun long en. - **Yakam Kelo i raitim**

PNGFM helpim ol pipel bilong Manam

Joe Ivaharia i raitim

NAMBAWAN tok pisin redio stesen Yumi FM wantaim sista stesen bilong em Nau FM long Fonde las wik i bin salim moa long 40 bokis kago igo long ol pipel long Manam ailan.

Dispela i bin kamap bihain long redio stesen i bin mekim wanpela fanresing apil bilong ol we ol manmeri na pikinini wantaim i ring long telepon i go long tupela redio stesen long tokaut long laik bilong ol wanem samting ol i bin laik givim igo long ol pipel long Manam na long Saut Is Esia.

Planti bilong ol pablik i bin mekim ol donesen igo long dispela apil we tupela redio stesen i bin kisim na salim i go long ol komiti husat i mekim wok lukautim long dispela trupela birua.

Ol pipel i bin givim mani na ol arapela samting olsem kolos, ol samting bilong kuk, kaikai na dring na bilong silip tu.

Mausman bilong Yumi FM, Turner Arefeae (Kas T) i tokim *Wantok Niuspepa* olsem olgeta samting ol pipel i bin bungim na mipela i bin putim igo insait long ol boks we nau bai mipela i salim i go long Madang.

Long witnesim na kisaim ol kago Darekta bilong Nesanel Emejensi na Disasta opis Kenel Eric An i bin stap we em i salim bikpela tok amamas na tenkyu long olgeta wanwan asosiesen husat i bin givim liklik helpim i kam na bikpela long ol pablik long kain pasin ol i soim i kam long helpim ol wan pipel bilong yumi.

Olgeta kago ba i go fri ananit long lukaut bilong Consort Shipping kampani na ol arapela ejensi husat mipela tu i mas tok bikpela tenkyu i go long ol, Kas T i tok.

Dispela bai helpim ol pipel bilong Manam long painim sampela liklik amamas.

CLC sios givim moa long K6,000 i go long Red Cross sunami apil

Maisan Pahun i raitim

GAVANA Jenerel (GG) bilong Papua Niugini, Sir Paulias Matane, i bin kisim K6,135. 20 i kam long Christian Life Center (CLC) long Waigani hia long Nesanel Kapitel Distrik (NCD) long helpim PNG Red Cross Society helpim ol kantri long Esia husat i bin kisim bagarap long birua bilong sunami.

Siaman bilong CLC, Pasto Charles Lapa (MBE), i bin amamas taim Sir Paulias Matane wantaim Lady Kaludia i bin kam bung lotu wantaim ol CLC kongrisesen long Sande.

"Sir Paulias Matane na Lady kaludia i soim gutpela piksa bilong kantri olsem PNG em i wanpela Kristen kantri na ol lida bilong kantri tu mas soim Kristen pasin," Pasta Lapa i tok.

Aninit long Mama Lo bilong kantri PNG i wanpela Kristen kantri tasol long pasin bilong ol manmeri na lida bilong kantri dispela i no save kamap tru olsem ol narapela muslim o narapela kantri we i gat narapela kain bilip.

Sir Paulias taim em kisim wok GG bilong kantri em i bin raun long ol sios insait long Mosbi sji na CLC long Waigani i namba tu taim long kain ol raun bilong em. Namba wan lotu em i bin go em long Lahara kongrisesen bilong Poreporena Yunaited Sios long ples Hanuabada.

Taim Sir Paulias na Lady Kaludia i go long CLC Waigani planti manmeri bin kam



• Sir Paulias. Soim gutpela piksa bilong kantri. FAIL FOTO

long harim na lukim em. Kristen redio stesen bilong Mosbi na Sentral provins 93.9 FM i bin rekodim laiv dispela lotu na planti manmeri i harim dispela sevis.

Sir Paulias i toktok strong long dispela lotu olsem long kamapim gutpela sindaun. Famili i mas gat gutpela papa na mama we bai pikinini i lukim na bihainim long stap gut.

"Sapos papa i man bilong dring na bikhet olsem wanem bai pikinini i kamap gutpela man bihain," Sir Paulias i tok.

Em i go het long tok olsem dispela i soim nau olsem kantri sapos i gat gutpela lida ol pipel bai i stap gut. Bihain long lotu em i bin givim wanpela buk em i bin raitim long ol raun bilong em long Israel i go long CLC sios long Waigani.

Ol CLC sios long Waigani i bin givim dispela mani long helpim ol lain kisim bagarap long Esia Sunami bai go insait long PNG Red Cross pasbuk we Sir Paulias i patron na i go pas long dispela sunami apil.



Salim pas i kam long WANTOK Niuspepa P.O. Box 1982, Boro, PNG

Tewae Siassi distrik wetim yet bai ileksen

Painim memba bilong Finsafen

Dia Edita,

Mipela manmeri bilong Finsafen mipela painim yu memba Guao Zurenuoc.

Yu stap we nau? Yu hait long wanem hol bilong ston?

Plis yu kamaut ples klia na tokim mipela olsem mipela gat sampela mani i stap o nogat. Nogut mani bilong mipela em yu pulumapim bel bilong yu istap long Mosbi.

Rot bilong mipela i bagarap olgeta stat long Gagidu na go kamap long Pindiu.

Ol manmeri i gat ol liklik stua ol save wok-about kamap long Gagidu kisim kago satarim ka long K600 go kamap long ples na

long wanem we bai ol wokim win mani?

Plis memba yu lusim Mosbi na kam karim hevi bilong mipela.

Yu pikinini bilong bisop na yu save long tok bilong karim hevi bilong manmeri.

2007 klostu nau traim wokim sampela samting nau.

Mipela harim na lukim nius bilong sampela memba tasol na Finsafen olsem wanem?

Wanem taim bai nem bilong Finsafen bai pairap na ol manmeri bai i stap amamas?

ZINE SEPURU WAU MOROBE PROVINS

Dia Edita,

Mi wanpela man bilong Tewae Siassi distrik. Mi yet mi bilong ples Siwia insait long Sialum. Nem bilong mi Koy Benzia.

Mi askim yupela memba bilong Palamen, bilong wanem na yupela luktuk long em na em i apil long kot na westim taim bilong mipela long bai ileksen. Na tupela yia mipela i stap nating olsem nogat papa na mipela pillim pen inap?

Na gavman inap yu i gat luksave long mipela o nogat? Bikos Mao Zeming i bin i stap memba, em i no bin bringim wanpela sevis na projek i kam insait long Tewae Siassi distrik.

Em aipas man na yau pas man. Taim gavman brukim baset i kam insait long Tewae Siassi distrik, em save i stap long hotel na wokim bisnis bilong em long bia tasol.

Olsem na mipela pipel bilong Tewae Siassi i rausim em long gavman na gavman yu mas rausim em long Palamen.

Na tu Gavana bilong Morobe, Songang Luther Wenge, em kolim nem bilong mipela nating na i nogat luksave long Tewae Siassi distrik. Olsem na gavman yu mas pinisim dispela kot bilong Zeming hariap.

Mipela Tewae Siassi pipel mipela i no

laikim em moa. Mipela rausim em wantaim las yia 2004.

Nau 2005 wantaim nupela laip, nupela pasin na nupela memba. Gavman olsem wanem long bai ileksen bilong ol Enga provins?

Mipela tu laikim olsem na gavman inap yu sori long mipela na inapim belhevi bilong mipela o nogat. Mipela i stap olsem pikinini i nogat papa.

KOY BENZIA SIARUM MOROBE PROVINS



Amamasim Kalsa...Wanpela man long stail bilas bilong em long Goroka So las yia, wanpela so we i save amamasim kalsa bilong Papua Niugini. FAIL POTO/FR PHILIP GIBBS

Mi laikim tru pes bilong Diwai Bisnis

Dia Edita,

Mi wanpela rita bilong Wantok Niuspepa. Mi save baim niuspepa long olgeta Fonde na mi save ritim stori bilong diwai bisnis o forestri.

Taim mi ritim stori bilong diwai, mi stat na mi nesorim pain tri forestri na mi wok long planim.

Olsem na mi laik askim yu, i gat as na ol i putim stori bilong diwai o? Sapos i gat as na ol i putim long nius mi laik askim yu inap givim adres bilong mi na ol i ken rait i kam long mi long adres mi putim daunbilo. Plis mi laikim yu mekim olsem. Em tasol wari bilong mi.

JIM UREBE PO BOX 1226 GOROKA, EHP

Nogat sevis

Dia Edita,

Mi laik sapotim pas bilong wantok hia Anthony Kawi we em i tok nogat developmen i kamap long Angoram eria na Midel Sepik na ol man i sindaun long ol Laun wara tu, Blek wara, Karuri, Biwat, Keram na sampela moa ples nogat sevis bilong gavman.

Taim PNG kisim independens i kam inap nau tru mi no i stap long ples mi stap long Wes Nu Briten hia long Kimbe mi marit na mi gat 10-pela tumbuna pinis tasol mi bin go long ples na mi lukim olsem nogat wanpela sevis bilong gavman long ol man long ples.

Tru tumas komplek bilong wantok hia em i tru. Olsem na mi askim ol manmeri long ples

bai yupela givim X o vot bilong yupela tasol long tupela papa pikinini bai tingim yupela o nogat?

Olsem mi askim tasol yupela lukim em i tingim ol man sindaun long graun na yumi ol manmeri sindaun long yumi yet.

Tarangu man nogat sevis o han mak bilong Sir Michael Somare wantaim Arthur Somare.

Yupela westim taim bilong givim X bilong yupela long tupela olsem na em tasol mi sapotim pas bilong Anthony Kawi. Sindaun long as bilong saksak nogat sevis.

PIUA KAPRIMA KIMBE WES NU BRITEN PROVINS

Ol Simbai noken vot long yia 2007

Dia Edita,

Mi les pinis long mekim kinkain toktok long ol memba bilong Madang, Middle Ramu na praim minista yet.

Yupela save praim minista i no bilong wanpela ples tasol em bilong olgeta lain.

Bethevi bilong mipela em mipela autim pinis long tupela pas.

Nau mi laik tromoi wanpela rabis tingting long ol lida, saveman na ol kukurai long ples Simbai.

Mi no inap long raitim kain pas olsem sapos ol gutpela sevis olsem rot i go long ples.

Lukim em 30 yia nau, mipela stap yet bek long 1920's.

Mipela pipel bilong gavman o gavman em pipel bilong yumi?

Inap yupela ol lida, saveman na ol kukurai wok bung na raitim wanpela pas?

Ol kaunsel presiden na distrik

administreta sainim na wanpela saveman na kukurai tu sainim na salim dispela pepa i go long praim minista wantaim Iektrol Komisn na tok 2007 bai nogat vot inap 30 yia moa.

Sapos yupela mekim na bai gavman i tok wanem long dispela? Mauswara em yupela.

Nogat gutpela kaikai long vot bilong mipela.

Ol Simbai em trupela lain long brukim skru long narapela man na inapim poket bilong em.

Ol lida na ol saveman maski long bebi bebi. Kamap olsem man na yumi stap.

Bikpela tingting yumi straik na nogat ileksen long 2007.

SIMBAI NISKOI MADANG

Sapot long rausim ol LLG

Dia Edita,

Mi bin lukim wanpela lida man bilong Simbu Benson Tiene.

Em i tok taim Michael Somare stap praim minista em putim provinsel gavman na i wok i go gut. Tasol nau tokel level gavman (LLG) paol na i no wok gut.

Olsem na mi sapotim tok bilong em na mi tok rausim LLG na Somare mas kisim provinsel gavman i kam bek.

Somare em papa bilong kantri na em i mas mekim wanpela samting pastaim.

Dispela kantri bilong yumi Papua Niugini ol salim pinis long arapela kantri.

Mani bilong yumi i go daun olgeta tasol nau kina i wok long surik i go antap isi isi.

Mi amamas long Somare na mi raitim dispela pas long Wantok Niuspepa.

Narapela tu Gavana Luther Wenge tok long rausim Masket Iangalio. Yu politik tasol na yu tok.

Masket Iangalio bosim dispela kantri go gut na em orait ol ovasis kantri laik long helpim PNG na gavman bilong Somare.

JAMES M. BAIYER WESTEN HAILANS PROVINS

WANTOK
KOMENTRI

**Papamama
mas pilim sem**

Taim bilong skul i stat long dispela wik na olgeta pikinini i go bek long skul pinis. Tasol bikpela tok em planti skul i sanap strong olsem ol i mas kisim skul fi pastaim long ol pikinini i go insait long klasrum.

Dispela toktok bilong ol skul em bikpela samting bikos las yia planti skul i gat hevi wantaim mani bilong ranim skul.

Planti mani i stap ausait yet bikos planti papamama i no pinisim skul fi bilong ol pikinini bilong ol. Wankain tu skul subsidi bilong gavman tu i no save kam long taim stret na skul i sot tru long mani bilong mekim wok na ranim skul.

Olsem na olgeta kainkain rot ol skul i bin traim long mekim wantaim ol papamama husat i peim hap skul fi em i no wok gut.

Ol papamama i no stretim skul fi i go inap long skul i pinis long 2004. Sampela skul i tok mak bilong mani ol papamama i no peim i sanap olsem K10,000 i go antap.

Dispela em hatpela disisen nau ol skul i mekim na i hat long ol papamama i bekim tok nau bikos asua bilong ol yet long mekim ol skul i kamap wantaim dispela kain sistem bilong ol.

Skul em bikpela samting long ol pikinini bilong yumi bikos bihain taim em ol dispela pikinini bai lukautim kantri bilong yumi. Olsem na ol i mas kisim gut edukesen long tude.

Dispela as, yumi ol papamama i mas amamas na sapotim ol pikinini bilong yumi long lukim olsem ol i go long skul na nogat wanpela samting olsem skul fi mas stopim ol.

Sapos yumi ol papamama i lusim sampela ekstra samting na sevim mani bilong ol pikinini long skul stat long mun Jenuari i go inap long pinis long yia, bai i nogat hevi olgeta long skul fi.

Pasin bilong famili long helpim narapela narapela em bikpela samting tu. Famili i sanap wantaim na sapotim pikinini bai yu ken lukim gutpela ansa long bihain taim.

Edukesen bilong pikinini em bikpela samting na yumi papamama na olgeta famili mas sapotim.



JADA 3/02/05

Stopim pait pasin long famili

PASIN bilong pait insait long famili i save kamapim planti arapela hevi na bagarap long famili na komyuniti olgeta.

Dispela pasin i kamapim planti lo nau we papa paitim mama em lo bai mekim-save long dispela papa o dispela mama sapos em i pait na bagarapim papa.

Tasol bikpela hevi bai dispela pasin i kamapim em long piksa ya bai i go long pikinini na ol tu bai kamap ol bikhet man o bikmeri long pait na mekim trabel insait long famili na komyuniti long bihain taim.

Taim yumi papamama i hatwok long painim kaikai long givim long pikinini i kisim na kaikai, em i save olsem dispela kaikai i kam long papamama na em bai pilim teis na swit bilong em gut tru.

Wankain olsem papamama i kros na pait em bai kisim save gut tru na harim tu olgeta toktok kros na tok nogut i kam aut long maus bilong tupela.

Dispela hevi i kamap bikpela moa yet nau. Yumi mas lukluk long painim olgeta rot bilong daunim na pinisim ol dispela hevi bai i no mas Rot na pasin bilong domestik vailens, paitim arapela, i kamap strong pinis insait long famili na i no isi long daunim na pinisim.

Tasol long toktok, wantaim long bel isi na amamas na kamapim strongpeta laip bilong famili bilong yumi, yumi mas painim olgeta rot bilong daunim na pinisim dispela hevi.

Long daunim olgeta hevi bilong domestik vailens, helpim i mas kam long ol arapela lain ausait long famili. Strongpela singaut bilong mekim dispela



TOK PISIN
wantaim
PETER MAIME

wok i go long ol lain famili, ol pren, ol manmeri bilong sios na komyuniti.

Pasin bilong les na sanap lukluk tasol i save mekim dispela ol hevi bilong kros na pait insait long famili i kamap bikpela moa.

Planti pipel i laik sanap ausait na lukluk tasol na larim dispela hevi i bagarapim tru laip bilong ol arapela, papa na mama na pikinini long famili.

Long strongpela tingting na pasin bilong lukautim ol arapela pipel, ol gutpela manmeri i mas sanap pas wantaim long daunim dispela hevi. Wan wan manmeri i gat dispela hevi insait long famili bilong em, em yet i no inap stretim. Nogat!

Sampela man na meri i stap ausait long dispela famili i gat problem i mas bung wantaim long daunim domestik vailens insait long famili na komyuniti bilong ol.

Planti taim hevi bilong famili pait na kros i no kamap nau tasol. Nogat, dispela hevi i stap bipo, bipo yet insait long famili long tumbuna lain.

Taim yumi lukluk na skelim gut lain bilong dispela famili bipo, ol tumbuna lain, orait bipo yet ol i bin mekim dispela pasin nogut.

Sampela taim yumi ken skelim na luk-save olsem dispela hevi insait long famili i go bek long pasin bilong papamama na tumbuna i mekim tu bipo. Dispela ol hevi i

kamap bikpela long wanpela famili na i save gro i go long ol narapela famili i kamap bihain. Pasin nogut o mekim nabaut pasin (papa i paitim mama, mama i paitim papa, o paitim pikinini oltaim) i save kamap long olgeta hap long bodi, insait long bel na pilim, long bodi, long het na tingting tu. I olsem, kainkain we bilong bagarapim arapela, mama o pikinini i stap.

Pasin nogut o mekim nabaut pasin i save gro insait long famili na ples we ol papamama ol yet tu i bin bungim dispela hevi bipo long laip bilong ol taim ol i pikinini yet insait long famili.

Rot i stap bilong daunim dispela pasin nogut na domestik vailens o pait long famili.


Taim dispela problem i stap insait long famili, dispela famili yet i no inap rausim. Na tu, kastam bilong yumi i olsem, ol pipel i no save lukluk i go insait long bisnis bilong narapela famili. Dispela kastam i gutpela taim wanpela famili i no gat hevi. Bikpela samting em yumi mas stopim ol na givim sampela tokstia o tok skul long ol.

Husat i kamapim pasin nogut o pait pasin i mas lainim long stretim tingting nogut na pasin nogut bilong em.

Husat i kisim bagarap bilong dispela pasin i mas tainim olsem long kisim helpim bai stretim laip bilong em yet na famili bilong em. i gat lo i stap tu long man o meri husat i kisim bagarap long dispela pasin i mas go long en long kisim helpim na dispela tu inap givim gutpela skul long ol.

Lida i pre long Palamen Haus

LONG las wik mi bin tok olsem, mipela manmeri laikim eksen Lida long 2005. Na mi bin lukim long Fonde Januəri 27, 2005, National Niuspepa i tok long Lida olsem Welfare and Social Development Minista Dame Carol Kidu na Minista bilong Tourism David Basua na Inter Government Relations Minista Sir Peter Barter, Tresera Bart Philemon na Defence Minista Mathew Gubag, dispela ol lida i bin bung long



**OL PRINSIPOL BILONG
GUTPELA LIDA**
wantaim
Pastor na Evangelist
OHARE JABERE

Palamen Haus na pre. Long tingting bilong mi olgeta Lida bilong Palamen i mas mekim olsem olgeta de, em gutpela tru. Tenk yu God.

Dispela i no isi long wanem ol kristen Lida i

wokman bilong God na ol i wokman tu bilong helpim ol man.

Ol Lida i no save lusim wok bilong God na mekim wok bilong ol man tasol. Nogat.

Ol i mas bihainim laik bilong God na mekim

wok bilong God na helpim ol man wantaim. God i mas i stap nambawan long laip bilong ol. Olsem na sapos sampela man i laikim kristen lida i sakim tok bilong God, ol i no ken harim tok. Kristen i mas bihainim tok bilong God tasol.

"Man i laik i stap bikman namel long yupela, em i mas i stap wokman bilong yupela na man i laik namba wan long yupela em i mas i stap olsem wokboi nating bilong olgeta man".

(Mak 10:43-44) Yupela i save olsem, hatwok yupela i save mekim long Bikpela, em bai i no inap lus nating olsem na oltaim yupela i mas wok strong long mekim wok bilong Bikpela - Korim 15:58.

Long dispela yumi lainim wanpela samting; Nem na namba yumi holim i mas i gat wanpela mining na astingting.

Gutpela Nem bilong yu em i go wantaim gutpela wok bilong yu Lida.

WANTOK

Published Weekly, Wednesday, for Word Publishing Company, Ltd.

P.O. Box 1982, Boroko, NCD
Papua New Guinea

Telephone: 325 2500

Fax: 325 2579

Email: word@global.net.pg

Pe bilong wanpela yia
52 niuspepa

Ples:	Air:
PNG	K140.00
AUSTRALIA	US\$100.00
ASIA PACIFIC na JAPAN	US\$80.00
AMERICA na EUROPE	US\$150.00

General Manager
Justin Hansu Kili

Editor
Yakam Kelo

Published by Jeremy Burgess and printed by Pacific Star-P.O. Box 6817 Boroko NCD at allotment 13 section 38 Waigani drive, Port Moresby

Word Publishing Company Limited is owned by the four major churches of Papua New Guinea: Catholics 50%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Ltd and are set out full on the display advertising form.



Toi Soldia?

Irak: Wanpela foto i soim wanpela pait grup ol i kolim Mujahdeen Squadrons long Irak i holim pasim wanpela soldia bilong Amerika. Tasol sampela ripot i tok olsem dispela em i no man tru tasol toi man we ol i save salim long ol militeri bes long Midel Is. Foto: AFP/DFP



Turangu

Sudan: Dispela ol pipel bilong Sudan i wet long kism kiskai bilong ol long Wol Fud Program long Kalna Kem long Darfur. Foto: AFP/ATL/Jose Candia



Raskol Kilim Man

Mexico: Ol polis opisa i skelim dai bodi bilong wanpela man, Gerardo Torres, husat i gat 42 krismas. Sampela man nogut i bin sutim em dai wantaim gan klostu long dua bilong haus bilong em long tauri bilong Ciudad Juarez long Februari 1, 2005. Foto: REUTERS/J GUADALUPE PEREZ



Pope i sik

Rome: Pope John Paul 2 i bin go long haus sik long Februari 1, 2005 ol ripot i tok bihain long em i bin kism sik influenza long Sande. Long dispela foto Pope i lukluk long wanpela pisin ol i save kolim dove long Vatiken long Januari 30. Foto: MAX ROSSI/REUTERS



Sanap Was

Kolombia: Sampela soldia bilong Kolombia i sanap was long wanpela bay we ol palaman i save mekem ol bom long bay dua bilong Casanare Province, long distrikt en Kolombia long Februari 1, 2005. Foto: AP/KIM HULSEGO



Wok Bung Wantaim

Amerika: Sekretar bilong Stat bilong Amerika, Condoleezza Rice i tok olsem ilaksem bilong Irak, sapos em i kamap gut, bai juranim gutpela tingting bilong ol kantri long wok bung wantaim. Foto: AFP/LUKE FRAZZA



Stap Isi

Israel: Sampela soldia bilong Irak i holim pasim wanpela man em i protes long bel isi long Wes Benk bilong Hebron. Foto: NAYEF HASHLAMOUN/REUTERS

Maunten Yabu belhat yet

...ol pipel lusim ples Manam ailan na go long bikples Bogia

Michael Novingu i stori long kain laip ol pipel long Manam ailan i bungim bihain long ailan bilong ol i pairap na bagarapim ples.

MANAM Ailan i gat moa long 10,000 manmeri stap long mak bilong graun we i gat 83 skuwe kilomita raunim 15 ples olgeta. Namel long ol manmeri bilong Manam Ailan, 50 na 60 pesen em ol pikinini krismas bilong ol aninit long 18 krismas.

Manam ailan i stap long not is long Madang 200 kilomita longwe long Madang taun na tupela aua long ron long ka i go long kamap long Bogia. Long namba 20 senseri, Yabu maunten long Manam ailan i save pairap strong tru 23 taim olgeta tromoi das, hotpela ston, wara i save i kam olsem ren na i save kamap olgeta taim.

Nambawan taim maunten Yabu i bin pairap long yia 1616. Bihain long dispela, maunten i stat pairap long 1974 i tromoi ol hot ston bilong maunten paia na hotpela graun wara. Long mun Oktoba 1994, taim em i pariap i bin bagarapim ples Budua na i bin kilim i dai 13-pela manmeri.

Long namba 24 de bilong mun Oktoba, 2004, taim olsem 10-kitok

Taim mipela i kamap long Bogia i apinun pinis na mipela i no inap i go long Manam ailan. Mipela slip long Bogia wanpela nait na long moning mipela i go long Manam Ailan. Mipela i painim wanpela spit bot long i go. Laki tru mipela i bungim bosman bilong Nesenel Woks Dipatmen Daniel Muturam wantaim tupela opisa bilong disasta long Madang na mipela i go wantaim long Manam.

I kisim olsem 45 minit long ron i go long Manam Ailan. Taim mipela i ron na lukluk i go antap long maunten Yabu, mipela i lukim em i tromoi bikpela bilakpela smok na das i kam daun long sait bilong Boda, Kuluguma, Yasa, Balisu.

Ol dispela ples i kisim taim nogut tru. Kwik taim mipela i kisim ol hap laplap na karamapim ol nus bilong mipela nogut mipela i pulim das i go insait long nus bilong mipela. Taim mipela i kamap long Bien Katolik Misin Stesen, mipela i lukim Distrik Edministreta bilong Bogia Nigel Ness wantaim ol opisa bilong em i stap

ken lukluk stret i go long wanem olgeta diwai na gras i drai pinis, ples i pulap long das na i luk olsem wanpela bikpela ples drai. Mi wokabaut namel stret long dispela ples drai na mi ting mi stap long ol kantri bilong Midel Is, tasol nogat. Em Manam Ailan ya.

Taim mi kamap long haus bilong wod kaunsela bilong Kuluguma ples Charles Paise mi pilim bikpela bel wari tru long wanem mi tu mi lukim long ai bilong mi wanem samting i kamap. I no long taim narapela volantia wokman bilong Red Cross Marcus Apo i kam bek wantaim ripot em i kisim long Baliau ples i soim wankain olsem ripot mi kisim long Boda na Kuluguma ples.

Tim bilong mipela i lusim Bien Katolik Misin na mipela i go baksait long ailan long lukim ol arapela ples Dangale, Kolang wan na tu, Bokure wan na tu, Abaria na Warisi. Ol dispela ples i stap aninit stret long maus bilong maunten we paia i save kam ausait. Ol dispela ples i kisim bikpela

long Madang long nait.

Bihain long tupela wik, Yabu maunten i bin pairap gen. Dispela pairap i bikpela tru, yu ken harim pairap bilong em olsem enjin bilong jet balus, na i tromoi smok i go antap mak olsem 9 kilomita long we bilong em we i kamaut kisim bikpela Bogia tu.

Dispela pairap tasol i givim bikpela bilakpela smok na bilakpela ston o stori we i bagarapim olgeta pipel na olgeta samting bilong ol long haus, ol gaden kaikai na ol arapela samting. Long dispela pairap i nogat wanpela manmeri i lusim laip o i dai. Mi laik tok tenkyu long ol lain manmeri we mi yet mi i go pas long skulim ol las yia long wanpela trening we Wol Visin na Red Cross i bung wantaim na skuom ol long we bilong lukautim ol yet. Long we bilong lukautim ol long taim bilong bikpela bagarap. Dispela trening tasol i helpim ol na ol i karimaut long abrusim dispela bikpela birua i kamap long ol.

Dispela trening mipela i kolim Komyuniti Bes Disasta Menesmen (CBDM). Mipela i ranim long 15-pela ples olgeta insait long Manam ailan. Las wik, Madang Provinsel Gavman wantaim Provinsel Disasta opis i haiarim MV Motuan Chief, wanpela bads bilong Steamship Kampani we Lutheran Shipping Kampani i kisim i kam bilong karim ol pipel sut long Manam ailan long i kam stap long bikples Bogia long gutpela hap inap paia i pinis bai ol i go bek long asples bilong ol.

Mi stap long tim bilong dispela lvekuesen Eksesais o wok bilong muvim ol pipel i kamaut long Manam ailan. Mipela i muvim pinis moa long 5000 manmeri na pikinini kamaut pinis. Ol i stap nau long ol kea senta. Long Bogia ol dispela kea senta em Potsdam, Asuramba na Magem. Mi lukim ol pipel i kra i sore tru taim i laik lusim asples bilong ol. Ol i tok bai mipela i kam bek o nogat.

Long taim mipela i muvim ol pipel bilong Kuluguma ol i karim ol pot, plet, spun, tamiok na o narapela samting bilong ol. Ol pik, dok, kakaruk tu ol i karim wantaim. Ol i katum tu ol mambu bilong wokim ol sel haus. Ol sampela manmeri i no laik long kamaut tasol ol polis i go insait na rausim ol i kamaut long ples bilong ol na i go antap long sip.

Sampela ol i kra i long lusim ples bilong ol long wanem em i nambawan taim bilong ol. Wanpela lapun man i tokim mi em i lukim maunten paia i kamap long yia 1967, we i kilim papamama bilong em na sampela ol arapela wanlain bilong em. Em planim tupela na em i no laik long lusim matmat bilong tupela i go longwe. Em i tok em i laik stap na i dai long ples bilong em.

Taim mi sanap antap long das, mak bilong das i pundaun antap long graun. Em i antap long wan mita na 7-pela sentimita longpela. Ol kaikai i groa aninit long graun olsem kaukau, taro, yam na ol arapela kaikai i bagarap pinis i strong olsem ston.

I no moa gutpela long kaikai. Nau yet long tripela kea senta long Potsdam, Asuramba na Magem moa long 5000 manmeri na pikinini i stap.

I gat ol helt wokmanmeri i stap long lukautim ol long sait bilong sik, ol polis long sait bilong loa na oda na ol arapela gavman wokmanmeri i stap long givim ol arapela sevis.

Ol Red Cross tu i stap long ol kea senta long lukautim ol long sait bilong wara na haus bilong slip long olgeta kea senta.



• Ol lain Manam i kamaut long MV Motuan Coast Chief bihain long maunten Yabu i pairap na bagarapim ples. Ol nau pipel i sindaun long wanwan ol hap long Bogia. Foto: MICHAEL NOVINGU

moning, maunten Yabu long Manam Ailan insait long Madang provins i pairap na tromoi hotpela ston wantaim das na hotpela wara i kam daun na i bagarapim ol pipel bilong Manam Ailan. Na tu i bagarapim ol gaden kaikai, wara bilong dring, kukim kaikai, haus na ol arapela samting moa long 10,000 pipel i kisim bagarap long dispela birua.

Hia *Wantok Niuspepa* i bin go raun long Manam Ailan na lukim wanem samting i bin kamap na ol pipel i bin kisim taim nogut tru. Mi bin kirap nogut taim mi harim olsem maunten Yabu long Manam Ailan i pairap.

Mi kam long disasta opis long Madang long painim aut dispela em i tru o nogat.

Long dispela taim mi bin bungim bosman bilong Red Cross Brens long Madang, James Dagen na Marcus Apo. Mi wok olsem volantia wokman bilong Red Cross long Madang. Tupela wantaim ol opisa bilong Disasta i tokim mi olsem i tru Maunten Yabu long Manam Ailan i pairap long aste (namba 24 de bilong mun Oktoba, 2005). Kwik taim tru mipela i painim wanpela ka we mipela i haiarim long K300 long kisim mipela i go long Bogia na kam bek.

pinis. Em i givim mipela namba bilong hamas ol manmeri na ol samting i bagarap.

Mi lusim ol na mi go karimaut wok painimaut long wanem samting i bin bagarap long dispela hap, mi sekim ol wara tank bilong skul na helt senta i pulap long das, bilakpela das i pundaun antap long haus kapa bilong skul, na haus sik na tu long haus bilong ol pipel i stap long Bien Katolik Misin. Ol hulwara bilong ol pipel i bagarap i pulap long das we i no gutpela long dring, kukim kaikai na waswas long em.

Long dispela taim Bien komyuniti skul top ap pasim na salim ol pikinini i go long haus long stap aninit long lukaut bilong ol papamama bilong ol.

Mi go long haus sik na sekim bosmeri bilong ol, Sista Julie Aramu we em i tokim mi olsem das i bagarapim tru haus sik na marasin i sot tu na bai mi mekim wanem taim ol manmeri i kisim bagarap long maunten paia i kam long kisim marasin. Mi sekim Boda ples we mi lukim das i kam daun wantaim bilakpela wesana o stroia we i bagarapim ol gaden kaikai, wara, haus na ol arapela samting. Mi wokabaut i go long kuluguma ples em hapsait tasol long Boda ples. Mi

bagarap tru taim em i tromoi lava na ol hotpela ston wantaim hotpela wara i kam ausait na i kilim i dai olgeta gras, brukim haus na bagarapim tru ol gaden kaikai.

Mipela i kam bek na kisim malolo long Katolik misin stesen long Tabele. Mi lukim ol lain long dispela hapsait long ailan i amamas na karimaut nomel laip bilong ol. Ol pikinini i waswas long solwara, sampela ol i go painim pis, na sampela ol i wokim haus na gaden. Mi askim wanpela yangpela manki bilong ol, yupela i no pore long maunten paia i wok long tromoi smok i kamaut? Em i tok dispela samting i no namba wantaim bilong mipela. Mipela i kamap o bon wantaim dispela samting. Em i laip stail bilong mipela.

Sapos maunten paia i laik kilim mipela, mipela i amamas long dai long ples bilong mipela, na em i laik larim mipela, em i orait.

Bihain mipela i kam lukim ples Dugulava, Waya, Madauri, Zogari, Yasa tu i wankain bagarap olsem ol arapela ples i kisim na mipela i go lukim Boisa ailan tu. Dispela liklik ailan we i gat 1000 manmeri i stap orait, tasol ol i pore i stap. Mipela i kam bek long Bogia na i kam bek



• Solomon Harry wantaim liklik susa bilong em Konio i painim ol skul samting long Theodist stua.



• Esther Kipit, husat bai go skul long Vudal Yunivesiti, i painim ol skul samting long Theodist stua tu.



• Ol papamama i sanap long lain long BSP Benk long Waigani long baim ol skul fi.



• Mama wantaim tupela pikinini meri i sindaun na tingting long skul fi i stap long Coronation Skul.



• Ol sumatin bilong St Peters, Erma, wokabaut i go insait long skul banis.



• Ol i amamas long bungim gen ol poro bilong ol. Ol foto: JOE IVAHARIA

Sunami Musik Konset soim strong bilong PNG musik

Neville Choi i raitim

SUNAMI Sariti Musik Konset we i bin kamap las wik Sarere bilong resim mani bilong helpim ol pipel bilong Saut Is Esia i bin mekim inap long K5,807 long ol tiket ol i salim, na mani ol wanwan manmeri na grup i bin givim.

Event Menesa bilong Total Event Company, ol lain i go pas long stretim dispela musik konset, i mekim K4,750 long ol tiket ol i salim.

As Bisop bilong Pot Mosbi Sir Brian Barnes i bin givim K50 bilong helpim na Pot Mosbi Siti Misin i bin givim K1007 mani ol i mekim long fan resing bilong ol yet.

Planti long ol musik grup na atis i bin givim musik na nek bilong ol long resim mani bilong helpim ol Saut Is Esia manmeri i kisim bagarap.

King bilong Pasifik Musik na biknem musik atis bilong PNG yet, Patti Potts Doi, i bin go pas na wanbel wantaim dispela musik konset.

Man husat bai kamaut wantaim wanpela nupela musik albam bilong Quakes na wanpela nupela solo albam bilong em long dispela yia i no bin tingting planti long pilai musik bilong helpim ol lain i kisim bagarap.

"Total Event Kampani yet i bin raitim wanpela pas na askim mi long go pas long wanpela musik konset bilong helpim long resim mani bilong helpim ol lain turangu i kisim pen na indai long dispela bagarap i kamap long Saut Is Esia.

"Mi yet mi save long hevi ol manmeri i save karim long taim bilong ol kain bikpela bagarap olsem bilong wanem mi bilong Manam we bikpela hevi i stap wantaim ol manmeri long hap, na tu mi bilong Rabaul tu we bikpela birua bilong maunten pairap i bin kamap.

"Mi pilim hevi ol dispela turangu i karim na mi pasim tingting long mekim wanem samting mi ken mekim long helpim ol. Olsem na olgeta ben i bin pilai long dispela musik konset i givim taim na servis bilong ol na i no long kisim mani. Nogat. Olgeta mani i go long ol lain

bilong salim i go long ol manmeri long Saut Is Esia," Potts i tok.

Wanbel i bin stap long stat bilong Sariti Fan Resing Konset taim As Bisop bilong Pot Mosbi, Sir Brian Barnes i bin opim konset wantaim wanpela prea na em i askim bikman bilong lukluk long ol lain i stap long taim nogut long ol ples i kisim bagarap long dispela bikpela solwara nogut.

Bihain long en wanpela liklik meri Sri Lanka i bin mekim danis tumbuna bilong ples bilong em we i bin stail tru na stilim lewa bilong ol manmeri na pikinini husat i bin lukim.

9-pela musik atis na grup i bin pilai long sariti konset. Tasol i no ol tasol i bin winim laik bilong ol lain manmeri na pikinini.

Pani man Mista Bean bilong PNG yet i bin mekim liklik pani bilong em.

Ol manmeri i bin lap indai bilong wanem dispela man i ektim Mista Bean i makim olgeta samting i luk wankain tru.

Stail bilong ol yangpela kalsa



• Biknem ben bilong Mosbi, *Extensions*, i kirapim skin bilong ol manmeri.




• As Bisop Sir Brian Barnes i prea long opim konset.



• Dispela yangpela meri i soim stail bilong danis.



• Potts, amamas long lukim ol yangpela musik atis.



• Mista Bean bilong PNG i gat namba. Ol foto: NEVILLE CHOI

grup tu i bin kamap wantaim ol lain bilong Kinimura Danis Grup, Siale Danis Trup na Tamariki Danis Grup.

Olgeta i bin soim stail bilong ol na kala bilong ol wantaim ol stail danis na bilas we i amamasim ol manmeri na pikinini.

Ol manki bilong City Mission tu i bin givim liklik kontribyusen bilong ol wantaim tupela singsing. Ol i bin soim bikpela laik bilong ol long givim helpim.

Potts yet i bin amamas long olgeta musik atis husat i bin givim taim bilong ol long pilai long dispela sariti musik konset.

"Mi bin amamas tru long ol yangpela musik atis mi bin lukim.

"I gat planti ol nupela musik atis we mi lukim ol i gat strong bitong pilai musik.

"Dispela em i wanpela gutpela liklik eksperiens ol i kisim long sait bilong pilai long ai bilong ol manmeri.

"Em i gutpela we ol i traim. Bikos long bihain taim, ol bai go pas long musik insait long PNG," Potts i tok.

Banned i strongim save bilong mekim musik

WEBSAIT bilong ol i tokaut strong pinis olsem 'go hard or go home' bilong wanem stail bilong musik bilong ol i no bilong ol lain husat i save laikim ol isi musik. Ol dispela lain em ol bikhet lain na ol i save pairapim strongpela musik insait long Pot Mosbi na mi save ol i mas gat wanpela kain paol rot bilong tingting tu ya.

Ol dispela lain Banned i save strongim bek ol singsing bilong 25 yia i go pinis na ol bikpela rok singsing bilong 1980s.

Websait bilong ol i tokaut olsem 'wanpela nupela taim i kamap insait long PNG wantaim Banned - 4-pela man na wanpela meri i save pilai rok musik i kam long Pot Mosbi'.

Olgeta dispela lain i save laikim hevi metel musik...em ol musik bilong 80s olsem ol singsing bilong Bon Jovi, Guns N Roses, Black Sabbath, U2 na ol arapela bikpela rok en rol ben bilong dispela taim.

Websait bilong ol, www.banned.altpro.net i tokaut olsem Banned em i wanpela kava vesens ben o ben i save pilaim musik bilong ol arapela ben. Ol i go pas long mekim samting we nogat planti arapela musik ben insait long kantri i save mekim. Long go strong long hevi metel musik wantaim nek bilong meri.

Lid gita man Reckless i tokim mi olsem ol singsing Banned i save pilai em ol Jeneresen X manmeri bilong bipo na ol lain husat i save laikim musik bilong kutele bai laikim.

"Ol musik bilong mipeta bai karai gut long iau bilong ol lain husat i bin kamap long 1970s na bikpela long 1980s long taim bilong hevi metel."

Reckless em i nem bilong Malcolm Kulu bilong Hoskins long Wes Nu Briten husat i kisim skul long musik bilong ol

Briten, em i save bihainim drams stail bilong Lars Ulrich bilong Metallica na Matt Sorum bilong Guns N Roses. Em i stat long pilai drams long 1992.

Bihain long wanpela gitaris i bin pulaut, Lauza i askim Caleb husat i bin laik wankain stail bilong musik tu.

Caleb, arapela nem em i save yusim em Stamz em wanpela manki bilong Hohola na i save pilai ridim gita. Em i bin stat pilai long 1995 yet. Taim olgeta arapela lain i wok long harim musik bilong George Telek, Quakes, Barike

i bin namba 5 meri solo atis we planti manmeri bin ting olsem em i gat namba long sait bilong musik. Nem bilong em i bin pairap wantaim ol arapela nem olsem Loujaya Kouza, Cathy Lee, Rabbie Gamenu na Aida Paska.

Mi ken tingim yet taim mi save pilaim ol singsing bilong em long Kalang FM radio long stat bilong 1990s. Wanpela singsing bilong em i bin kamap long PNG Top 20 tu.

Coleen i bin bung wantaim Patti Potts Doi tu long rekodim singsing Mama we i stap long albam Rama Eno.



• Banned.

hevi metel rok ben olsem Guns N Roses, Metallica na Megadeth.

Mal i gokaut olsem "ol memba bilong Banned i save harim na laikim grans na hevi metel na as long kamapim dispela ben em long givim sans long ol lain husat i save laikim dispela kain musik we ol i ken harim wanpela PNG ben yet i pilaim."

Em i tok Banned i ken pilaim olgeta musik i stat long singsing bilong Poison, Mama's Fallen Angel i go inap Living On A Prayer bilong Bon Jovi, na What's Up bilong 4 Non Blondes.

Em i tok ol i ken pilaim ol singsing bilong Blink 182, The Atari's, Lifehouse, Hoobastank na ol arapela metel na rok grup.

Tingting bilong kamapim wanpela ben i kamap taim Malcolm na bes gitaris Gibbo bilong Nu Allan i bin skul long Unitech long 1995 i go inap 1998. Bihain long ol i lusim yunivesiti, ol i bin traim statim wanpela ben tasol nogat.

"Long mun Ogas las yia Gibbo na mi i pasim tingting long bungim wanwan ol manki na traim pilai wantaim sista bilong mi, Coleen husat i save singsing," Malcolm i tok.

Bihain em i toktok wantaim Mark husat i save yusim nem Lauza na givim em long drams.

Taim Lauza i wok long bikpela long 1980s long ples bilong em long Kokopo, Is Nu

na ol arapela, Caleb i wok long hait na harim musik bilon Steve Vai, Yngwie Malmsteen na Eric Clapton.

Banned i no save pilai strongpela musik tasol. Namel long ol brek bilong ol, ol i save pilaim dijei musik bilong ol we DJ bilong ol yet, DJ Jonah Jones o arapela nem bilong em DJ3.

Mama bilong em Miriam bilong Sentrel na papa Camillus bilong Is Nu Briten i bin karim em long 1980. Ating Mista na Misis Midire i no bin save olsem pikinini man bilong ol bai kamap wanpela biknem DJ insait long ol nait klab bilong Pot Mosbi.

Na Banned i gat saun teknisen bilong ol yet, Renster husat i bin rausim de we mama i bin karim em long bet setifiket bilong em.

Renster i tok em i no bisi long hamas krismas bilong em. Em i amamas tasol long pilai musik bilong wanem em i ken lus tingting long krismas bilong em.

Wanpela meri tasol insait long dispela ben em Coleen Kulu.

Coleen, o Guytax i bin kamap wanpela yia pastaim long kantri i kisim independens na tupela yia pastaim long brata bilong em Malcolm. Em i no nupela insait long musik indastru bikos em i rekodim pinis wanpela albam wantaim CHM Supersounds studios long 1992.

Guytax i bin save laikim hevi musik long dispela taim na em

"Mipela olgeta i save wok bung gut bilong wanem Renster na Gibbo em ol brata, Guytax na mi yet em brata susa, Lauza na DJ Jonah Jones em ol kandre, na Stamz i stap klostu tasol long Lauza," Malcolm i tok.

Gibbo, Guytax na Mal i bin go long wanpela praimari skul we Gibbo na Guytax i bin stap long wanpela klas tupela yia pastaim long Reckless.

"Mi na Lauza i bin go long Passam Nesenel Hai Skul wantaim na mipela bin pilai long wanpela ben ol i kolim Anarchists husat i bin pilaim wankain musik Banned i save pilaim nau," Reckless i tok.

Olgeta memba bilong Banned i gat wok tasol ol i save laik pilaim laip musik.

Long mun Oktoba 2004, Banned i bin traim pilai long Shady Rest Hotel na long mun Novemba ol i bin kisim taim bilong pilai long Mustang Sally's.

Nem bilong ben i bin kamap taim ol i wok long pilai i stap long wanpela apinun na Lauza i tok sapos ol i bin pilaim sampela singsing bilong ol long Ice Discovered, ating ol jas bai tok, "You are so Banned you are."

***Yu ken ritim stori blong ol musik man/meri long What's On With Raitman insait long POST COURIER tasol, Trinde, olgeta wik.**

EMTV GAID

Fonde 03/02/05

- 5:30 JOYCE MEYER MINISTRY
- 6:00 TODAY SHOW
- 9:00 MALOLO CLUB
- 11:00 CREFFLO DOLLAR
- 11:30 DR PHIL
- 12:30 EMTV PRIME TIME LINE UP
- 4:57 EMTV TOKSAVE
- 5:00 THE PRICE IS RIGHT \$100,000 SUPER SHOWCASE
- 6:00 NATIONAL EMTV NEWS
- 6:30 A CURRENT AFFAIR
- 6:59 LOTTO DRAW
- 7:00 CHM SUPER SOUND
- 7:57 EMTV TOKSAVE
- 8:00 FEAR FACTOR
- 9:00 WITHOUT TRACE
- 10:00 RUBY WAX with JIM CAREY
- 10:30 EMTV NEWS REPLAY
- 11:00 WALKER TEXAS
- 12:00 NIGHTLINE
- 0:30 STATION CLOSE

Mande 07/02/05

- 5:00 JOYCE MEYER MINISTRY
- 6:00 TODAY SHOW
- 9:00 CREFFLO DOLLAR
- 10:00 DR PHIL
- 10:20 CLASSROOM BROADCAST
- 2:30 KIDS KONA
- 4:57 EMTV TOKSAVE
- 5:00 THE PRICE IS RIGHT
- 6:00 NATIONAL EMTV NEWS
- 6:30 A CURRENT AFFAIR
- 6:58 TOK PISIN NEWS UPDATE
- 7:00 LOTTO DRAW
- 7:01 PRAISE
- 8:00 THE APPRENTICE
- 9:00 WHO WANTS TO BE A MILLIONAIRE
- 10:30 EMTV NEWS REPLAY
- 11:00 CHM SUPERSOUND
- 12:00 NIGHTLINE
- 12:30 CLOSE

Fraide 04/02/05

- 4:59 STATION OPEN
- 5:00 CREFFLO DOLLAR
- 5:30 JOYCE MEYER MINISTRY
- 6:00 TODAY SHOW
- 9:00 CREFFLO DOLLAR
- 9:30 DR PHIL
- 10:30 PRIME TIME LINE UP
- 1:00 ONE DAY SERIES FINAL
- 4:57 EMTV TOKSAVE
- 5:00 THE PRICE IS RIGHT \$100,000 SUPER SHOWCASE
- 5:30 CRICKET CONTINUES
- 6:00 NATIONAL EMTV NEWS
- 6:30 A CURRENT AFFAIR
- 6:58 NEWS UPDATE TOK PISIN
- 6:59 LOTTO DRAW
- 7:00 CRICKET CONTINUES
- 9:00 FRIDAY NIGHT MOVIE: KNIGHT MOVES
- 10:30 EMTV NEWS REPLAY
- 11:00 NIGHTLINE
- 00:30AM STATION CLOSE

Tunde 08/02/05

- 5:29 STATION OPEN
- 5:30 JOYCE MEYER MINISTRY
- 6:00 TODAY SHOW
- 9:00 CREFFLO DOLLAR
- 9:30 DR PHIL
- 10:20 CLASSROOM BROADCAST
- 1:15 CRICKET
- 5:00 THE PRICE IS RIGHT
- 5:30 CRICKET CONTINUES
- 6:00 NATIONAL EMTV NEWS
- 6:30 A CURRENT AFFAIR
- 6:58 TOK PISIN NEWS UPDATE
- 6:59 LOTTO DRAW
- 7:00 CRICKET CONTINUES
- 9:00 HOLIDAY SHOWDOWN
- 9:27 EMTV TOKSAVE
- 10:00 THIRD WATCH
- 11:00 EMTV NEWS REPLAY
- 11:00 ER
- 00:00 NIGHTLINE

Trinde 02/02/05

- 00:30 STATION CLOSE
- 6:29 STATION OPEN
- 5:30 JOYCE MEYER MINISTRY
- 6:00 TODAY SHOW
- 9:00 CREFFLO DOLLAR
- 9:30 DR PHIL
- 10:20 CLASSROOM BROADCAST
- 2:30 KIDS KONA
- 4:57 EMTV TOKSAVE
- 5:00 THE PRICE IS RIGHT
- 6:00 NATIONAL EMTV NEWS
- 6:30 A CURRENT AFFAIR
- 6:57 TOK PISIN NEWS UPDATE
- 6:59 LOTTO DRAW
- 7:00 WORLD OF WILDLIFE
- 7:30 MCLEOD'S DAUGHTERS
- 8:57 EMTV TOKSAVE
- 9:00 WEDNESDAY NIGHT MOVIE: US MARSHALL
- 11:00 SOUTH PACIFIC MUSIC
- 11:30 EMTV NEWS REPLAY
- 12:00 NIGHTLINE
- 12:30 STATION CLOSE

Sarere 05/02/05

- 7:00 BARNEY
- 7:30 JAYJAY THE JET PLANE
- 8:00 PLANET FANTA
- 9:30 DOWNLOAD
- 10:00 SO FRESH
- 11:30 X TEAM
- 12:00 SURFSPORT
- 1:00 THEY MUST BE MAD
- 1:30 MANEATER
- 2:30 SATURDAY AFTERNOON MOVIE: THE GLASS BOTTOM BOAT
- 4:30 THE CAR SHOW
- 5:00 ESCAPE WITH ET
- 5:30 FISHING AUSTRALIA
- 6:00 NATIONAL EMTV NEWS
- 6:30 AUSTRALIA'S FUNNIEST HOME VIDEO SHOW
- 7:00 SPY TV
- 7:30 AIRLINE
- 8:00 SOUTH PACIFIC MUSIC
- 10:00 HECULES
- 11:00 EMTV NEWS REPLAY
- 11:30 THE LEGENDARY HIDDEN CITY
- 0:10 KING OF QUEENS
- 00:40 CLOSE

Sande 06/01/05

- 6:59 STATION OPEN
- 7:00 WORLD OF WILDLIFE
- 7:30 BUSINESS SUCCESS
- 8:00 BUSINESS SUNDAY
- 9:00 SUNDAY
- 11:00 THE PACIFIC WAY
- 12:00 SURFSPORT
- 1:00 ONE DAY SERIES CRICKET
- 6:00 NATIONAL EMTV NEWS
- 6:30 CRICKET CONTINUES
- 9:00 MOVIE: THREE KINGS
- 11:00 EMTV NEWS REPLAY
- 11:45 PRAISE
- 00:45 STATION CLOSE



Fear Factor
Fraide, 8.00



CSI
Mande 9.30pm

NATIONAL WEEKLY HIT PARADE

YUMI FM NATIONAL WEEKLY HITPARADE

Sarere Februari 9, 2005 Twisties i sponsa

Singsing	Musik Atis	Dispela Wik
Lili	Itambu	1
Mi no biksot yet	Dadii Gii	2
Kande	Dadii Gii	3
Towescop	Itambu	4
Kudougu	Vanessa Q	5
Dimigura	Bits & Pieces	6
fti Bayama	Armstrong	7
Sigi Mangi	Grumo Masalai	8
Sweet Karanas	O-shen	9
Na Wonde	Tom Lari	10
Lewa	Hausboi	11
Kina.com.pg	Simbary	12
Veuka	Pune Kapa	13
Jombie Kunex	New Painim Wok	14
Sharon	Uralom Kania	15
Yu Olsem San	Friends That Care	16
The Way	Soul Harmony	17
Part Time	X-Anats	18
Manipure	Pongoros	19
Naike	Hausboi	20



Laikim Penpren

Nem: Sarsha Truapa Robine
Krismas: 21 (meri)
Adres: PO Box 6668, BOROKO, NCD
Save laikim: Pilai spots, stori wantaim ol pren na ritim buk.

Nem: Malcolm Yaken
Krismas: 21 (man)
Adres: Aitape Vocational Training Institute, PO Box 34, Vanimo, Sandaun Province
Save laikim: Ronim ka, kaikai buai, stori wantaim ol pren na raitim pas.

Nem: Iddie Namur
Krismas: 25 (meri)
Adres: C/- PO Box 447, Kimbe, West New Britain Province
Save laikim: Harim musik, go lotu, waswas long nambis, kukim kaikai, stori wantaim ol pren na raun long arapela ples.

Nem: Melanie Spycoon Zawa
Krismas: 19 (meri)
Adres: C/- PO Box 447, Kimbe, West New Britain Province
Save laikim: Skelim ol namba bilong musik, kaikai buai, waswas long nambis, raun wantaim ol pren, pilai basketbol na volibol, kukim kaikai, go lotu, lukim muvi na tok pilai.

Nem: Cyprian Keno
Krismas: 27 (man)
Adres: Tinputz District Office, PO Box 343, Bougainville, NSP
Save laikim: Tok pilai, mekim penpren, harim musik, mekim pren wantaim ol manmeri bilong narapela provins.

Nem: Ivan Chan Kutz
Krismas: 21 (man)
Adres: Tinputz District Office, PO Box 343, Bougainville, NSP
Save laikim: Pilai volibol, wokim fani, mekim penpren wantaim ol yangpela manmeri.

Nem: Fidelma Naruvau
Krismas: 21 (meri)
Adres: Tinputz District Office, PO Box 343, Bougainville, NSP
Save laikim: Go lotu, pilai volibol, mekim penpren wantaim ol yut, harim gospel na kankain musik.

Nem: Kessler Thurston Walker
Krismas: 19 (man)
Adres: PO Box 1441, Mt Hagen, Western Highlands Province
Save laikim: Pilai gita, raitim pas, kism pas, lukim TV, harim lotu kaset na go lotu.

Nem: Cathy Benny
Krismas: 18 (meri)
Adres: C/-Rosa Araboka, SIL - Employment Dept, PO Box 417, Ukarumpa, EHP
Save laikim: Pilai soka, basketbol, volibol, harim musik na go lotu.

Nem: Paul Pogera
Krismas: 17 (man)
Adres: Anglican Church, PO Box 6491, Boroko, NCD
Save laikim: Wokim penpren wantaim ol lain bilong narapela provins, senisim poto na presen na lukim ol pilai spot.

Nem: Joseph G Annan
Krismas: 22 (man)
Adres: PO Box 1027, Beach End Terrace, Cape Coast, Ghana, West Africa
Save laikim: Pilai futbol, ritim stori buk na pilai volibol.



STORI TUMBUNA

WANPELA taim wanpela man i bin go wokim gaden bilong em long ples bilong em long "Airote".

Long dispela taim, wanpela man i bin kism hap smok bilong em, em i bin smok long en pinis na i mekim posin long em na em i gat liklik sik insait long bel bilong em.

Yu save ol "Sanguma" long tok ples bilong mipela i kolim "Davera" i skul moa long kain kain wok bilong ol long lukim man i sik na skin bilong em tu i olsem, olsem, em bai ol i kamap stret long yu na kilim yu.

Olsem nau dispela man i go wokim gaden, na ol i kam stret long em na kilim em. Nambawan taim ol i salim ol 5-pela olgeta i kam pas, na pait wantaim em na em i kilim ol 5-pela olgeta indai.

Yu save dispela man em i strongpela man tru olsem na em i kilim ol 5-pela sanguma olgeta indai long tamiok.

Olsem na olgeta Devara o sanguma i belhat na ol i kam slipim em olgeta na bagarapim em. Bihain ol i kirapim em bek gen na ol i tokim em long kam na wetim ol

Ol sanguma kilim man



long wanpela ples ol i kolim Tamoni na long dispela tam ol i kambek gen long nait na ol i bagarapim em olgeta.

Tupela ai bilong em i tanim pinis na ol braunpela ai tasol i kam ausait. Em i slip long bus inap long tupela de olgeta.

Na long neks de gen wanpela man nem bilong em Aveni wantaim meri bilong em

Pirinave ol i laik i go long bus na ol i bungim em na karim i kam long kanu na bringim em i kam long nambis.

Olgeta manmeri i kam bung na krai long em. Dispela man i dai pinis. Na long wan kilok samting ol i planim em.

SANDAUN PROVINS

Mi laikim helpim long kamapim gut marit laip


Dia Laiplain

Mi na meri bilong mi i stap wantaim long tripela yia tasol laik bilong mitupela long wanpela narapela i no strongpela olsem long pastaim.

Bipo long mitupela i marit, mipela i bin gat strongpela prensip. Mipela i bin wokim promis long stap pas wantaim wanpela arapela na mipela i ken i gat gutpela marit laip long bihain taim.

Mi bin traim long stretim ol samting long mitupela i marit, tasol meri i bin tok em i no redi yet bikos em yangpela tumas. Mi rispektim em na mi bin laikim em long stap pas wantaim mi wan. Tasol em i go bikhet long mi. Em i hait na raun wantaim narapela man na em i gat bel. Bihain long em i bel long 4-pela mun, em i strongim em yet na kam long haus bilong mi na askim mi long maritim em. Mi kism em na mi peim braid prais bilong em.

Mitupela i save stap longwe long wanpela arapela na mi wantaim ol papamama i bin kirap nogut long em i karim bebi 5-pela mun tasol bihain long mitupela i marit. Stat long dispela taim nau, em i tokim mi stori. Bikos em i no asua bitong bebi, mi lukautim em. Mi laikim bebi olsem pikinini stret bilong mi, tasol mi no laikim mama. Mi inap long rausim em bihain em i karim bebi tasol bikos mi laikim tru bebi, mi larim mama tu i stap. Tasol nau pikinini i gro bikpela, mi laik kism divos na rausim meri.



Mi traim long pogivim meri long ol pasin nogut em bin wokim tasol bikos em i het strong na i no bihainim ol promis we mitupela i bin wokim long stap pas long mitupela yet na mitupela i marit, mi no wanbel tru taim mi tingim ol dispela bikhet pasin em i bin wokim.

DETERMINED

Dia Pren

Em i tru yu bin kirap nogut stret taim yu harim olsem meri bilong yu i bin wokim bikhet pasin. Moa yet, taim yu stap isi bihainim ol promis yutupela i wokim pinis long en. I luk olsem yu tingim pinis wanem samting bai yu wokim long daunim dispela hevi yu stap long en. Bikos yutupela i bin marit bihainim pasin kastom, bai yupela i no inap long stretim dispela kain hevi wantaim loya o long sait bilong sios. Tasol wanpela samting yu no klia long en em wanem samting i gutpela bai yu wokim nau. Mi kirap nogut bikos dispela wari yu gat i no wanpela isipela wari. I gat planti samting we yu mas lukluk long en, glasim na skelim. Bikpela

samting tu em pikinini bai olsem wanem?

Yu wok long ting olsem bai mipela i givim profesenel etv-sais long wanem samting yu i mas mekim tasol mipela i sori long tok olsem mipela i no inap long mekim disisen bilong yu we bai stiaim laip bilong yu, nogat. Mipela i laik helpim yu long mekim dispela, tasol yu yet i mas wokim disisen. Mipela i ken helpim givim tingting na ol rot yu ken lukluk long en, tasol bai mipela inap long hap tasol, disisen em i bilong yu.

Yu tok olsem meri bilong yu i bin brukim promis yutupela i bin wokim long stap pas long wanpela narapela taim yu kipim bilong yu. Long pasin kastom, dispela kain samting em wokim i ken as long rausim em.

Watpo na yu gat tupela tingting? Em i bikos em i tok-sori long bikhet pasin em bin wokim na yu pilim olsem yu mas pogivim em? O em bikos yu gat bikpela laik yet long em, maski em bikhet long yu? O em i bikos nogut pikinini i nogat gutpela famili long groap long en? O bikos yu yet tu i wokim rong long meri bilong yu na yu pogivim em?

Yu tok olsem yu laik pogivim na lusim tingting. Dispela em i gutpela samting yu wokim. Mipela i painimaut olsem em i hatpela samting long wokim long keis bilong yu. Watpo? Meri bilong yu i pilim olsem long kain pasin em bin wokim? Em i sori tru tru o nogat? Taim kain samting olsem yu bungim

i kamap long mipela long *Laiplain*, mipela i save givim dispela kain toktok mipela i bilipim olsem ol i tru. Olgeta manmeri i humen na olgeta manmeri i sinman. God i ken lusim tingting long ol sinman taim ol i tok sori na tokim em olgeta sin bilong ol long em. Jisas em Pikinini bilong God yet i bin kam daun long graun na dai long Diwai Kruse long rausim ol sin bilong yumi olgeta. Na Jisas i bin winim pasin bilong lusim tingting long sin long Papa God. Taim God i rausim ol sin bilong yumi, yumi save gat dispela gutpela kain piling olsme yumi klin na God i laikim bai yumi wokim wankain long ol arapela i wokim rong long yumi.

Long narapela mak, mipela i gat askim long wanem tingting famili bilong yu i gat long meri bilong yu. Taim yu marit long pasin kastom, i gat bikpela luk-save long pasin kastom na wanem samting ol papamama na hauslain i tok long en. Ol i ting olsem wanem long divos? Yu toktok long ol pinis tu long dispela samting?

Poroman, yumi toktok pinis long planti samting. Sapos yu bekim sampela ol dispela askim na toktok tu wantaim papamama bilong yu na ol arapela gutpela poroman na wantok, bai tingting bilong yu i klia na yu sanap long gutpela mak long wokim disisen long hevi na wari bilong yu.

Laiplain

Strongim agrikalsa indastri, Don Polye

MINISTA bilong Trensport na Sivel Eviesen, Don PombPolye i singaut long ol kes krop produsa long PNG long noken tingting planti long ol toktok olsem agrikalsa ekspot bai pundaun long dispela yia 2005.

Mista Pombpolye i askim olgeta sekta bilong agrikalsa ekspot

produsa long wok hat long surikim mak o volium bilong ekspot i go antap long traim stap long wankain level bilong peimen olsem long las yia 2004.

Em i tokaut olsem i gat tupela we bilong apim volium bilong ekspot long dispela taim nau we prais bilong kopi na kopra bai i

kam daun.


Gavman mas putim mani i go insait long strongim prais bihainim wanpela rot bilong komoditis prais stebelaisesen.

Tasol Mista PombPolye i tok dispela i no inap kamap bikos Gavman i pas yet long hatpela ekonomi kantri i stap long en tude.


Ol produsa na agrikalsa indastri mas bung wantaim long apim volium bilong ekspot long holim yet wankain level bilong peimen long dispela yia.

Mista Pombpolye i tok namba 2 tingting em wanpela rot yumi mas bihainim na kamapim. Tasol em i no rausim yet namba 1 tingting bikos i gat rot yet skelim tupela rot wantaim gut.

Mista PombPolye i singaut long olgeta sekta bilong komyuniti long wok hat na lukluk i go fowet long groim ekonomi bilong kantri insait long agrikalsa indastri. Em i tok sapos olgeta Papua Niugini i wok hat long developim agrikalsa indastri na noken tingim wanem kain salens ol i bungim, bai kantri inap ron gut na hariap tru.



• Wanpela man redi long pikim mau seri bilong kopi.
FAIL FOTO/JAMES KILA



• Wanpela ka pulap wantaim kopra long baksait. Nau yet prais bilong kopra i kam daun.

*Kids Fly
FREE **



Air Niugini
em i PNG!

AIR NIUGINI'S

DOMESTIC FAMILY FARES DEAL

- Buy one return Adult Ticket and one child travels *Free*.
- ◆ Offer applies to Nambawan, Weekender and Wantok Fares.
- ◆ Offer valid 04 Feb to 23 Mar 2005 inclusive.

* Condition Apply.

Contact your nearest Air Niugini Travel Centre or Travel Agent for further Information.



**Bisnis bilong Groim Diwai
insait long PNG
- Ol hevi bilong
planim samting
long ol renfores ples**

Wok Neseri

Ol pikinini diwai i save groa long kain kain rot. Wanpela rot em ol man yet i save planim, o ol i save yusim ol samting ol i kolim 'wildings'. Arapela rot em long planim ol pikinini diwai long ol neseri.

Rot bilong planim samting long neseri i save karamapim wok bilong mekim redi ol pikinini diwai bilong planim na pekim gut bilong karim i go long ples bilong planim. I gat kainkain rot bilong wok neseri bilong kainkain diwai, na taim bilong planim long wanwan ol hap bilong planim.

Ol neseri i ken stap sotpela taim tasol o i ken stap i go long taim.

Long ol bikipela fores plantesen program, ol i save sanapim ol pemenen neseri wantaim ol pemenen wara saplai, haus bilong kolim neseri, na ol haus bilong putim ol mesin. Sapos yu groim ol diwai olsem ol 'conifer' olsem 'Pinus', i mas i gat wanpela gutpela mycoffhiza! fangus i stap. Yu ken mekim dispela taim yu karim graun i gat mycorrhiza i stap long em. Dispela graun i save stap aninit long ol bikipela Pinus diwai.

Ol nogut samting long ol pemenen neseri em taim graun i lusim gris bilong em, taim ol pathogen i kamap bikipela na longpela rot bilong karim ol sidling i go long ples bilong planim. Namba wan bikipela samting nogut yu ken abrusim taim yu yusim pekpek bilong kakaruk o taim yu senisim ol plaua; namba tu hevi yu ken abrusim sapos yu yusim ol marasin bilong kilim ol binatang na ol arapela kain sik bilong diwai, longpela rot i no inap kamap wanpela hevi (sapos i gat rot) sapos yu yusim ol trak bilong karim ol pikinini diwai bilong planim.

Kain neseri i save bihainim kain diwai yu laik groim. Planti Pinus spp yu ken planim long ol bet na ol i ken kisim strongpela san long taim ol i stat long groa, tasol planti long ol arapela renfores diwai i mas halt long san taim ol i sta long groa.

Long ol neseri we bai i sanap long sotpela taim tasol, ol liklik frem (we yu ken mekim long pangal bilong kokonas) i ken stap bilong karamapim wanwan bet. Dispela i ken makim strong bilong san na ples kol.

Yu ken putim moa o rausim ol pangal kokonas long skelim strong bilong san long mak bilong ol sidling. Long taim bilong bikipela ren, ol lip bilong kokonas i save brukim ren na daunim hevi bilong ren antap long bet na i no inap long

bagarapim ol sidling.

Bikipela painimaut i kamap long taim bilong groim A.klinkii olsem strong bilong skelim san i bin bikipela samting long groa bilong ol sidling. Ol i painimaut olsem planti fama i save laik yusim dispela kain ol lo sed frem o lip bilong kokonas.

I mas i gat bikipela lukaut long ol bet bilong neseri long was long senis bilong lait na san long wanwan taim long san.

Givim gutpela sed i mas stap bilong kamapim inap pikinini diwai, na strong bilong sed yu mas skelim gut pastaim long lukim mak na rot bilong san namel long moning na apinun.

Planti long ol renfores pikinini diwai bilong mipela i no save slip olsem na i nogat bikipela wok yu mas mekim. Ol renfores pikinini diwai i save bagarap hariap, olsem na yu mas planim kwiktai bihain long yu kisim long neseri.

Tasol i gat sampela kain pikinini diwai we yu mas mekim liklik wok pastaim long ol i stat long groa:

Wanwan Pinus spisis (olsem P. taeda na P. eliotti) we i save groa insait long ol sab tropikel eria i save kisim strong long stratifikesen (ples kol we ol i ken stap laip inap long sampela wik) pastaim long taim bilong planim. Groa bilong em i save kamap kwiktai moa long ol sid we i no save stap longtaim long ples kol. Dispela i save daunim hevi bilong ol gras nogut.

Planti pikinini diwai we i gat strongpela skin i mas i gat tritmen long kamapim jeminesen kwiktai. Yu ken kamapim dispela sapos yu brukim skin bilong sid o lusim sindaun insait long hot wara.

Teak o yati diwai (tectona grandis) em i wanpela diwai spisis we pikinini bilong em i ken stap long taim na i ken groa long hamas yia bihain tu. Kainkain wok bilong putim long wara na lusim insait long san inap sampela de i ken kamapim moa jeminesen.

Graun bilong ol neseri bet i noken hevi tumas, na i mas i gat inap gris long em.

Ol i mas sindaun antap long graun bai i gat gutpela rot bilong wara long ron.

Sampela maikro ogenesisim i mas go insait long graun taim yu groim wanwan spisis namba wan taim, olsem Casuarina spp o Yar; sampela legume spp na Pinus spp.

Yu ken daunim ol dispela maikro ogenesisim insait long graun i stap aninit long ol bikipela diwai bilong wankain diwai yu laik groim.

Momis askim ol pipel long wok tru

...noken bihainim ol giaman bisnis



• Rais i wok long gro long fil o gaden. Mista Momis i laikim ol pipel bilong Bogenvil long lukluk long kain kes krop olsem. Foto: WILLIAM NATERA

GAVANA bilong Bogenvil, John Momis, i askim strong ol pipel long bihainim pasin bilong self rilaiens o wokim samting long lukautim ol yet na i noken wetim helpim o painim sotkat long mekim kwik mani.

Em i tokim ol long go insait long ol wok developmen na dispela i kisim i go insait ol wok long planim kakau, vanilla na ol arapela kes krop bikos dispela bai helpim long kirapim nupela otonomi gavman.

Ol dispela toktok i kamap bihainim U-Vistrak Kwik mani bisnis we i wok long kirapim opis na wokim ol samting long pulim ol pipel long putim mani i go insait long dispela skim.

Ol ripot Wantok Niuspepa i kisim long Buka i tok Noah Musingku em papa bilong U-Vistrak kwik mani bisnis i kirapim opis long Siwai na em i wok long pulim planti pipel i go insait long em.

Ripot i tok Mista Musingku i bin wokim wankain samting long Panguna we em bin sanapim opis long hap na em i tok promis long ol pipel olsem em bai wokim peiaut. Tasol nogat samting i bin kamap insait long tupela yia na klostu long pinis bilong las yia, Francis Ona na lain Mekamui bilong em mi bin rausim Mista Musingku long Panguna.

Nau em i wokim wankain long Siwai i stap.

Ol ripot i tok Mista Musingku i bin kamapim kwik mani bisnis long Siwai las Fraide na kolim beng olsem U-Vistrak Intanesenel Gavman Moniteri

Benking Sistem. Na komiti bilong go pas long wok em Royel Distrik Menesmen Kaunsel ov Siwai.

Ripot i tok ol pipel i no givap long bihainim em o wokim samting long en em bikos planti i bin putim bikipela mani long dispela bisnis na ol i gat rot yet olsem em bai bekim yet mani bilong ol.

"Insait long lewa bilong planti, ol i no inap long lusim tingting long bikipela mani bilong ol we ol i bin putim long U-Vistrak.

"Nau em i wok long pulim gen ol pipel long putim mani long U-Vistrak tasim em i tokim ol olsem skim bai helpim ol long kisim kompensesen long ol samting we ol bin lusim long taim bilong paif.

"Na wan wan man i wok long peim K60 long pulumapim fom na narapela K10 long baim pasbuk akaun we U-Vistrak bai putim mani bilong ol i go insait long em.

"Long dispela, em i wok long pilaim saikolojikel pilai o pilai wantaim tingting na filings (emotion) bilong ol pipel bikos dispela (kompensesen long ol samting ol i lusim) em samting we ol pipel i singaut planti taim tu long em na gavman no wokim samting long stretim ol," ripot i tok.

Planti toktok i bin kamap na i wok long kamap yet long dispela skim bilong Mista Musingku.


Musingku i bin sanap long kot tu long Waigani, Pot Mosbi, long hevi bilong U-Vistrak na kot i bin tokim em long noken ronim dispela bisnis moa tasol nau em i mekim gen.

McCARTHY & ASSOCIATES (FORESTRY) PTY. LTD.
National & International Forest Consultants
mccaf@datec.net.pg

"Long kisim tok stia long olgeta wok diwai"

Cat® Skid Steer Loaders

- 216
- 226
- 228
- 232
- 236
- 242
- 248



Engine performance and operator comfort maximise production.

Smooth, Easy Controls

- Two hydraulic joystick controls require only minimum wrist/hand movement, greatly reducing operator fatigue.
- Auxiliary hydraulics are actuated by a thumb-operated rocker switch on the joystick.
- Hand-throttle allows you to run at a constant speed, or an accelerator pedal can be used during load and carry, excavating or backdragging.

Operator Comfort

- Optional suspension seat adds operator comfort.
- Clear view of the work tool reduces operator fatigue and increases productivity.

Power and Versatility

- The Cat 3034 Engine is proven and reliable.
- Powerful hydraulics deliver outstanding lift and breakout forces.

Hastings Deering



PORT MORESBY
Phone: 300 8300
Fax: 325 0141

LAE
Phone: 472 2355
Fax: 472 1477

TABUBIL
Phone: 548 9045
Fax: 548 9155

RABAUL
Phone: 982 1244
Fax: 982 1129

Tok pilai wantaim Kanage olgeta wik!!

Ol tru tru poro o wantok bilong gutpela raitman Kanage i laikim tru sapos yupela i ken salim sampela tokpilai bilong yupela i kam na mipela putim long tok pilai kona bilong Kanage. Salim i kam long TOK PILAI KANAGE P.O. Box 1982, Boroko NCD o kam long opis klostu long BSP Waigani na neksdua long Mondo Sekanhan klos stua. Mipela stap long las opis. Sopotim raitman bilong yumi, Kanage!!



Papa Kanage wok olsem wanpela haus boi bilong misis Smith. Wanpela taim misis Smith givim K5 na salim Kanage go long stoa bilong Saina man. "Kanage go na baim hair dye bilong mi long sainis stua." Man Kanage i no save long hair dye olsem na em i kirap toktok long tingting olsem "hea dai, hea dai, hea dai, na wokabaut i go long Saina stua long Boroko.

Em i wok long bisilong tok 'hea dai' na i no lukim bikpela ston namel long rot.

Em nau lek i bamim na em i kisim bikpela taim stret. Het i paul na em kirap lusim tingting long wanem Misis Smith askim em long baim.

Long Saina stua nau Saina man askim Kanage. "Hei wat yu wan." Kanage traim long tingim

wanem Misis Smith i tok na tingting paul na em poinim long he dai antap long self na tokim Saina man "I want die." Mahn Saina pret na bekim "eh no ko ausait no dai hia, ko ausait."

Kanage tu yah strongim sait stret na tok "no yah Misis Smith wan me to dai". Baga yah strong tru na Saina pret na singautim sekyuriti na tok "hi don dai hia, ko ausait ko ausait yah."

Papa Alfie Waigani NCD

Kanage em mangi bus Koiari na kam marit long HB long na gat 6-pela pikinini, we em i sais bilong wanpela volibol tim.

Wanpela taim Kanage saspek long misis bikpela koros kirap. Kanage wail stret na em laik kilim em stret. Yu save mangi bus na meri HB wokim na baga sindaun bagarap.

Em kisim marasin tasol ol tambu stopim em. Wokim go em belhat i go inap apinun nau em

kisim kanu na tokim meri olsem, "Mi les long yu, les long ol pikinini na les long stap laip mi bai pedel, pedel, pedel na i go long biksolwara-wanem samting kamap em mi go."

Misis Kanage tingim ol pikinini nau stopim Kanage "Tingim ol pikinini tu oh husat bai pap bilong ol."

Kanage bekim "Kisim nupela papa bilong ol." Kanage pul i go 10-mita nambaut misis sanap long varanda na singaut "Na olsem wanem long royelti bilong friwe, mani bilong stim bisnis husait bai kisim?"

Kanage bekim, "Mi no wari em samting blong graun."

Man misis lukim Kanage pul i go na klostu bai go lus long solwara na em kirap na wokim las singaut. "Olgeta samting em yu les na hau bai mi stap na yu go na dai olsem? Plis lukim dispela samting, bai stap olsem wanem wantaim husat."

Taim Kanage tanim long las toktok bilong misis em lukim misis apim sket bilong em. Man

Kanage tanim hat wan tru na bekim "tru yah" wanwei em U ten na pul kam bek long HB.

Dokta Bus Gerehu stage 3B NCD

Namba wan taim bilong Kanage long ron long liklik balus i go pundaun long Wasu. Taim em kalap long balus long Lae, tingting bilong em i paul olgeta long em bai pasim sit olsem wanem.

Tasol pailot i kam helpim em na pasim sit bilong em. Tasol taim balus i ron antap yet em i paul em bai rausim sit olsem wanem taim balus i go pundaun long Wasu ples balus.

Balus i ron i go inap em i go kamap na pundaun long Wasu. Olgeta pasindia i go lusim balus na go aut pinis na Kanage sindaun tingting planti i stap na em tingim liklik poket naip long hanbek olsem na em pulim hanbek long lek i kam klostu.

Em laik brukim baksait i go

klostu long opim hanbek tasol hanbek i longwe na sit i holim em bek.

Nogat rot nau em tingting i nogat na isi tasol em wel isi isi olsem malio go daun long sit na kamaut long het bilong em na wantu karim hanbek na tekov go ausait long balus.

Klostu bikpela brata bilong em bai lusim ples balus na go bek bikos em ting Kanage i no kam long dispela balus tasol laki Kanage mekim samting stret na kam aut hariap na bungim brata bilong em. Yu save Kanage i pulap tu long save ya.

Hox Gwans Lae

Kanage i tok, Noken Bagarapim ol Pikinini! Pikinini i gat rait long stap long graun tu.

KANAGE

Raitman long TOK PILAI

Kam na tok pilai wantaim mi olgeta wik!!

DOK BILONG KANAGE EM WANPELA DOK NOGUT STRET...

EM NAU!! KISIM EM!! GUT BOI!! KISIM! KISIM!

WOOF! GRR! WOOF!

AAH!!

KANAGE SAVE GIVIM GUT KAI-KAI NA TOKIM EM LONG PUTIM WAS LONG OL RASKOL...

KAIKAI GUT... LONG NAIT U PUTIM WAS LONG OL RASKOL!

LONG NAIT DOK I SILIP GUT TRU NA OL RASKOL I KAM NA STILIM LAIT BILONG KITSEN...!

MONING NAU MISIS KANAGE I LUKIM NA EM BELHAT...

AIVOO! OL RASKOL I KAM NA STILIM LAIT BILONG HAUS KUK YAH! KANAGE PIPIA DOK INO WAS LONG HAUS!!


KANAGE KILIM DAI DOK...

YU STAP WE NA OL RASKOL I KAM NA STIL LONG HAUS, AH?!

WAK! AWOOO!!



• Oi 4-pela soka piksa antap i soim 9 Mail Evadahana Soka Asosiesen gren fainol long wiken. Poto: FABIAN CHOW. (Chow i bikpela sapota bilong soka na Presiden bilong Pot Mosbi soka Asosiesen).



• O mama noken. Utul Sakaia long lephan i kisim han nogut long birua bilong em Eunice Aifarapo long boksing bilong meri. Poto: JOE IVAHARIA

• Kam kisim. Pilaia bilong Young & Williams i ron long kisim bol bipo long birua bilong em long NasFund i kisim long Praivet Kampani Netbol Resis long Mosbi. Poto: JOE IVAHARIA



• Awods. (Long lephan) Dame Carol Kidu, wetlifta Dika Toua, SP Spot awod sileksen komiti siameri Emily Taule na SP Brewery humen risos menesa Gabriel Selibu.

• Anthony Opugu (lep han) i mekimsave long Francis Oaike long Pot Mosbi boksing resis long Lamana Siti Klab long las wik. Poto: JOE IVAHARIA

Pot Mosbi kriket kompetisen

Sarere 5 Februari 2005

Venue	R6	A Gret	(2 Day)	(Cont'd)	Taim	Mat/Stumps	Ampaia
Amini	OS Hoods	vs	Raukele	10:00am	Hoods (Assn)		
Colts	Chubb United	vs	Dogura	10:00am	Dogura (Assn)		
	B GRADE (40 overs)				Rescheduled Match from Week 4 (R2)		
STC	Mobil Steamships	vs	Kempa	12:30	M/STC		
	Under 19 (30 overs)				Rescheduled Matches from Week 3 (R1)		
Nomads	Mobil Steamships	vs	BNG Poreporena	12:30	PCC		
MB	Lamana Mariners	vs	Dogura	12:30	Mariners		
R14	Under 17 (25 overs)				(pinis bilong pilai)		
STC	Mobil Steamships	vs	KCC	8:10	M/STC		
R14	Under 15 (20 overs)				(pinis bilong pilai)		
HMS2	Chubb United	vs	Lamana Mariners	9:00	United		
Nomads	BNG Poreporena	vs	KCC	9:00	PCC		
Rules	Raukele	vs	OS Hoods	9:00	Raukele		
Rules	Dogura	vs	Pari	12:00	Pari		

Sande 6 Februari 2005

Venue	R6	A GRADE	(2 Day)	(Cont'd)	Time	Mat/Stumps	Umpires
Amini	Mobil Steamships	vs	TST Coasters	10:00am	M/STC (Assn)		
Colts	BNG Poreporena	vs	Lamana Mariners	10:00am	Mariners (Assn)		
	B GRADE (40 overs)				Rescheduled Match from Week 4 (R2)		
STC	OS Hoods	vs	Dogura	12:30	Dogura		
	Under 19 (30 overs)				Rescheduled Match from Week 3 (R1)		
MB	Kempa	vs	KCC	12:30	Kempa		
R14	Under 17 (25 overs)				(pinis bilong pilai)		
Nomads	Raukele	vs	BNG Poreporena	12:30	Raukele		
Rules	Lamana Mariners	vs	Pari	8:10	Pari		
MB	Chubb United	vs	Kempa	8:10	Kempa		
	Women's (25 overs)				MAJOR SEMI FINAL		
HMS2	1. Chubb United	vs	2. Lamana Mariners	12:00	United		
	Women's (25 overs)				MINOR SEMI FINAL		
Rules	3. TST Coasters	vs	4. BNG Poreporena	12:00	PCC		

BYE: Under 15 TST Coasters Anda 19 Chubb United

Toksave:

- 1) Umpires: Club captains to make alternate arrangements if the appointed Umpire is not in attendance.
- 2) Umpires to declare the winner, must print their names in the scorebook as well as sign the book.
- 3) Both Scorebooks to be completed with names of batsmen, bowlers, catches, wicket-keepers, DNBs and the winner declared. Penalty: one point.
- 4) A further penalty of two (2) competition points for failure to hand in your scorebook to Tony Elly's residence at Hohola by 7pm after the match.
- 5) Balls: 'A' Grade "Googly" (K50), Lower grades "Gem" (K40).
- 6) ALL FINALS MATCHES TO BE PLAYED OUT.

Ol Mt Hagen ragbi lig klab mas baim fi nau

Joe Ivaharia i raitim

PRESIDEN bilong Mount Hagen ragbi lig Alphonse Pu i mekim wanpela tokaut long afiliesen na rejistresen fi bilong 2005 sisen.

Long wanpela toksave i go long olgeta presiden bilong wanwan lig husat i laik afiliet insait long Mt Hagen ragbi lig asosiesen long dispela yia Pu i tokaut long wanem ol rul ol i mas bihainim.

Presiden Pu i bin tok olsem long ol klab husat i laik afiliet i mas rejista wantaim K600 we yu mas baim i kam long akaun bilong Mt.Hagen ragbi lig. De long rejistresen i pas em long Fraide, Februari 4, 2005.

Em i tok tu olsem husat i baim ol afilisen fi inap long stap na vot long enuel jenerol miting bilong Mt Hagen ragbi lig we bai i kamap long Mt Hagen kaunsel samba long 10 kilok moning long Sarere, Februari 5.

Pu i tok tu olsem wanem ol klab i no baim dispela ol fi inap long belo long Fraide bai i misaut long dispela sisen na bai ol i lukluk long ol arapela klab husat i gat laik long afiliet.

Long ol pilaia presiden i tok ol klab i mas rejistarim 40 ol sinia pilaia we fi bilong wanwan pilaia em K35.00. Dispela em i olsem K1,400 inap klab i mas baim bipo long ol pilaia i ken pilai long stat bilong 2005 kompetisen.

Rejistresen bilong ol pilaia bai i pas long Februari 18 na kompetisen bai i kik ov long Februari 19, 2005, Pu i tok.

Em i tok tu olsem tai moi pilaia i rejista bai ol inap long stap insait long seleksen bilong Chemica Didiman skwat long pilai long 2005 SP kap resis.

Narapela em long ol junia pilaia we ol klab i mas rejisterim 40pela junia pilaia we rejistresen fi em K25.00 long wanwan pilaia. Long klab i baim em olsem K1000. Dispela bai i ken givim sans long ol junia pilaia long stap insait long seleksen bilong PNG junia tim igo long World Kap tonamen long Russia.

Rejistresen bilong ol junia pilaia tu bai i pas long Februari 19, 2005.

Presiden Pu i tok olgeta klab i mas baim olgeta klab afiliesen na pilaia rejistresen fi i kam long akaun bilong lig long benk aninit long dispela nem; Mount Hagen Rugby League, benk; BSP, Mount Hagen, akaun namba: 1000 988 519.

Em i tok tu olsem noken baim igo long PNG ragbi lig opis. Ol klab husat i laik mekim ol peimen long sek mani i mas baim tu long akaun bilong asosiesen o givim igo long tresera Dennis Yamai na holim ol risit tu.

Long kisim moa toksave ol i ken kam lukim mi na ol eksekutiv bilong mi, Pu i tok.

Bikpela resis long ron i kamap

Joe Ivaharia i raitim

LONG las wik Sarere i bin lukim ol man long ron bilong Pot Mosbi Rod Ranas i resis long Gardens Hills long tupela kos o distens. Em i bin resis long 2 kilomita na 8 kilomita we i lukim moa long 28 i resis long sotpela kos na 37 i bin ron long longpela resis.

Tupela resis i bin stat antap long mauten klostu long Garden Hills na bihainim rot bilong ol we i lukim sotpela resis i ron igo long Eda Ranu sait bihainim Waigani draiv na longpela kos i bihainim Poreporena Friwe igo long wanpela bikpela ston long burns Peak bas stop.

Bihain ol rana i tanim na kam bek gen long pinis long Garden Hills we san i mekim save long ol na planti i bin sotwin tu na ol i wokabaut long

sampela hap bilong ron. Milton lakosi i bin winim longpela 8 kilomita resis we em i autim Simon Pinampio na James Gurumi na long ol meri nambawan long pinisim resis em Deanne Turnbull, Pam Christie i kam seken na i winim resis long kris-mas grup bilong em.

Long sotpela resis i lukim Francis Xavier i winim long Vincent Marcellus husat i kam seken na long ol meri em Susan Michael i autim Lucy Tobia.

Long dispela wiken Sarere bai resis i kamap long Pom Grammer Skul. Ol rana bai i ron go olsem long Taurama Ami Bareks we mak bilong em o distens em long 5 kilomita.

Olgeta manmeri na pikinini i welkam long kam na resis wantaim Pot Mosbi Rod Ranas we em bilong stap fit na helti na long seim taim amamas tu.



• Dame Carol Kidu na sempion wetlift Dika Toua long lons bilong 2005 SP Spot Awot nait long SP Brewkettle. Foto: JOE IVAHARIA



• Robin Moaina, Koporet Afeas Menesa Ok Tedi Mining Ltd i amamas bihain long kampani i givim K100,000 sponsasip long PNG Spot Federesen. Foto: JOE IVAHARIA



• Ol wina bilong Prais Minista Manam Sunami Golf Salens. Foto: JOE IVAHARIA

Clarke winim 2005 Allan Border medol

SYDNEY; Australia - Yangpela betman Michael Clarke long Mande nait i mekim nem taim em i abrusim ol biknem kriket pilaia long winim Allan Border medol.

(Alan Border i bilong Tasmania, husat i kepten bilong Australia kriket tim, i wanpela biknem pilaia long dispela pilai).

Clarke long kisim dispela medol i winim narapela biknem pilaia, Damien Martyn, husat planti manmeri i ting bai kisim tasol dispela i abrus.

Clarke husat i bilong Niu Saut Wels i gat 23 krismas i yangpela pilaia tru long winim dispela awod.

Narapela ol namba wan pilaia husat i winim dispela awod bipo em tupela Australia kepten Steve Waugh na Ricky Ponting na ol narapela olsem Glen McGrath, Matthew Hayden na namba tu vais kepten Adam Gilchrist.

"I tru tru i no ting olsem mi bai sindaun hia long nait (Mande)," Clarke i tok bihain long em i kisim awod. "Las 12-pela mun bilong mi i narapela kain olgeta. Mi winim awod olsem yangpela kriket pilaia na em i driman bilong mi olsem long kisim grinpela kep (et). Dispela ating i namba wan de long laip bilong mi.

"Long lukim nem bilong mi long bod (bilong ol win)... long mi i narapela samting olgeta. Dispela em samting mi i no inap long mekim long tupela yia i go pinis. Mi sindaun long hap pilaiam fes klas kriket bilong ol NSW na mi save driman olsem wanpela taim bai mi makim Australia na pilai Tes mes na dispela em i narapela kain samting tru long wanpela man husat i gat 23 krismas na winim kain awod olsem.

Givim dispela awod long Clarke we i kam long man, Allan Border, husat i kirapim spirit bilong pilai kriket long Australia long ol 1980s dispela em i bikpela samting long Clarke.



• 'I no inap bilipim'. Michael Clarke wantaim Allan Border medol long Mande nait. Stori na foto: SYDNEY MORNING HERALD.

Long ol nainpela Tem mes pilai bilong em Clarke i mekim 631 ron long 48.5 ova na dispela i soim kain strong na save em Clarke i gat long en.

Long namba wan Tes mes pilai bilong em long makim Australia long Bangalore, India we Clarke i kamapim 100 ron, dispela em planti manmeri i no inap long lus tingting.

Em i abrusim tru ol strongpela na sampela trik boul bilong ol boula bilong India long kamapim kain namba bilong ron olsem.

Clarke husat ol wan pilaia bilong em i save kolim em "papi" (pikinini dok) i

painim lek bilong em taim em i pilai bilong Australia egensim Niu Silan na kamapim 100 ron.

Clarke i winim ol arapela biknem pilaia long kisim dispela awod long taim em i mekim bikpela namba bilong Australia long taim ol i pilai wantaim Pakistan long las wik.

"Mi tok (12-pela mun i go pinis) olsem sapos mi inap long putim mi long gutpela posisen ol selekta inap makim mi long pilai long Tes Mes...dispela em i wanpela hatpela samting em ol selekta i mekim long kisim mi.

Clarke i kisim ples bilong Brad Hodge.

Safin winim Australia Open



• Marat Safin apim han bihain long win. Foto: SYDNEY MORNING HERALD.

MELBON, Australia: Win bilong Marat Safin long Australia Tennis Open i bagarapim planti ol Australia long amamas. Safin bilong Rasia i winim Lleyton Hewitt 1-6, 6-3, 6-4, 6-3 long gren fainol long Sande. Ol lain Australia i ting Hewitt husat i bilong Australia bai win na ol i putim was long dispela taim tasol dispela plen bilong ol i bagarapim taim Safin i win. Long dispela taim Safin i stap daunbilo moa long fes 20 wol renk ol pilaia tasol em i mekim gut long winim Hewitt husat i stap namba tu long wol renk. Pastaim long Safin i winim wol namba wan Roger Federer bilong Switzerland. Na long pilai bilong ol meri Serena Williams i autim tiket bilong wantok Amerika meri Lindsay Davenport. Davenport i stap namba wan long wol na Serena i stap namba 7 long wol.

Eels sainim nupela ol pilaia

SIDNI; Australia: Paramatta Eels bai sain wantaim 7-pela nupela pilaia long primia tim bilong em. Dispela bai kamap taim ol i bungim South Sydney Sharks long triel pilai bilong tupela long Februari 5. Het kosa bilong Paramatta Brian Smith i tok em i makim pinis 20-man skwat we dispela i i kisim tu 7-pela bilong ol dispela nupela man. Bipo Kwinslen Maroons huka Paul Marsh husat i pilai long fes gret long tripela yia long klab bilong em bai i kam bek long Eels bihain long em i bin stap pilai wantaim ol Warriors. Long putim yunifom bilong ol Eels long namba wan taim em ol man olsem Mark Riddell, Timana Tahu, Ian Henderson, Paul Stringer, Henry Perenara na Glen Morrison. Ful Paramatta skwat em Wade McKinnon, Ash Graham, Luke Burt, Daniel Wagon, Eric Grothe, John Morrison, PJ Marsh, Adam Peek, Mark Riddell, Aaron Cannings, Nathan Cayless, Josh Cordoba, Dean Widders.

Ol senis pilaia em Tim Smith, Timana Tahu, Ian Hederson, Paul Stringer, Henry Perena, Michael Vella na Glenn Morrison.

Tszyu redi long difenim taitol

AUSTRALIA: Kostya Tszyu i redi long difenim wol lait-weltawet taitol wantaim Inglan man Richy "Hitman" Hatton long Manchester, Inglan long Jun 4. Kosyta Tszyu husat i bilong Rasia tasol i stap long Australia nau i gat nem long tromoi ol strongpela han i wok long tren gut long kamap long dispela pait. Tasol maski em i gat kain nem em i save olsem Hatton bai pait long as ples bilong em na olsem Hatton bai kisim moa sapot long em long ol manmeri. Hatton husat bipo long go insait long dispela pait i kisim luksave olsem em i stap long mak we em i ken makim Tszyu, 35, na pait wantaim em. Hatton, 26, i gat rekod bilong winim 38 win na 28 bilong dispela ol win em i stap insait long ol raun we wan wan ol tonamen i laikim long em.

Namba tu sunami kriket pilai

AUSTRALIA: Namba tu sunami kriket we ol oganaisa i plen long holim long dispela mun em ol opisel i surikim i go long Eprel long dispela yia. "Tingting bilong holim sunami pilai em Intenesenet Kriket Kaunsel i tok i no rait taim long holim long wanem planti ol pilaia bai stap long pilai bilong long yet," Australia Kriket Kaunsel (ACC) sif Jagmohan Dalmiya i tok. Namba wan kriket em ol pilaia i holim em long K34 milien long Sydney kriket graun. "ICC tok em i no isi long putim tasol dispela (namba wan) sunami pilai namel long Esia XI na Australia XI. More long 283,000 i lusim laip bilong ol na moa i stap turangu na hagre bihain long 10 mita solwara i bagarapim ol ples long Esia olsem Indonesia, Sri Lanka, India, Malaysia na i go moa long Somalia, Afrika.

NZ television stesen winim ples long soim 2006 Melbon Gem

TELEVISION Nu Silan (TVNZ) i kisim tok orait long toktok na soim 18 Komonwelt Gem long Melbourne, Australia long Mas long T.V na radio long ol pipot insait long Niu Silan na Pasifik.

Dispela i skruim histori bilong TVNZ olsem wanpela biknem television long Niu Silan long wokim dispela wok long taim bilong Komonwel Gems bipo yet taim dispela ol pilai i kamap namba wan taim long T.V long 1966 long Jamaica.

Dispela tok orait i givim pawa long TVNZ na radio long soim olgeta stori na piksa. Siaman bilong Melbourne 2006 Komonwel Gems Koporesen, Ronald Walker i tok dispela wok ol i givim long TVNZ em i gutpela long olgeta lain husat bai i wok bung wantaim ol.

"Em i wanpela bikpela wok long sait bilong T.V na radio mipela bai i wokim wantaim Nu Silan long dispela Komonwelt Gem," Walker i tok. "Dispela bai givim sans long ol lain long Nu Silan long lukim ol gem taim ol i kamap narapela yia," em i tok.

TVNZ bai soim ol gem long namba wan stesen bilong em, TV1 na tu long narapela stesen bilong ol, TV2 we ol bai givim taim inap 130 aua long soim na planti bilong dispela ol piksa bai kamap laiv o soim stret wanem samting i kamap i stap nau.

"Insait long dispela 12-pela de we gem bai kamap bai mekim planti man-

meri i laik long lukim T.V," Walker i tok. Sief eksekutiv bilong TVNZ, Ian Fraser i tok, "Dispela soim olsem mipela i gat planti eksperiens na save long soim planti ol kainkain spots long T.V."

"Mipela i save tu olsem planti manmeri long Nu Silan bai i laik long lukim ol etlit o ol lain bilong pilai husat i makim Nu Silan na save sapos ol i pilai gut o nogat," Fraser i tok.

TVNZ i tok dispela wok bai i gutpela na isi moa long wanem dispela tupela ples i stap klostu na taim bilong ol i klostu wankain. Ol lain i go pas i bilip olsem ol bai inap putim moa long 1 bilien pipel long T.V taim em i kamap long Mas 15-26, 2006.

Moa long 4500 etlit i kam long 71 kantri bai bung long Melbourne long dispela pilai.

Papua Niugini bai i wanpela bilong dispela ol Komonwel kantri husat bai kamap long dispela ol pilai. Nau yet PNG i wok long redim em yet long dispela ol pilai we em i putim ai long ol etlit bilong em olsem wetlifita Dika Toua na swima Ryan Pini long mekim gut.

Long sapotim ol Saut Pasifik kantri Australia Spot Komisen aninit long Australia gavman i redim sampela mani we em bai salim ol spot opisel bilong em long trenim ol spotmanmeri bilong dispela ol ailan kantri.

Komonwel Gems i bikpela pilai klostu wankain olsem long Olimpik Gems.

Chelsea go pas long Inglan primia soka

LONDON (Reuters) - Tupela het bilong tupela sentrol difenda Robert Huth na John Terry i helpim Chelsea long winim Birmingham City 2-0 long fift raun bilong Inglan FA Kap pilai.

Chelsea husat i pilai bihain long Bolton Wanderers i win 1-0 long namba tri divison long Oldham Etlik, i stretim olgeta rot bipo long em i kamap long dro bilong dispela wik Mande we nau yet em i go pas long kompetisen we em i stap 10 poin longwe long Manchester United husat i ron namba tu long em. Bihain long tupela em Arsenal, Everton na Newcastle United. Olgeta dispela ol tim i winim pilai bilong ol long wiken.

Tasol narapela kirap nogut pilai em Fulham husat i dro 1-1 long namba tu divison long Derby Country.

Terry i ki bilong win bilong Chelsea we em i pasim maka bilong Huth, Martin Taylor long tok orait strongpela kik bilong dispela man Jemeni long taim Damien Duff i wipim bal long kona kik.

Tru dispela blok we refri i no bin lukim dispela i helpim gut Terry long hetim bal i go insait long umben bilong ol Wanderers.

Dispela traik bilong Terry husat brata bilong em Paul i save pilai long namba foa divison long Yeovil long win 3-2 i mekim menesa Jose Mourinho long larim 10-pela man tasol i pilai long narapela 10-pela min long taim em i rausim Huth husat i kisim bagarap.

"Long namba wan hap mipela i pilai gut tru... long namba tu hap mipela i no pilai gut, dispela em long rong bilong mipela na tu ol i mekim bikpela senis long pilai gut," Mourinho i tokim Sky Spot Nius.

James Kila i stori long bikpela Aizuwe husat i lusim ragbi na stap mekim ol arapela samting.

Aizuwe i go insait long droim ol piksa

PLANTI olupela spotsmanmeri husat i makim kantri o provins bilong ol em yumi no save tumas long stap bilong ol na tu laipstail nau ol i stap long en.

Taim nem bilong ol i save pairap tasol long niuspepa em yumi save ol i stap we na wanem wok ol i mekim. Tasol planti taim nem bilong ol i no save kamap bihain long ol i lusim spot bilong ragbi lig.

Sampela husat i pilai ragbi bifo i lusim na mekim wok bilong ol yet tasol i stap.

Sampela i kirapim bisnis na sampela i stap nating tasol long ples. Sampela bilong ol i stap strong yet na wok long mekim wok yet long dispela spot olsem kosa na tu helpim long developmen bilong ragbi lig insait long Papua Niugini wantaim ol junia pilaia.

Wanpela gutpela ragbi lig pilaia bipo bilong Goroka Lahanis husat i save olsem inta-sens wantaim biknem PNG Kumul faivet Stanely Gene bipo taim Goroka Lahanis i gat nem long SP Inta-siti kompetisen em Nick Aizuwe.

Dispela man em bilong Bundi insait long Madang provins na em i bikpela brata bilong Makali husat nau i stap long kontrak na i pilai long Inglis Supa Lig klab Hull Kingston Rovers long Inglen.

Taim Nick i pilai ragbi lig long Goroka Lahanis, em i save pilai olsem hap-bek. Dispela man i save ritim gem gut na setim ol bikpela fowat long brukim difens bilong ol narapela senta olsem Mt Hagen Eagles, Lae Bombers, Mosbi Vipers na Rabaul Guria.

Nick i bin pilai wantaim ol strong-



• Nick Aizuwe i droim disain bilong Sihereni Kopi projek long wanpela penting bilong em. Liklik brata em Makali husat i PNG Kumul pilaia nau i pilai ragbi lig long Inglen. Ol foto: JAMES KILA.

pela pilaia bipo olsem Tuiyo Evei, Martin Abori, Oscar Zugu, Eddie Pokel na brata bilong em yet Chris Sari.

Insait long dispela Aizuwe famili bilong Bundi, tupela brata husat i mekim nem long PNG Kumuls em

Makali na Chris Sari. Dispela tupela em ol brata bilong Nick, husat em papa bilong Kurakum Signs, wanpela liklik sain na atis kampani Nick i go pas long em long kamapim ol gutpela sain na disain bilong ol kampani long Hailans rijon.

Nick yet i gat 7-pela brata na tupela susa. Olgeta dispela lain i bikpela long lsten Hailans na ol i save karim nem bilong Bundi long makim Goroka sait long planti spots. Nick wantaim Chris na Makali karim nem bilong Goroka Lahanis long ragbi lig.

Dispela bagaros Nick em wanpela gutpela ragbi lig pilaia bipo. Em i bin go pas olsem kepten tu bilong Goroka Lahanis na tu Hailans Zon taim stail bilong pilai bilong em i winim lewa bilong ol kosa.

Nau yet dispela "Yal Kinde" bilong Bundi i stap long lsten Hailans klostu long Yunivesiti ov Goroka na i save mekim ol wok bilong em olsem atis na sain-raita.

Ol piksa na sain em i save wokim i save winim tru lewa bilong ol sampela bikpela bisnis long Hailans rijon na planti lain i singaut long em yet long go na mekim ol disain bilong ol.

Nick i stori olsem bikpela tingting bilong em long go strong long go insait long wok bilong droim ol disain na silk-skrin printing i bin kamap taim bihain long em i bin kisim liklik bagarap long pilai ragbi.

"Mi bin pilai ragbi long-pela taim na mi pilim olsem ating em i moabeta mi putim bikpela tingting bilong mi em long go moa insait long droim ol piksa.

"Taim mi mekim olsem mi bai inap long kisim liklik moni na sapotim sindaun bilong mi wantaim famili bilong mi," Nick i stori olsem.

Dispela ol atis wok bilong Nick Aizuwe i bin winim lewa bilong sam-

pela ol bikpela kampani insait long PNG. Sampela bilong ol dispela kampani em Farmset Limited, Pacific Helicopters, Hevi Lift na Shallows.

Long sait bilong wok Nick i save mekim long ol helikopta kampani olsem Pacific Helicopters na Hevi-Lift em olsem em i save droim ol rejistresin namba long sait bilong ol dispela helikopta.

Dispela ol peint em i yusim em ol strongpela peint tru na ino save raus hariap.

Las wik i go pinis Nick i bin kamapim wanpela gutpela disain stret bilong wanpela kopi projek bilong Sihereni. "Dispela kampani em wanpela lokal man bilong apa-Asaro, David Oromarie i go pas long en.

Nick i droim piksa bilong muruk olsem disain bilong Sihereni Kofi Projek. Dispela disain em Nick i droim long olgeta ol ka na trak bilong Sihereni.

Sapos yu husat nupela man long Goroka i raun i stap bai yu ken lukim ol dispela naispela disain em hanmak bilong Nick tasol.

Nick i stori olsem nau yet em i wok long developim bes bilong ol kastoma bilong em na em i mekim ol wok long Chimbu, lsten Hailans, Westen Hailans na Kainantu.

Tasol em i gat bikpela tingting long mekim moa wok long bringim kamap bikpela kastoma bes bilong em.

Nick i tok tu olsem wanpela bikpela tingting bilong em i gat em long muv i go daun long ples bilong em long Madang na kirapim bisnis long hap long sait bilong disain na sait-raiting.

"Mi tingting long go bek long ples long Madang bikos taim Ramu Nikel-kobalt projek i kamap ating moa bisnis bai kirap. Olsem na mi mas go stap klostu long ples," Nick i tok olsem.



• Stanley Gene (fran), man Nick Aizuwe i save pilai wantaim long Goroka Lahanis, wantaim Doug Nuy (baksait long em) na ol narapela bikpela sapota bilong tim.

PM golf mekim moa long K100,000

Andrew Molen i raitim

DISPELA golf salens bilong Praim Minista we i kamap las Fraide long Pot Mosbi i bungim mani abrusim K100,000 mak.

Siaman bilong ogenaisng komiti, Nick Kuman i tok mak bilong mani ol putim em K75,000 tasol ol i abrusim dispela na em i amamas tru.

"Mipela i redim dispela gem insait long tupela wik tasol na toksave long ol lain husait i laik pilai na helpim.

"Gem i kamap insait long liklik taim tru tasol planti lain i givim taim bilong ol long kamap na helpim na mi amamas long bekim bilong ol," Kuman i tok.

Em i tok mani mak stret ol i bungim i nap olsem K102,500.

Bihain taim olgeta samting i redi bai ol i givim dispela mani i go long Red Cross husait ol bai i yusim long wok helpim ol lain long Esia na Manam.

Antap long ol mani ol i bungim indepen-pablik bisnis koperesen (IPBC) i givim K30,000, Nesenol Kapitol Distrik Komisen (NCDK) givim K5 000, National Palamen givim K5 000, Papua Niugini turism promosen autoriti (PNGTPA) givim K2 500 na Minerol risoses developmen kampani (MRDC) givim K2 000. I nap olsem 56 tim i kamap long dispela resis we ol i putim K1000 kina long pilai.

Kuman i tok amamas na tenkyu bilong em i go tu long ol narapela memba bilong ogenaisng komiti long ol i givim taim bilong ol long wokim dispela salens i kamap.

Praim Minista na petron o was papa bilong Pot Mosbi Golf Klub, Sir Michael



• Sir Michael i redi long putim bol i go insait long hul long dispela salens. Foto: JOE IVAHARIA

Somare, husat i pilai tu long dispela salens, i tok em i amamas tru long ol lain husait i kamap pilai na husat ol narapela i helpim long sampela kain we.

"Planti ol famili tu i givim han long bungim mani long helpim ol lain i kisim bagarap long Esia na Manam na dispela i gutpela. "Mi amamas long ol pablik long

ol i bekim singaut bilong helpim ol lain i kisim bagarap. Mi save olsem skul i stat na planti i laikim mani bilong skul fi tasol ol i no wari, ol i givim han yet long helpim ol narapela. "Long dispela mi tok tenkyu tru long olgeta lain i pilai, ol bisnis haus, wanwan manmeri na ol narapela pipol long kantri tu," Sir Michael i tok.

Elcom bai pait long stap namba wan yet

Andrew Molen i raitim

ELCOM bai lukluk long strongim gem bilong ol taim ol i kism fil dispela wiken bihain long ol i kambek strong na dro wantaim Manalos long gem bilong ol las wiken insait long Pot Mosbi A-Gret softball kompetisen bilong ol man.

Manalos i pretim Elcom taim ol i dro wantaim ol 6-6.

Elcom husat ol i stap pas long kompetisen i kism hat taim long Manalos long fes foapela ining we ol i no skorim wanpela poin tasol ol i kam bek strong long namba faiv na seven ining long kism inap poin na dro wantaim Manalos husat ol i no isi wantaim long bet.

Manalos i winim fes ining 1-0 we Ora Gimi wanpela i skoa.

Gem i go strong long seken, namba tri na namba foa ining na dispela i lukim nogat wanpela tim i kam long hom bes.

Long namba faiv ining Gimi i skoa gen bilong Manalos na Demas Tovia bilong Elcom i bekim wanpela we i kism skoa i go 2-1.

Robert Livingood bilong Manalos i paitim wanpela hom ran long kism em na Oscar Kami i kam long hom bes na putim ol i go pas 4-1 bihain long sikspela ining.

Tasol long namba seven Elcom i kam bek strong we i lukim Izikiel Tovia (Jr), Eddie Simba, Demas Tovia, Simon David na Alistair Tavol i skorim ol ran long putim ol i go pas long namba wan taim long gem 6-4. Manalos i pait bek na kism tupela moa ran long David Maera na Henry John long pinisim gem wantaim 6-6 skoa.

Long gem bilong ol meri, AB Bears na Chebu bai kirapim das taim ol i bung dispela wiken long A-gret gem bilong ol.

Bears husat i stap pas long leda long kompetisen wantaim 25 poin bai traim long pasim rot bilong Chebu husat ol bai i gat strongpela tingting long lusim namba foa ples wantaim 18 poin na go antap.

Long ol narapela pilai, Wantok bai mekimsave wantaim Dolphins, SP na Gazelle bai pairap wantaim na Admiralty



• Tony Williams bilong Dolphins i no seif bihain long George Taule bilong Brown Eagles i autim em long hom bes long Pot Mosbi softball. Eagles win 11-4. Foto: JOE IVAHARIA

bai lukim Norths.

Las wik Dolphins i kalapim Chebu 13-11, SP i spakim Admiralty 15-13, Wantok nilim Norths 7-0 long fofit bihain long ol i no kamap na long men gem AB Bears kalkaim Gazelle 11-8.

Na long narapela nius ol selekta bilong Pot Mosbi softball tim bai makim ol pilaia long makim Kapitol Siti long kamap long nesenel sempionsip long Pot Mosbi long Ista wiken.

Presiden bilong Pot Mosbi Softbol Asosiesen Isikel Tovia snr i tok ol selekta bai makim ol pilaia bihainim strong na save ol i soim long pilai.

em i tok ol pilaia husat ol i bin maki pinis long stap long Palau mini-Saut Pasifik

Gems tim em bai ol selekta bai givim ol namba wan sans long kism ples long stap insait long dispela nesenel sempionsip.

Dispela long wanem ol bai i mas kamap long dispela sempionsip we ol nesenel selekta bai stap long lukim ol na makim ol long stap insait long PNG tim.

Bai i gat tripela posibel tim. Wanpela em bilong ol lain em ol i makim long mini Saut Pasifik Gems, narapela em long ol lain husat i soim tru save na strong long pilai na namba tri tim em bilong delvelomen skwat.

Tovia i tok asosiesen bai tokaut long nesenel softball bodi long wanem ol plen na tingting em i gat long dispela nesenel sempionsip.

Madang Gems tok orait long Kikbosing pilai

Andrew Molen i raitim

Kikbosing i kism luksave long Madang taim Madang Provinsol Gavman i tok orait long em i wanpela spot we bai i kamap tu long dispela Madang Provinsol Gem bihain long yia.

Dispela i soim olsem laik bilong kikbosing i kirap long taun na planti ol sumatin i lukluk tasol long kamapim ol gutpela pilai.

Presiden bilong Madang Kikbosing Asosiesen, Christopher Papiali i tok kodineta bilong provinsol gem Peter Angasa i tokim ol olsem kikbosing bai i stap insait long dispela ol provinsol pilai. Papiali i tok dispela em i gutpela tru long kikbosing long kikbosing i no go long taim long provins olsem ol arapela spot.

Em i amamas tu long harim olsem ol oganaisa bilong ol pilai long taim ol i givim tok orait i tok tu olsem kikbosing em i wanpela gutpela na strongpela pilai insait long kantri.

Papiali i tok planti manmeri i soim laik na putim nem long stap insait long spot long taim trening i stat long las yia.

Em i tok ol kinkain manmeri i kamap na joinim klab na sampela i yangpela tru we krimas bilong ol stap olsem siks na em i putim ai tasol long lukim wankain i kamap long dispela yia tu.

Trening bilong dispela yia bai i kamap long Hol o traipela haus bung bilong Paramed Skul long 4:30 apinun long Tunde na husat mameri i laik join i ken i go na givim nem bilong ol na rejista.

Papiali i tok ol lain husat i save givim trening em ol man husat i gat intenesenel ekspirien long dispela pait olsem Mark Sondo, Kira Wenalu na Nathan Samson.

Em i tok namel long ol instrakta, Sondo em i wanpela ekspirien kikboksa husat i pait pinis long Italy, Australia na Canada na Wenalu i pait long Australia.

"Planti meri tu i soim bikpela laik na planti moa i laik kam nau," Papiali i tok. "Ol wokman, ol sumatin na ol manmeri husat i stap nating tu i save kam long trening."

"Wanpela senis mi lukim i kamap em long pasin bilong ol lain i kam long trening. Lain husat i save kism ol drak i lusim dispela pasin na dispela em i wanpela samting mi amamas long en," Papiali i tok.

PNG Boksing lukluk long Osenia na mini SP gems

Joe Ivaharia i raitim

PAPUA Niugini Amata Boksing Asosiesen i wok long mekim wok redi nau long stretim na redim ol pait manmeri bilong em long go pait long ol intanesenel tonamen we bai i kam long dspela yia.

Tupela bikpela pilai we ol eksekutiv i lukluk long en em Osenia Boksing Sempionsip we bai i kamap long Pot Mosbi, PNG na Mini Saut Pasifik Gems long Palau.

Presiden bilong PNG Amata Boksing Asosiesen Lohial Nuau i bin tok olsem ol i mas makim wanpela strongpela tim bilong kantri long go long dispela tupela bikpela pilai.

Nau yet planti ol asosiesen insait long kantri i no tok klia yet long ol wok redi bilong ol long wanwan asosiesen bilong ol.

Dispela i mekim na presiden i tok ol i wok long lukluk long ol boksa ol i stap long dispela trenin skwat ol i bin makim long las yia Nesenel Sempionsip long Buka.


Nuau i tok wok redi bilong ol wanwan boksa em i samting bilong ol wanwan klab na asosiesen long mekim tasol bikpela luksave bai mipela ol eksekutiv i lukluk long en.

Na tu wok redi bilong lukautim namba 21 Osenia Boksing Sempionsip i kik ov pinis taim PNG Amata Boksing Asosiesen i bin makim Memba bilong Aitape na Minista bilong Fores Patrick Pruaitch olsem petron.


Long seim taim tu PNGABU i makim tu wanpela oganaisen komiti we man husat bai igo pas olsem siaman em Albert Veratau, Maketing Menesa bilong SP Brewery.

Dispela komiti bai mekim olgeta wok redi long sait bilong fanresin, ples bilong silip na kaikai na painim ol sponsa tu.

Sapos wanem koporet bisnis haus o man i laik givim helpim mas ringim PNGABA presiden Lohial Nuau long 689 2572 o seketeri John Avira long telepon 300 5464 long kism moa toksave.



WANTOK Spots



Kundiawa tasol i afiliet long PNGRFL

...Planti i soim laik tasol

Paul Zuvani i raitim

MOA long 27 ragbi lig long kantri i soim laik long afiliet long Papua Niugini Ragbi Futbol Lig long 2005.

Na i no long taim Kurumul ragbi lig we i kisim ol tim long Banz na Minz distrik long Westen Hailans provins i soim laik. Dispela bai mekim namba i go antap long 28 lig olgeta.

Tasol PNG Ragbi Futbol Lig jenerol menesa Joe Tokam i tok Kundiawa wanpela tasol i baim pinis K500 afiliesen fi olgeta arapela i no yet.

Em i tok bipo fi bilong ol lig long afiliet i sanap olsem long K2750 tasol nau i senis na go daun long K500. Dispela fi Tokam i bilip i no ken hat long ol lig i afiliet hariap.

Ol lig husat i soim laik em Biella, Bulolo, Is Niu Britan, Goroka, Kimbe, Koiari, Lae, Madang, Mendi, Mount Hagen, Nongugl, Pangia, Porgera, Poreporena, Pot Mosbi, Ramu, Tabubil, Wabag, Kerema, Imboug, Malalaua, Kavieng, Tari, Mosbi Saut, Wewak, Kiunga na Kurumul.

Tokam i tok PNGRFL bai holim enuel jenerol miting (AGM) bilong em long Sande 13 Februari long Lae.

Tasol em i tok bipo long dispela ol lig i kam ol i mas mekim dispela ol samting pinis- "Wanwan ol lig i mas pulumapim afiliesen fom em Lig i salim i go long ol. Ol i mas baim K500 afiliesen fi na dipositim mani i go long PNGRFL Gernal akaun."

Akaun nem na namba em PNGRFL General Akaun 1000 490544 BSP Lae na feksim risit i go long feks namba 472 0232.

Narapela ol samting Tokam i tok em "ol i mas i gat ol minit bilong 2004 AGM bilong ol na tokaut long taim ol i votim opisel bilong ol. Wantaim dispela i mas i gat presiden ripot bilong 2004 sisen na 2004 mani ripot bilong ol.

Sapos ol i no bihain dispela ol lo Tokam i tok ol i no memba bilong PNGRFL na olsem ol i no inap vot long ol miting bilong PNGRFL. Na long wankain taim PNGRFL bai i nogat luksave long ol.

"Aninit long lo bilong PNGRFL dispela ol lig sapos ol i laik long afiliet i mas baim afiliesen na opisel fi bilong ol 7-pela de bipo long dispela AGM de. Dispela i min olsem long 7 Februari dispela wanwan ol lig i baim pinis fi bilong ol," em i tok.

Moa yet em i tok bikpela agenda bilong AGM em long ilek-tim ol dairekta bilong PNGRFL. Na ol nominesen pepa em PNGRFL i salim pinis long wanwan ol lig long nominetim man bilong ol.

Na long dispela taim ol lig i mas salim bek dispela ol pepa wantaim nem bilong man ol i laikim long en na salim i go bek long opis bilong PNGRFL opis long Lae.

Long narapela nius askim i go long PNGRFL long rausim Jeff Wade olsem sif eksekutiv bilong PNGRFL.

Mount Hagen Ragbi Lig presiden Alphonse Pu i tok pasin bilong kisim ol man long narapela kantri i save bagarapim na daunim ron na standet bilong ragbi lig long kantri.

Em i singaut tu long Leba Dipatmen long rausim tok orait bilong Jeff Wade long wok long wanem dispela posisen i bilong ol PNG man tasol.

"Mipela i bin gat planti ol man long narapela kantri husat i ronim ragbi lig na kisim i kam long dispela level wantaim kamap bilong SP Kap na nau helpim i kam long Australia Ragbi Lig.

"Bihain long kantri i save kamapim ol pilai moa long 50-yia i luk olsem mipela yet i no inap long ronim ragbi lig.

"Mi ting i gat planti ol arapela gutpela Papua Niugini ragbi lig edministra man husat i stap long ronim dispela opis," Pu i tok.



Spotsman Tru...Biknem PNG kriket pilaia Jamie Brazier i makim ples bilong em long tromoi ain long paitim bal long Praim Minista Manam na Sunami Golf Salens las Fraide. Brazier long dispela mun bai go wantaim PNG Kriket Tim long Singapore long wanpela bikpela pilai wantaim Singapore long Februari 17. Foto: JOE IVAHARIA